

# I 'UTZ LAJ TZIJ CHIRIJ I JESUCRISTO U TZ'IBAM I SAN MATÉO

I qui bi i je ratit u mam i Jesucristo

**1** <sup>1</sup>Iri are i qui bi i je ratit u mam i Jesucristo chi umuk uxiquin i ujer mam David xak i ujer mam Abraham.

<sup>2</sup>I mam Abraham-le are u kajaw i mam Isaac; xo'on panok, i mam Isaac-le are u kajaw i mam Jacob; te'uri i mam Jacob-le are i qui kajaw i mam Juda cu' i ratz u cha'. <sup>3</sup>Te'uri i mam Juda are qui kajaw i mam Fáres xak i mam Zar, i qui chuch are i ati Tamar. Xo'on panok, i mam Fáres are u kajaw i mam Esrom, te'uri i mam Esrom are u kajaw i mam Aram. <sup>4</sup>Xo'on panok, i mam Aram are u kajaw i mam Aminadab; y te'uri i mam Aminadab are u kajaw i mam Naason; i mam Naason-le are u kajaw i mam Salmon. <sup>5</sup>Xo'on panok, i mam Salmon are u kajaw i mam Booz, y u chuch are i ati Rahab. Te'uri i mam Booz are u kajaw i mam Obed, y u chuch are i ati Rut. Te'uri i mam Obed-le are u kajaw i mam Isai. <sup>6</sup>Y xo'on panok, i mam Isai are u kajaw i mam Rey David. I mam David-le are u kajaw i mam Salomon, i u chuch i mam Salomon are i rixokil can i 'etz mam Urías.

<sup>7</sup>Xo'on panok, i mam Salomon-le are u kajaw i mam Roboam; te'uri i mam Roboam are u kajaw i mam Abías; i mam Abías-le are u kajaw i mam Asa. <sup>8</sup>Xo'on panok, i mam Asa are u kajaw i mam Josafat, te'uri i mam Josafat are u kajaw i mam Joram; i mam Joram are u kajaw i mam Uzías. <sup>9</sup>Te'uri i mam Uzías are u kajaw i mam Jotam; i mam Jotam

are u kajaw i mam Acaz; i mam Acaz-le are u kajaw i mam Ezequías. <sup>10</sup>I mam Ezequías are u kajaw i mam Manases, i mam Manases are u kajaw i mam Amon; i mam Amon are u kajaw i mam Josías. <sup>11</sup>I mam Josías are qui kajaw i mam Jeconías cu' i ratz u cha'. Are je c'as ique, are 'uri xe chap i aj Israel winak y xe c'am bi pa tinimit Babilónia.

<sup>12</sup>Te'uri, xo'on panok i mam Jeconías are u kajaw i mam Salatiel; te'uri i mam Salatiel are u kajaw i mam Zorobabel. <sup>13</sup>I mam Zorobabel are u kajaw i mam Abiud; i mam Abiud are u kajaw i mam Eliaquim; i mam Eliaquim are u kajaw i mam Azor; <sup>14</sup>i mam Azor are u kajaw i mam Sadoc; i mam Sadoc are u kajaw i mam Aquim; i mam Aquim are u kajaw i mam Eliud. <sup>15</sup>I mam Eliud are u kajaw i mam Eleázar; i mam Eleázar are u kajaw i mam Matan; i mam Matan are u kajaw i mam Jacob. <sup>16</sup>I mam Jacob are u kajaw i mam Jose; i mam Jose-le are i rachijil i al-Mariy. I al-Mariy are u chuch i Jesus chi Tolke<sup>a</sup>.

<sup>17</sup>Chi cakil wi je cajlajuj lemaj chi qui kajawim re can i mam Abraham c'a ru' i mam David; te'uri xak je cajlajuj tan chic lemaj chi qui kajawim tan chic chi rijil i mam David c'a xe c'am bi i aj Israel winak pa tinimit Babilónia. Xak je cajlajuj lemaj tan chic chi rijil i qui 'enam i aj Israel winak pa Babilónia c'a xu rik i 'ij chi xalax i Crísto chi Tolke.

**Wach i ralaxbal i Jesucristo**

<sup>18</sup>I ralaxbal i Jesucristo, queje iri xo'ono: i al-Mariy, chi u chuch, ya u

<sup>a</sup>1.16 I tzij "Crísto" ca bixic que'elok "Tolke," pa ka ch'awbal yoj.

bim chic che i ma Jose chi que c'uli'ic. Xui-ri, are maja cacuc'aj quib, ire iwab winak chic rumal u cho'ab u Tewel i Dios chi petnak puwi. <sup>19</sup>I ma Jose xu bij pu c'ux chi xa quiui jach quib ru' i al-Mariy ali'al. 'Utz laj winak ire, n-craj ta cu ya u q'uix che chiquiwach conojel i winak. <sup>20</sup>Are ca tijin chu ch'obic ile, jun ángel re i Kajwal xupon ru'. I ma Jose xrachic'aj pu waram chi xu bij i ángel che:

—A-Jose, chi at umuk uxiquin can i mam David, ma xij awib che i al-Mariy; cha c'ulaj na awu', lic are awixokil, man i ac'al chi calax na ru', i rajaw are i u Tewel i Dios. <sup>21</sup>I ac'al-le chi calax na, are jun ala. Cha ya pu bi A-JESUS. Queje ni u bi ile, man que resaj u winak chupam i qui mac. (Queje ile xu bij i ángel che.)

<sup>22</sup>Queje xe ic'aw wi ique ile; y xe'elok pacha u bim can i Kajwal ujer. Ire u bim che jun ajbil u tzij:

<sup>23</sup>I apoj ali ca q'uiji ni yobil chirij y calax ni jun ala ru';

i ala-le, Emanuel ca bix che.

Queje i tzij ile xu tz'ibaj i ajbil u tzij i Dios ujer. I “Emanuel” que'elok: Dios 'o ku'.

<sup>24</sup>I ma Jose, are xc'un sak chuwach, 'is xo'on pacha xbix che rumal i ángel chi taktal li ru' rumal i Kajwal Dios; xruc'aj i al-Mariy chi lic rixokil. <sup>25</sup>Xui-ri, ire to' xu chajij i al-Mariy, n-xq'uiji ta tan ru', c'a xq'uiji ni ral ac'al; y xu ya pu bi A-JESUS.

I nimak tak aj 'ij que upon ru' i Jesus

**2** <sup>1</sup>Are xalax i Jesus pa tinimit Belen re i jyub Judéa, i 'atol tzij are i mam Heródes. I mam-le 'o pu patan pa tinimit Jerusalem; je 'o juban winak je aj 'ij<sup>b</sup>, je petnak c'a naj pa oriénte. <sup>2</sup>Are xe upon pa Jerusalem, xqui tz'onoj chique i winak:

—¿Pa'owi i nim laj 'atol tzij que i aj Israel winak chi xalaxic? Ya xkil i u ch'umil are oj 'o chila pa oriénte, rumal-i xoj c'un chu cojic u 'ij —xqui bij.

<sup>3</sup>I nim laj 'atol tzij, mam Heródes, are xu ta rason ile, lic xc'achir rumal; xak conojel i winak pa tinimit Jerusalem xe c'achir rumal. <sup>4</sup>Te'uri i 'atol tzij xe u siq'uuij i nimak tak sacerdoté que i aj Israel, tak i tijonel re i tzij tz'ibtal can rumal i mam Moises ujer. Are xe moltajic, xu tz'onoj chique pa calax na wi i Cristo chi tolque coy'em. <sup>5</sup>Ique xqui bij 'uri che:

—Calax pa tinimit Belen, u cwenta i jyub Judéa. Queje ile que'elok, man queje ile tz'ibtal can rumal i ajbil u tzij i Dios ujer. Queje iri xu bij:

<sup>6</sup>Yet chi at tinimit Belen, at u cwenta i jyub Juda, ma ch'obo mok n-ti a 'ij yet; 'o ni a 'ij man chiquixol awac'al yet que'elok 'o ni jun qui c'ambeal; cuc'aw ni u tzam chique in winak, aj Israel.

Queje ile tz'ibtal canok —xqui bij i mam'ib.

<sup>7</sup>Te'uri i mam Heródes ali'al xe u siq'uuij i nimak tak aj 'ij chi je petnak pa oriénte y xu tz'onoj chique wach xo'on i ic', wach xo'on i 'ij are xwinakir i ch'umil. <sup>8</sup>Te'uri, xe u takbi pa Belen. Xu bij chique:

—Jix chu tzucuxic i ral ac'al-le; na'al chi tzucuj. We xi riko, col i bij chwe, man xak yin quin e' chu cojic u 'ij —xu bij i mam Heródes.

<sup>9</sup>I nimak tak aj 'ij, are xutzin u bixquil ile chique, xqui maj chubi qui be. I ch'umil chi xnabeaj chiquiwach c'a pa oriénte, xbin chic chiquiwach c'a xupon pa yatal wi i ral ac'al. Chila xtaq'ui na puwi i ja pa'owi i Jesus. <sup>10</sup>Are xquil i nimak tak aj 'ij chi xtaq'ui i ch'umil, lic xe quicotic. <sup>11</sup>Y xe 'oc ru' ja, xqui rik i ac'al ru' u chuch, ixok Mariy, xe xuqui'ic, xqui coj u 'ij i ac'al. Te'uri, xqui tor i quekan, xquesaj li qui sipon chi cuc'am y xqui ya che. Ile are óro, xak inciénso, xak i mírra<sup>c</sup>. <sup>12</sup>Are xe tzalij chic pa qui tinimit, junwi chic be xqui majo man xbix chique rumal i Dios piqui waram chi me tzalij chic ru' i mam Heródes.

<sup>b</sup>2.1 I je aj 'ij-le je winak chi queta'am i ajlanic re i 'ij, i ic'. <sup>c</sup>2.11 Mírra are jun cunbal lic muy, lic pakal rajil.

**I qui camsaxic i ac'alab  
rumal i mam Heródes**

<sup>13</sup>Je 'enak chic i nimak tak aj 'ij, te'uri jun ángel re i Kajwal xwinakir pu waram i ma Jose. Xu bij che:

—Chat walijok, cha c'ama bi awac'al, xak i u chuch, y chat 'anmajok, jat c'a Egípto. Chat 'ol chila c'a quin bij na chawe umpa cat petic, man i mam Heródes cu tzucuj ni ac'al, craj cu camsaj —xu bij i ángel che.

<sup>14</sup>I ma Jose xwalijic, xu c'ambi i ac'al, xak i u chuch, y xqui majbi qui be cha'ab, xe 'e c'a pa Egípto. <sup>15</sup>Chila xe q'uiji wi c'a are xcam i mam Heródes. Queje ile xe'elok xak jun ru' pacha u bim can i Kajwal; man i ajbil u tzij i Dios u tz'ibam can i tzij-i chi u bim i Kajwal: “Pa Egípto quin siq'uij wi in C'ojol.” (Queje ile tz'ibtal canok.)

<sup>16</sup>I mam Heródes, are xu nabej chi xt'or can cumal i nimak tak aj 'ij, lic xpe roywal che. Rumal 'uri, xu tak qui camsaxic conojel i ral tak alabom we maja quiqui chap oxib junab, man qui bim che chi colo 'o chic queb junab che u winakiric i ch'umil. Queje xu tak u 'anic ile pa tinimit Belen, xak ronojel i jyub chirij chuwach. <sup>17</sup>Queje ile xe'elok pacha xu bij i tzij tz'ibtal can rumal i mam Jeremías, i ajbil u tzij i Dios ujer. Xu bij ire:

<sup>18</sup>Ca tataj jun nim laj o'ej pa tinimit Rama,

Are i ixokib aj Israel<sup>d</sup> que siq'uinic, que o'ic,

Man i cac'al, ya xe camic, ya n-ta chic;

Lic n-ca pactaj ti qui bis rumal. (Queje ile tz'ibtal canok.)

<sup>19</sup>Xo'on panok xcam i mam Heródes. Te'uri, chila pa Egípto, jun ángel re i Kajwal xwinakir ru' i ma Jose pu waram. Xu bij che:

<sup>20</sup>—Chat walijok, cha c'ama bi ac'al y u chuch, chix tzalij che i jyub Israel; man ya xe cam ique chi cacaj u

camsaxic i ac'al. (Queje ile xu bij i ángel che.)

<sup>21</sup>Te'uri i ma Jose xwalijic, xu c'am bi rac'al, i rixokil y xe tzalij che i jyub Israel. <sup>22</sup>Are que tijin chi be, i ma Jose xu ta rason chi u q'uexel i mam Heródes are i u c'ojol, ma Arqueláo u bi. Ire xu xij rib che, n-xraj ta xa 'e jeki pa jyub Judéa rumal. Te'uri xbix chic che rumal i Dios pu waram wach i cu 'ano; rumal-i, xa 'e pa jyub Galiléa. <sup>23</sup>Are xe upon chila, xa 'e jeki pa tinimit Nazaret. Queje ile xe'elok, pacha qui bim i ajbil u tzij i Dios ujer, chi Jesus “aj Nazaret” ca bix na che.

**I ma Wan, aj kajsanel ya, coc chi chac**

**3** <sup>1</sup>Xo'on panok, i ma Wan, aj kajsanel ya, xupon che i chakij jyub tz'inilic, chila pa jyub Judéa. Are xuponic, xoc chu bixquil u tzij i Dios chique i winak chi xe moltaj ru'.

<sup>2</sup>—Chi jalwachij i nojbal chuwach i Dios —xu bij chique—. Man i 'atbal tzij chi ca pe chicaj ya ca jekanic —xu bij.

<sup>3</sup>I ma Wan-le are i jun chi 'ax bital wi chi ca c'unic. Are i bin-nak can ile are i ujer ajbil u tzij i Dios mam Isaías. Ire u tz'ibam canok:

Ca tataj u ch'awbal jun ca siq'uin che i jyub tz'inilic; cu bij:

“iYa ca pe i Kajwal! Chi yijba u be chuwach.

Chi suc'ba ni'pa i jul, ni'pa i tanalak pu be i Kajwal.”

(Queje ile tz'ibtal canok.)

<sup>4</sup>I ma Wan, i u 'u' ire xa are i rismal camey 'antal u 'u' che; i ximbal u pam xa are ch'akap tz'um. Wach i xu tijo xa are wach i xu rik pa tak 'es: xa xu tij u wa'al cab, xak xe u tij i ral tak sac'. <sup>5</sup>I winak chi xe upon ru' chu tayic u tzij, 'o i je petnak c'a pa tinimit Jerusalem, xak 'o i je petnak pa ronojel tak lugar re i jyub Judéa, xak 'o i je petnak chu nakaj i ya Jordan. <sup>6</sup>Ique, are xqui tz'onoj ni cuybal mac che i Dios, te'uri i ma Wan xu kajsaj ya piquiwi pa ya Jordan.

<sup>d</sup>2.18 I mer tzij xu bij waral-i are “Ati Raquel.” Ire que'elok qui q'uexel conojel i ixokib aj Israel.

<sup>7</sup>Xui-ri, xril ire je q'ui i aj Fariséo winak, xak i aj Saducéo<sup>e</sup>, chi cacaj ique to' ca kajsax ya piquiwi. Are 'uri xu bij chique:

—iYix xa ix rac'al cumatz! ¿Pachin xbin chiwe yix chi quix totaj chuwach i tojpen chi ca tijin nali piwi? <sup>8</sup>Chi 'alijinsaj 'ut ru' wach tak i qui 'ano we i jalwachim chic i nojbal chuwach i Dios. <sup>9</sup>Mi ch'ob yix mok xa n-ca pe tu tojbalil piwi yix xa rumal ix aj Israel winak, xa rumal ix umuk uxiquin can i mam Abraham. Mi ch'ob yix chi lic quix totaj na rumal. Quin bij chiwe chi Dios, che i abaj-i, ca tiqui chu 'onquil uq'ual aj Israel winak che, we ta craj —xu bij i ma Wan chique. <sup>10</sup>Xak xu bij:

—I tojpen ya ca pe piwi, pacha jun icaj yij chic che jun che, c'atzbal re i ra'. Ronojel tak i che' chi n-cu ya tu wach chom, ca c'atzixic; te'uri ca porox pa 'a'. <sup>11</sup>Yin, katzij, quin kajsaj ya piwi yix, c'utbal-re we i jalwachim chic i nojbal chuwach i Dios. Xui-ri, i Jun chi ca c'un chwijil yin cu kajsaj i u Tewal i Dios piquiwi ni'pa i qui jalwachim qui c'aslemal; xak cu kajsaj li 'a' piquiwi i je mal. Ire lic nim ni u 'ij chinwach yin; n-ca majaw ta chwe we quin 'an mocom che wib chirij, mi tene cwuc'aj u xajab, rumal ni u 'ij nim. <sup>12</sup>Col u 'ata tzij piquiwi i winak, pachin i je 'utz, xak pachin i ne te 'utz. Ire yij chic pacha co'on jun ru' u pala are cu pu u wach u trigo. Are i 'utz quel che u trigo, cu molo y cu ya pu c'olbal. I rij, chi n-'us taj, ca porox pa 'a' chi n-tu chupic —xu bij i ma Wan chique.

#### U kajsaxic ya puwi i Jesus

<sup>13</sup>Che tak i 'ij-le, i Jesus xel pa Galiléa, xupon chiya Jordan pa 'o wi i ma Wan; xupon chu kajsaxic ya puwi rumal ire. <sup>14</sup>I ma Wan xu ch'obo chi n-cu maj taj we are ire ca kajsaw ya puwi i Jesus. Xu bij:

—Yet, mas ca majaw chawe chi ca kajsaj ya pinwi yin. N-ca majaw taj we yin quin kajsaw ya pawi yet —xu bij.

<sup>15</sup>I Jesus xu bij:

—N-ta co'ono. Queje cha 'ana ni ile wo'or, man ca majawic caka 'an ni ronojel pacha craj i Dios —xu bij.

Te'uri i ma Wan xu ya u wach che, wach i xbix che. <sup>16</sup>I Jesus, are xutzin u kajsaxic ya puwi, xel pa ya. Xak te'et, xjaktaj i caj, xa 'iltaj i u Tewal i Dios chi xkaj lok pacha jun palomax suc'ulic puwi Jesus, <sup>17</sup>y xtataj jun ch'awbal chicaj chi xu bij:

—Iri lic are i wac'al chi c'ax quin na'o; lic quin quicot che, wach u 'anom.

#### Xraj itzel cu tzaksaj i Jesus chupam u mac

**4** <sup>1</sup>Are xo'on ile, i Jesus xc'am bi rumal i u Tewal i Dios che jun jyub tz'inilic. Xc'am bi chila, 'ilbal-re we ca tzaksax chupam u mac rumal itzel. <sup>2</sup>Chila xu ch'ij cuarénta 'ij, cuarénta a'ab, lic n-ta xu tijo; te'uri xpe i numic che. <sup>3</sup>Are 'uri, xupon itzel ru', tzaksabal-re chupam u mac. Xu bij che:

—We katzij at u C'ojol i Dios, cha bij che i abaj-le chi co'on wa che rib —xu bij che.

<sup>4</sup>I Jesus xu la' u wach che itzel y xu bij: —N-quin 'an taj, man tz'ibtallic chupam u wuj i Dios: “N-xui ta rumal i wa je c'as i winak; are rumal ronojel u tzij i Dios je c'aslic.”

<sup>5</sup>Te'uri itzel xu c'am bi i Jesus che i lo'laj tinimit, Jerusalen. Xe u ya chila c'a chu tzam i rachoch i Dios. <sup>6</sup>Te'uri xu bij che:

—We at u C'ojol i Dios, cha c'aka bi awib c'a pulew. N-cat cam taj, man chupam u wuj i Dios, queje iri tz'ibtallic:

I Dios cu bij na chique i ángel chi cat qui chajij.

Ique lic cat cuc'aj che qui 'ab, mi tene quiqui ya chawe que 'ana c'ax che awakan che abaj.

<sup>c</sup> 3.7 I aj Fariséo winak je jutzobaj aj Israel winak chi lic xqui coj u 'ij i ujer 'atbal tzij re i mam Moises. Xak lic xqui coj u 'ij i qui costúmbre chi qui cojom junam ru' i 'atbal tzij-le. I aj Saducéo winak xak je jutzobaj aj Israel. Ique-le lic je are u nimakil re i rachoch i Dios. I qui c'utunic ique junwi jubi' chuwach que i aj Fariséo.

(Queje ile xu bij itzel che.)

<sup>7</sup>I Jesus xu la' chic u wach che:

—Xak tz'ibtal chupam u wuj i Dios chi maka c'am u pam i Kajwal Dios —xu bij che.

<sup>8</sup>Te'uri itzel xu c'am chubi i Jesus che jun jyub, naj u wi. Chila xe u c'utu wi ronojel i tinimit 'o chuwach i jyub ta'aj, ru' tak i qui chomal. <sup>9</sup>Te'uri xu bij che:

—Ronojel iri 'is quin sipaj chawe, xui-ri we yet cat xuqui chinwach chu cojic in 'ij. (Queje ile xu bij itzel che.)

<sup>10</sup>I Jesus xu la' chic u wach che itzel:

—iJat, at Satanás! Man chupam u wuj i Dios, queje iri tz'ibtalic: “Xui che i Kajwal Dios cha cojo u 'ij; xui che ire ca 'an wi a patan,” —xu bij che.

<sup>11</sup>Te'uri itzel xel chuwach i Jesus; are 'uri xe upon juban ángel ru', xol qui to wach i rajwaxic che.

#### I Jesus xu jek u chac pa jyub Galiléa

<sup>12</sup>Xo'on panok, xu ta rason i Jesus chi ma wan tz'apil pa cárcel. <sup>13</sup>Are xu ta ile, xa 'e tan chic pa jyub Galiléa, xel pa Nazaret, xa 'e jekel pa tinimit Capernaum. I Capernaum 'o chu chi' i alagun; 'o che i jyub Zabulon, tak i Neftali. <sup>14</sup>Are xupon i Jesus pa jyub-le, xe'elok pacha u tz'ibam can i mam Isafás chi ajbil u tzij i Dios ujer. U tz'ibam can ire i tzij-i:

<sup>15</sup>Quin bij chiwe wach quiquil na chila pa jyub Zabulon tak pa Neftali, chila pa jyub pa ca 'e wi i be ru' i mar, chila pa jyub ch'aka ya re i Jordan, chila 'ut pa Galiléa, pa je 'o wi i ne te aj Israel, chi n-queta'am ti Dios.

<sup>16</sup>I winak chila chi je 'o pa 'ekumal, quiquil na jun nim laj sak.

Ca pe u sakirbal piquiwi ni'pa i to' je 'o chupam qui mac, to' je 'o chuwach i camic.

(Queje ile xu tz'ibaj i mam Isafás ujer.)

<sup>17</sup>Are xupon i Jesus chila, are 'uri xu jek u bixquil chique i winak:

—Chi jalwachij i no'oj chuwach i Dios, man i u 'atbal tzij ya ca jekanic. (Queje ile xu bij i Jesus chique.)

#### I Jesus xe u siq'uij cajib achiab, aj chapol car

<sup>18</sup>Che tak i 'ij-le, are ca tijin i Jesus chi be chu chi' i alagun Galiléa, xe ril queb achiab, catz qui cha' quib. I jun are i ma Simon chi xak ma Pédro quiqui bij che; i jun chic are i ma Andres. Ique-le je aj chapol car, y que tijin chu c'akic i cataraya pa ya. <sup>19</sup>I Jesus xu bij chique:

—Chix terej chwij y quin 'an na chiwe ix aj molol che i winak pacha qui 'an chique i car —xu bij chique.

<sup>20</sup>Are 'uri, ique xco'taj can i cataraya, y xe 'e ru'.

<sup>21</sup>Xo'on chupan jubí, i Jesus xe ril chic queb achiab catz qui cha' quib. Are i ma Jacobó, xak i ma Wan, je u c'ojol i mam Zebedéo. Ique je 'o pa bárco ru' i qui kajaw, que tijin chu yjibaxic i cataraya are xe u siq'uij i Jesus ru'; <sup>22</sup>juntir xqui canaj can i qui bárco, xqui canaj can i qui kajaw, y xe terej chirij.

#### I Jesus xe u nawsaj je uq'uijal winak

<sup>23</sup>Te'uri i Jesus xu jek qui solixic ronojel tak i tinimit pa jyub re i Galiléa. Xoc ru' tak ja re qui molbal'ib, y xe u nawsaj i winak chi que moltaj chila. Xu paxsaj i 'utz laj tzij re u 'atbal tzij i Dios, xak xe rutzirsaj iwabib, bi chi c'axil 'o chique.

<sup>24</sup>Xak ronojel i jyub Síria xak xqui ta rason wach ca tijin i Jesus chu 'onquíl pa Galiléa. Xqui jek li qui c'amic iwabib ru': ni'pa 'o tak i yobil chique, ni'pa 'o tak c'ax chique. Xe qui c'am li 'o itzel tew chique, xak ni'pa i quiqui tij i camic rumal i atac, xak ni'pa i je sic. I Jesus, ni'pa ile xe rutzirsaj. <sup>25</sup>Je uq'uijal winak xe terej chirij: xe c'un i aj Galiléa, xe c'un i aj Decápolis, xe c'un i aj pa Jerusalen, xak ronojel i Judéa, xak xe c'un aj ch'akap re i ya Jordan.

#### I Jesus xu bij pachin i ca pe ni 'utz piquiwi

**5** <sup>1</sup>I Jesus, are xe ril je uq'uijal winak je teren chirij, xel bi chuwi jun jyub, y xcubi chila. Ni'pa i que tijin qui nawic che u tzij xqui mol quib ru'. <sup>2</sup>Te'uri xu jek qui nawsaxic ru' i tzij-i:

<sup>3</sup>—'Utz que ique chi queta'am 'o rajwaxic piqui c'ux chuwach i Dios, man que oc na 'uri pa cu 'at wi tzij i Dios.

<sup>4</sup>'Utz que ique chi que bisonic, man i Dios cu cubsaj ni qui c'ux.

<sup>5</sup>'Utz que ique chi 'o u nimal qui c'ux, man ca ya' ni jyub ta'aj chique chi u sujum i Dios.

<sup>6</sup>'Utz que ique chi lic quiqui rayij u 'anic wach tak craj i Dios, man ire lic que u to chu 'onquil.

<sup>7</sup>'Utz que ique chi quewi 'o i c'axnabal qui c'ux, man i Dios xak c'ax que u na ni ique.

<sup>8</sup>'Utz que ique chi ch'am i piqui c'ux, man ique quiquil nu wach i Dios.

<sup>9</sup>'Utz que ique chi que qui chomarsaj i que ch'o'ojinic, man "je wac'al" cu bij na 'uri i Dios chique.

<sup>10</sup>'Utz que ique chi ca'ani c'ax chique xa rumal u 'anic wach craj i Dios chique, man que oc na 'uri pa cu 'at wi tzij ire.

<sup>11</sup>'Utz iwe yix we c'ax que ch'aw ni winak chiwe xa wumal yin. 'Utz iwe yix we quix qui yo'ya, xak we quiqui bij i mentir chiwij xa rumal quix terej chwij.

<sup>12</sup>Mix bisonic, xa chix quicotok, man qui rikbej 'uri jun nim laj sipun chila chicaj. Cha c'un chi c'ux, xak queje xqui 'an li winak ile chique i ajbil u tzij i Dios ujer.

**I je re chic i Dios je pacha atz'am,  
xak je pacha u tzunbal 'a'**

<sup>13</sup>Yix 'ut lic qui rik i chac chique i winak waral chuwach i jyub ta'aj; ix pacha i atz'am chi lic cu rik u chac chique. Xui-ri, i atz'am, we xsach u jelal, chwach 'uri u yijbaxic chic u jelal ca 'anic? N-taj. Ile n-cu rik ta chic u chac; xa ca c'ak bic; to' ca wach'albex chic cumal i winak.

<sup>14</sup>Yix ix pacha u tzunbal 'a' waral chuwach i jyub ta'aj. Iwilom 'ut wach o'onom jun tinimit we 'o tzam jyub; lic 'alaj, n-ruwam ta rib. <sup>15</sup>Xak iweta'am, we jun cu tzij jun cantil, n-que u mina ta chuxe' jun cajon; n-'us taj we cruwaj. Are i cu 'ano, cu ya 'an chicaj paja, man conojel que tzun na rumal. <sup>16</sup>Xak queje chi 'ana yix, chi ix pacha u tzunbal 'a'

waral chuwach i jyub ta'aj, chi ya che i tzunbal ca 'e chiquiwach i winak. Queje ile quiquil na wach tak i 'utz qui 'ano. Rumal 'uri, quiqui coj u 'ij i Kajaw yix chila chicaj.

**I Jesus aj 'anol re i mer  
usuc' i ujer 'atbal tzij**

<sup>17</sup>Mi ch'ob yix mok col in sachu a wach i 'atbal tzij tz'ibtal can rumal i mam Moises ujer; mi tene ile, xak mi tene i qui c'utunic can i ujer ajbil u tzij i Dios. Yin n-in ta aj sachol re ile. Xa in aj 'anol re i usuc' i tzij-le chiwach yix.

<sup>18</sup>Katzij iri: tz'akat c'o i caj, i jyub ta'aj, n-ca sachsax ti u wach i ujer 'atbal tzij, mi ta jubi', mi ta jun tz'ib, mi ta pich' che jun ral tz'ib. Ile cu ch'ij na c'a ca qu'uis ni ronojel u 'anic pacha u ch'obom i Dios chi ca 'ani na. <sup>19</sup>N-ca sachsax taj; rumal-i, 'o u chac qui 'an na pacha i cu bij ronojel i 'atbal tzij. We 'o jun n-xcojon ta che i ral cu jupaj tzij pich' re i 'atbal tzij, xak we xu c'ut 'uri chique i winak queje quiqui 'an ile, ire 'ut xa pich' que'elok chiquiwach conojel i juban pa cu 'at wi tzij i Dios. Xui-ri, we jun xcojon che i mer usuc' i 'atbal tzij, xak xu c'ut 'uri chique i juban chic, ire 'uri lic nim que'el na, pa cu 'at wi tzij i Dios. <sup>20</sup>Lic quin bij chiwe, 'o u chac chix cojon na che ronojel pacha u bim can i Dios; 'o u chac mas 'utz u 'anic chi 'ana ni yix chiquiwach i je tijonel re i 'atbal tzij; xak mas 'utz u 'anic chi 'ana na chiquiwach i aj Fariséo. We n-qui 'an taj, n-quix oc ta pu'ab i Dios.

**I Jesus xu bij chi n-'us taj 'o  
awaywal che i jun chic**

<sup>21</sup>I tom yix i 'atbal tzij bital chique iwatit imam ujer. "Mix camsanic," bital chique, "man pachin jun ca camsanic, ca'at ni tzij 'uri puwi," xbix chique.

<sup>22</sup>Xui-ri, yin quin bij ni usuc' chiwe: pachin jun xa ca pe roywal che jun rachalal, xak ire ca'at ni tzij puwi. Xak pachin jun cu yo'ya i rachalal, ca ya' ni ire chiquiwach i nim laj nuc'bal t'isbal. Xak we 'o jun cu bij mal laj tzij che i

rachalal, chu 'ana cwent 'uri che rib, mok xa ca 'e pa 'a' rumal. <sup>23</sup>Rumal-i, we yet a c'amom li jun a sipon col a ya chuwach i Dios, te'uri we ca c'un pa c'ux chi 'o jun awachalal cu ch'obo 'o a mac che, <sup>24</sup>cha canaj can 'uri a sipon chila chuwach i altar, y jat ru' awachalal. Chi chomaj iwib chiwach. Te'uri chat tzalij chic y cha jacha a sipon chuwach i Dios. <sup>25</sup>We 'o jun u cojom a mac, y craj cat u c'am bi chuwach i 'atbal tzij, chi chomaj iwib chiwach pa be. Queje chi 'ana ile, man ire n-cat u ya ta chuwach i 'atbal tzij. Man i 'atbal tzij cat u jach na piqui'ab i policia; te'uri i policia cat u tz'apij pa cárceel. <sup>26</sup>Katzij iri: n-cat el ta lok, c'a ca toj ni ronojel a mult. (Rumal-i, we' chi chomaj iwib chiwach.)

#### I pixbanic xo'on i Jesus chique i je cachijil quib

<sup>27</sup>I tom yix wach cu bij i 'atbal tzij re i mam Moises: "Ma kajsaj a 'ij ru' jun ixok, we n-awixokil taj," cu bij. <sup>28</sup>Xui-ri, yin quin bij ni usuc' chiwe: we 'o jun lic cu takej jun ixok, man cu rayij u wach, xe'el 'uri pu c'ux xak jun ru' pacha i xmacun ru'. <sup>29</sup>Rumal-i, quin bij i tzij-i chiwe: we yet to' ca takej jun ixok y to' ca rayij u wach, mejor chawesaj a ba'wach y cha c'aka bic' Mas 'utz que'elok we xa are a ba'wach ca sacho, chuwach i ronojel a ch'acul ca 'e pa 'a'. <sup>30</sup>We xak are a 'ab wikabim ca 'anaw chawe cat macunic, cha c'atzij y cha c'aka bic. 'Utz que'elok we xa are a 'ab ca sacho, chuwach i ronojel a ch'acul ca 'e pa 'a'.

<sup>31</sup>Xak i tom yix iri chi ca bixic: "Jun we cu jach can i rixokil, 'o u chac cu tz'ibaj jun wuj, cu ya che i rixokil, re i jachbal quib." ca bixic. <sup>32</sup>Xui-ri, yin quin bij ni usuc' chiwe: jun, we cu jach can i rixokil, i ixok, we n-tu mac u 'anom ru' jun chic achi, n-'us ta xu 'an 'uri i rachijil che. Que'el 'uri xa are u mac i rachijil che, we i ixok xc'uli ru' jun chic achi; i u mac i ixok 'o 'uri chukul i achi chi jachawnak bic. Xak we 'o jun achi

ca c'uli ru' jun ixok chi jachtal bi rumal i rachijil, i achi-le xak ca macun 'uri chuwach i Dios.

#### Ma cuxtaj u bi i Dios puwi a tzij

<sup>33</sup>Xak i tom yix iri chi bital chique iwatit imam ujer: "O u chac ca 'an na pacha a sujum che jun winak, we a cuxtam u bi i Kajwal puwi a tzij-le." (Queje ile tz'ibtal canok.) <sup>34</sup>Xui-ri, yin quin bij ni usuc' chiwe: n-'us taj qui cuxtaj u bi i Dios puwi i tzij che jun winak. Xak mi cuxtaj u bi i caj, man are u q'uujibal i Dios, pa cu 'at wi tzij. <sup>35</sup>Xak mi cuxtaj u bi i ulew, man are pa cu ya wi i rakan. Xak mi cuxtaj u bi i tinimit Jerusalem, man are u tinimit i Dios chi ka nim laj 'Atol Tzij. <sup>36</sup>Xak mi cuxtaj u bi i jolom, man n-quix tiqui ta chu yjibaxic wach ca tzun jun ral 'is re i wi, we 'ek 'o we sak quiwaj che. <sup>37</sup>Xui chi bij "are"; o we n-are taj, chi bij "n-are taj". We 'o mas tzij qui bij puwi ile, xa ru' itzel petnak wi.

#### Jun, we cu 'an jun mal chiwe, mi tzalij u wach che

<sup>38</sup>Xak i tom yix chi i ujer 'atbal tzij cu bij: "We 'o jun u puch'um a ba'wach yet, xak ca puch' ni jun u ba'wach ire 'uri; xak we u bokom jun a wawe, xak ire ca bok ni jun u ware 'uri." Queje ile cu bij i u 'atbal tzij i mam Moises. <sup>39</sup>Xui-ri, yin quin bij ni usuc' chiwe: mi tzalij u wach che, wach cu 'an chiwe. Are i chi 'ana, we 'o jun cat u ch'ay che juperaj a palaj, cha ya i juperaj chic che. <sup>40</sup>We 'o jun ca 'e pa 'atbal tzij, man craj cu maj a camix, cha ya na 'uri che, xak cha ya bi a chaquet che. <sup>41</sup>We 'o jun co'on pen chawe ca c'am bi jun rekan pa jun kilómetro, yet ja ya che c'a pa queb kilómetro. <sup>42</sup>We 'o tak ca tz'onox chawe, cha ya wach i ca tz'onoxic. Y we 'o i ca chi'max chawe, cha ya wach i rajwaxic.

#### C'ax che i na i je aj ch'o'oj chiwij

<sup>43</sup>I tom yix i tzij-i chi ca bixic: "C'ax cha na i c'ax cat nawic," quiqui bij, "xak

<sup>5/29</sup>I mer tzij xu bij i Jesus chique are iri: "We are a ba'wach wikabim co'on chawe cat macunic, chawesaj y cha c'aka bic."

tzel chawila i tzel cat ilawic,” quiqui bij.  
<sup>44</sup>Xui-ri, yin quin bij ni usuc’ chiwe: c’ax che i na i je aj ch’o’oj chiwij; chi tz’onoj i ’utz piquiwi i que tz’onow mal piwi yix; chi ’ana ’utz chique i tzel quix ilawic; chi tz’onoj che i Dios piquiwi ni’pa i quix qui yo’ya, xak piquiwi ni’pa i c’ax que ch’aw chiwe. <sup>45</sup>Queje ile, quix ’el na lic ix rac’al i Kajaw yix chila chicaj. Ire ’ut cu ’an che i ’ij cu tzunsaj piquiwi i je mal, xak jun ru’ pacha cu ’an chique i je ’utz. Xak cu tak li jab piquiwi i je ’utz, xak piquiwi i je mal. <sup>46</sup>Yix ’ut, we xui c’ax que i na ique chi xak c’ax quix qui na yix, n-ta qui ch’ac na ’uri ru’ i Dios. Xak i je mal laj tak aj alcawal queje quiqui ’an ile. <sup>47</sup>Yix, we xui chique iwamig qui ya rutzil qui wach, ¿pa ’utz wi ’uri ile? Xak queje quiqui ’an i winak chi n-queta’am tu wach i Dios. <sup>48</sup>Yix, chom ix ’olok, ronojel ni’pa i qui ’ano, xak jun ru’ pacha cu ’an i Kajaw chi ’o chicaj, chi lic n-ta c’ax che ronojel ni’pa i cu ’ano.

**I tak i ’utz qui ’ano, mi ’ano  
 xa sic’bal que i winak**

**6** <sup>1</sup>We ’o tak i ’utz qui ’ano, cojbal-re u ’ij i Dios, mi ’an ile chiquiwach i winak we xa quiwaj quix quilo. We queje qui ’an ile, n-ta qui ch’ac na ’uri ru’ i Ta chicaj.

<sup>2</sup>Rumal-i, are que i to i niba’ib, ali’al chi ’ana, man n-sic’bal ta que i winak qui ’ano. Xa are sic’bal que i winak quiqui ’an jujun, chi lic je re i Dios quiwil yix, xui-ri, n-katzij taj. Queje quiqui ’an ique ile pa tak molbal’ib, xak pa tak be. Are quiqui ’an tak i ’utz, xa are cacaj ca bix ni ’utz chiquij. Chitape’, xa are ile quiqui ch’aco, chi que ’iltaj cumal i winak. <sup>3</sup>Yix, are que i to i niba’ib, chi ’ana che chi mi jun reta’am wach i ’anom, xak mi ne iwachalal. <sup>4</sup>Ali’al chi ’ana; te’uri i Kajaw yix chi xrilo wach xi ’ano ali’al, cu ya ni ’utz piwi.

**I Jesus xu c’utu wach u tz’onoxic  
 che i Dios caka ’ano**

<sup>5</sup>Yix, are qui tz’onoj che i Dios, mi ’ano pacha quiqui ’an i jujun chi lic

je re i Dios quiwil yix, xui-ri n-katzij taj. Ique, kus quiquilo we je tac’al chiquiwach i winak are quiqui tz’onoj che i Dios. Queje quiqui ’an ile pa tak ja re i molbal’ib, xak i xol tak be, man cacaj ique que ’iltaj na cumal i winak. Chitape’, xa are ile quiqui ch’aco, chi que ’iltaj cumal i winak. <sup>6</sup>Yet, are ca tz’onoj che i Dios, chat oc bi pa ja y cha tz’apij uchija. Te’uri cha tz’onoj che a Kajaw chi ’o chila awu’, xui-ri, n-ca ’iltaj tu wach. Y a Kajaw chi xrilo wach xa ’ano atuquel, cu ya ni ’utz pawi.

<sup>7</sup>Yix, are qui tz’onoj che i Dios, mi bij uq’uial tzij chi to’ tzij, n-tu chac. Queje quiqui ’an ique ile chi n-queta’am tu wach i Dios. Quiqui bij ique chi cu ta i Dios man q’ui i tzij quiqui bij che. <sup>8</sup>Mi ’an yix pacha quiqui ’an ique; i Ta chicaj reta’am wach i rajwaxic chiwe are maja qui tz’onoj che. <sup>9</sup>Rumal-i, queje iri chi tz’onoj che:

Ka Kajaw chicaj, chocsax u ’ij a bi.

<sup>10</sup>Chapetsax a ’atbal tzij, cha ’ana na waral chuwach i jjub ta’aj, xak jun ru’ pacha i ca ’ani chila chicaj.

<sup>11</sup>Cha ya na chake wach i caka tijo, wach i rajwaxic chake.

<sup>12</sup>Cha cuyu ni ka mac, xak jun ru’ pacha ka ’anom yoj, chi ka cuyum ni qui mac ni’pa i je macun-nak chikij.

<sup>13</sup>Ma ya chake coj tzak chupam i mac atzalal, xui-ri choj awesaj pu’ab itzel.

Man yet ’o i ’atbal tzij pa’ab; nim a cho’ab, xak nim a ’ij a chomal.

At queje ile que’e ’ij sak chawij. Amen.

<sup>14</sup>(Queje ile chi tz’onoj che i Dios.) Man yix, we i cuyum chic qui mac i juban chi qui ’anom qui mac chiwe, xak i Kajaw yix chila chicaj xak cu cuy na i mac yix.

<sup>15</sup>Xui-ri, we yix n-qui cuy ti qui mac i juban, xak ire n-cu cuy ta i mac yix.

**I Jesus xu c’utu wach i ro’taxic  
 ka wa’im caka ’ano**

<sup>16</sup>Yix, ’olic quiwo’taj i wa’im qui yabej-re iwib chu tz’onoxic che i Dios. Are qui



'an ile, mi 'an che i palaj lic ca bisonic pacha quiqui 'an i winak chi queb qui palaj. Queje quiqui 'an ique ile, man quiquil i winak chi quiqui tij uyej rumal qui tz'onoxic che i Dios. Chitape', xa are ile quiqui ch'aco chi que 'iltaj cumal i winak.

<sup>17</sup>Xui-ri, yix, are quiwo'taj i wa'im chu tz'onoxic che i Dios, chi ch'aja i palaj, chi xiya i wi, <sup>18</sup>man n-quiquil ti winak wach quix tijin chu 'anic chuwach i Dios. I Kajaw chi n-ca'iltaj tu wach, ire crilo wach quix tijin chu 'anic; cu ya na 'uri i 'utz piwi.

#### Chaka tzucuj ka beyomal chila chicaj

<sup>19</sup>Mi rayij i beyomal waral chuwach i jyub ta'aj, man xa ca poc'aric, ca pusiric, xaq caquel'aj ili'omab chiwe. <sup>20</sup>Are i chi 'ana, chi molo u chi' i beyomal chila chicaj, man i chila, n-ca poc'ar taj, xak n-ca pusir taj, xak n-que oc ti il'om ru' quiqui maj chiwe. <sup>21</sup>Chi c'olo i beyomal chila chicaj, man pa i c'olom wi i beyomal, chila 'uri 'o wi u cubibal i c'ux.

<sup>22</sup>(Chi ta u be i tzij-i:) Rumal i ba'wach, coc i sak che i ch'acul. We 'utz i ba'wach, 'o 'uri i ch'acul pa sak. <sup>23</sup>Xui-ri, we ix potz', 'o 'uri i ch'acul pa ekum. We qui bij yix chi 'o i sak pi c'ux, xui-ri, we i sak chi 'o pi c'ux xa 'ekum, lic 'ek 'uri i 'ekumal-le.

#### N-qui rik ti Dios we xa are qui tzucuj re u wach i jyub ta'aj

<sup>24</sup>Mi jun ca tiqui che, we je 'o queb u patron ca chacun cu'. Que'elok xa jun c'ax cu na'o, y jun tzel crilo. Xa jun, 'utz u 'anic u chac co'on che; y che i jun, n-kas ta co'on cas che. N-quix tiqui ta che, we qui ya iwib chu 'onquil u chac i Dios, xak qui ya iwib chu molic i mer.

<sup>25</sup>Rumal-i, mix c'achir che i c'aslemal, wach i qui tijo, wach i qui tu'u; xak mix c'achir che i 'u', wach i qui cojo, ch'ukbal re iwij. I c'aslemal, 'xataba xui i wa cajwax che? Xak i ch'acul, 'xataba xui i 'u' cajwax che? N-xui taj. <sup>26</sup>Chi ch'obo 'ut wach quiqui 'an i tz'iquin chi que bin pa tew. Ique, n-ti quiqui tico, xak

n-ti quiqui molo, xak n-ti quiqui c'ol pu c'olbal-re. Tupu n-quiqui 'an taj, i Kajaw yix chi 'o chicaj que u tzuku. Y yix lic nim ni i 'ij chiquiwach ique. <sup>27</sup>We to' qui c'achirsaj iwib, n-ta cu chacuj. Mi jun chiwe ca tiqui chu nimarsaxic u najtil rij, tupu lic ca c'achir che.

<sup>28</sup>'Wuchac quix c'achir chu tzucuxic i 'u'? Chi ch'obo 'ut wach quiqui 'an i cotz'ij pa tak 'es. Ique n-que c'achir ta chu ch'aquic qui 'u', xak mi ne u yijbaxic.

<sup>29</sup>Tupu n-quiqui 'an taj, lic chom qui 'u'. Quin bij chiwe, chom ni qui 'u' ique chuwach i u 'u' i nim laj 'atol tzij mam Salomon ujer chi lic beyom. <sup>30</sup>Queje co'on i Dios ile che i cotz'ij pa tak 'es, chi xa queb oxib 'ij 'olic: wo'or c'aslic, y chwek c'atnak chic pa 'a'. We ire cu ya i chom laj u 'u' i ral cu cotz'ij-le, 'xataba n-cu ya ta 'uri iwe yix? Cu ya'o pues. iYix c'o i rajwaxic che u cubibal i c'ux che i Dios! <sup>31</sup>We queje co'on i Dios ile, mix c'achir 'uri; mi bij 'ut, "iWach tak caka tijo? o 'wach tak caka tu'u? o 'wach tak u cojic ka 'u'?" <sup>32</sup>Ni'pa tak ile, are i quiqui tzucuj i to' winak. Péro yix, 'o jun i Kajaw chicaj lic reta'am wach i rajwaxic chiwe. <sup>33</sup>Rumal-i, chi ya iwib che i 'utz laj 'atbal tzij re i Dios; chi ya iwib chu 'onquil wach craj ire; te'uri ire cu ya na chiwe wach tak i rajwaxic chiwe. <sup>34</sup>Mix c'achir tan rumal wach i qui rik na chwek. Katzij, chwek mok 'o ni pen caka riko, xui-ri, mix c'achir tan chu ch'obic wo'or; xui chi ch'obo i re wo'or.

#### Ma 'at tzij chirij jun chic

**7** <sup>1</sup>Mi 'at tzij piquiwi iwachi'il, queje ile, i Dios n-cu 'at ti tzij 'uri piwi yix. <sup>2</sup>Mi 'ano, man we c'ax u 'atic tzij qui 'ano, xak c'ax 'uri u 'atic tzij co'on i Dios piwi yix; ire xak jun u 'onquil co'ono, pacha u 'onquil xi 'an yix. <sup>3</sup>'Wuchac cat c'achiric rumal i ral tz'il ca takej chupam u ba'wach awachi'il, y n-ca na taj 'o jun nim laj 'et chupam a ba'wach yet? <sup>4</sup>'Wuchac 'uri ca bij che awachi'il: "Cha ya a ba'wach chwe, cwesaj i tz'il 'o chupam," cat cha, we 'o jun 'et chupam

a ba'wach yet? <sup>5</sup>Yet, in-katzij ti ca 'ano! Nabe chawesaj ni 'et pa ba'wach yet, te'uri cat tzun bien cawesaj ni tz'il 'o chupam u ba'wach awachi'il.

<sup>6</sup>Mi ya chique i tz'i wach tak i 'o u 'ij, man mokxa i tz'i quiqui c'ak quib chiwij y quix qui raxij. Xak mi ya jun chom laj uwaj chiquiwach i ak, mokxa que oc chu ya'yaxic<sup>8</sup>.

**Dios cu ya ni 'utz chique i rac'al  
chi lic qui tz'onom che**

<sup>7</sup>We 'o rajwaxic chiwe, chi tz'onoj che i Dios y Ire cu ya na chiwe; chi tzucuj, y qui rik na; chi c'ojc'a i porta, y ca jaki na chiwe. <sup>8</sup>Queje ile chi 'ana, man we jun lic cu tz'onoj, ca ya' che; we lic cu tzucuj, ca rik na; we lic cu c'ojc'a i porta, ca jaki na che. <sup>9</sup>Yix chi ix kajawxel, we 'o jun iwac'al cu tz'onoj u wa chiwe, ¿xataba qui ya jun abaj che, pu q'uexel u wa? N-qui ya taj. <sup>10</sup>We xak cu tz'onoj car chiwe, ¿xataba qui ya jun cumatz che, pu q'uexel? Xak n-qui ya taj. <sup>11</sup>Yix, chi to' ix winak, tupu n-qui 'an ti 'utz, xui-ri, lic qui ya ni 'utz chique iwac'al. I Kajaw chicaj, mas 'utz co'on na chuwach ile; lic cu ya ni 'utz chique pachin i que tz'onow che.

<sup>12</sup>Chi 'ana chique i winak pacha i quiwaj yix quiqui 'an na ique chiwe. Are ile are usuc' i 'atbal tzij u tz'ibam can i mam Moises, xak are i usuc' i tzij qui bim can i ajbil u tzij i Dios ujer.

**Chix oc che uchija chi xa pich' u wach**

<sup>13</sup>Je queb i be re i c'aslemal: jun, xa pich' u wach y jun chic, nim u wach. Chix oc yix che i uchibe chi pich' u wach, man i uchibe chi nim u wach, xa pa 'a' ca 'e wi. Lic je q'ui que bin na che i be-le. <sup>14</sup>I uchibe, xak i be, chi coj u c'am bi che i c'aslemal sakil, xa pich' qui wach; ne te q'ui quiqui riko.

**Que iwetamaj na pachin je aj t'oronel,  
rumal wach tak quiqui 'ano**

<sup>15</sup>Chi 'ana cwent chique i que upon iwu' chí quiqui bij je ajbil u tzij i Dios;

pent ne te are. 'Olic xa je pacha mal laj tak utiw chi qui 'anom che quib pacha je chij; lic je 'utz quiwil yix. <sup>16</sup>Que iwetamaj na, je bi chi winakil rumal wach tak i quiqui 'ano. Que iwetamaj na pacha retamaxic u wach i q'uix. Iweta'am chi jun q'uix n-ta úva<sup>b</sup> cu wachij; xak i jun tzum-tzerek n-ti hígo cu wachij. <sup>17</sup>Quiwil na bi chi winakil, man jun 'utz laj che', ni'pa i u wach cu ya'o 'is 'utz; xak jun che' n-'us taj, n-ti u wach 'utz cu ya'o. <sup>18</sup>I jun che' 'utz, n-cu ya ti u wach chi n-'us taj; xak jun che' n-'us taj n-ca tiqui ta chu ya'ic u wach 'utz. <sup>19</sup>Ni'pa i che' chi n-ti u wach 'utz cu ya'o, ca c'atzix na, y ca porox na pa 'a'. <sup>20</sup>Yix 'ut que iwetamaj na pachin i xa je aj t'oronel; que iwetamaj na rumal wach quiqui 'ano.

**Jun, n-rumal ta wach cu bij ru' u  
chi' cu rikbej na re i rocbal chicaj**

<sup>21</sup>Mok 'o jun cu bij na, "Wajwal, Wajwal," cu bij chwe, ire n-coc ta chicaj pa cu 'at wi tzij i Dios we xa rumal ni ile chi cu bij ru' u chi'. Xui ni'pa i qui 'anom pacha craj i Ta chicaj, xui ique que oc ru'. <sup>22</sup>Are cu rik i q'uisbal 'ij, je q'ui na quiqui bij chwe: "Kajwal, Kajwal, choj a to, man are yoj xoj cuxtaw a bi are xka bij u tzij i Dios chique i winak; are yoj xoj cuxtaw a bi are xe kesaj bi itzel tak tew chique i winak; are yoj xoj cuxtaw a bi are xka 'an uq'ual milágro." (Queje ni ile quiqui bij chwe.) <sup>23</sup>Yin quin bij na 'uri chique: "Lic n-weta'am ti wach; ichix el chin wach, yix chi ix aj 'anol mal!" (Queje ile quin bij na chique.)

**I queb ja: jun cubam puwi abaj  
y jun cubam puwi seneb**

<sup>24</sup>Je ni'pa i que taw in tzij-i, we que cojon che, 'o qui no'oj 'uri. Queje pacha jun achi, 'o u no'oj, xu cuba i rachoch puja' abaj. <sup>25</sup>Xo'on panok, xpe i jab nim, lic xnimar i ya, xak xpe i tew, craj cu tzaksaj i ja pulew péro n-xtzak taj man cul puja' abaj. <sup>26</sup>Xui-ri, je ni'pa i que

<sup>8</sup>7.6 I usuc' i jupaj tzij-i are iri: Are qui bij u tzij i Dios chique i winak, chiwila u be pachin craj u tayic.

<sup>b</sup>7.16 I úva ca bixic, xak i hígo, are juban echa' lic 'utz ca tñjawic.

taw in tzij, we n-que cojon ta che, n-ta qui no'oj 'uri. Queje pacha jun achi, n-tu no'oj, xu cuba i rachoch xa puwi i seneb. <sup>27</sup>Xo'on panok, xpe i jab; xnimar i ya; xak xpe i tew chirij i rachoch, y xtzak pulew. iLic xo'on mal!

<sup>28</sup>Are xutzin i Jesus chu bixquil chique, i winak lic xqui bisoj wach i c'utunic xo'ono. <sup>29</sup>Are ca ch'a'at cu', 'alaj 'uri chi lic reta'am usuc' wach i xu bij; n-are ta pacha quiqui 'an i to' je tijonel re i 'atbal tzij.

**I Jesus xutzirsaj jun  
achi 'o yobil lépra che**

**8** <sup>1</sup>Are xkaj li Jesus tzam jyub, je q'ui i winak je teren chirij. <sup>2</sup>Are 'uri xc'un li jun achi, 'o i tzel laj yobil lépra' che. Ire xupon chuwach i Jesus y xuqu'i'ic. Xu bij che:

—Kajwal, we ta cawaj, cawesaj ni itzel c'ax chwe —xu bij.

<sup>3</sup>I Jesus xu chap ru' u 'ab, y xu bij che: —Cwaj. Chat utzirok.

Are xu bij ile che, i achi xutziric. <sup>4</sup>I Jesus xu bij che:

—Chatape', mi jun ma lap wi. Xui-ri, jat, ja c'utu awib che i sacerdoté chi at 'utz chic; cha sujuj a sipon chuwach i Dios pacha u bim can i mam Moises. Queje cha 'ana ile man caquetamaj conojel chi at utzirnak chic, chi ya n-ta chic i ch'ac chawij —xu bij che.

**I Jesus xutzirsaj i u mocom  
jun capitan n-aj Israel taj**

<sup>5</sup>Xo'on chupanok, are xoc i Jesus pa tinimit Capernaum, jun capitan aj Róma xa 'e chu c'ulaxic y xu tz'onoj u tobal che.

<sup>6</sup>—Nim laj winak —xu bij che—, 'o jun in mocom ru' ja, lic iwab. 'O chuwi ch'at, lic siquirnak chic; lic cu tij uyej rumal u c'axc'ol —xu bij che.

<sup>7</sup>I Jesus xu bij che i achi:

—Quin 'e wutzirsaj —xu bij.

<sup>8</sup>—Nim laj winak —xu bij i capitan che—, yet n-ca majaw ta chawe cat oc pa wachoch; n-in ti aj Israel winak.

Xui cha bij panok: iChutzirok! Te'uri in mocom cutzir na. Weta'am 'o pa'ab yet u 'anic ile. <sup>9</sup>Weta'am ile man xak yin in 'o piqui'ab i je waj'atzil; xak je 'o jujun soldádo pin'ab yin. We "iJat!" quin bij che jun chique, ca 'ec; y we "iSa'aj!" quin bij che jun chic, ca petic. We xak quin tak bi wajchac, ire cu 'an na wach i quin bij che. Weta'am chi xak 'o pa'ab yet cawesaj na bi itzel c'ax-le —xu bij i capitan.

<sup>10</sup>Are xu ta i Jesus ile, lic xu bisoj.

—Chitape' —xu bij chique i je teren chirij—, mi tene jun chique i aj Israel winak cul u c'ux chwe pacha o'onom i achi-le. <sup>11</sup>Lic quin bij chiwe, je q'ui i ne te aj Israel winak chi lic qui cubam qui c'ux chwe, que pe pa quel wi i 'ij, que pe pa ca kaj wi i 'ij, que oc na 'uri pa cu 'at wi tzij i Dios; quiqui tij ni 'utz chila junam cu' i mam Abraham, i mam Isaac, i mam Jacob, i catit qui mam i aj Israel winak. <sup>12</sup>Xui-ri, je q'ui i aj Israel winak n-que oc ta chila cu', tupu que ique i q'uujibal-le. Ique-le, xa que ya' na pa 'ekumal; chila que o' wi, lic quiqui kach'ach'ej ni qui waque rumal qui bis —xu bij i Jesus chique i winak.

<sup>13</sup>Are 'uri xu bij che i capitan:

—'Utz cat 'e che awachoch, y ca 'ani na che a mocom pacha a tz'onom; queje ile que'el na rumal u cubal a c'ux chwe —xu bij i Jesus che.

Lic are 'or 'uri xutzir i u mocom i capitan.

**I Jesus xutzirsaj u chuch  
u ji' i ma Pédro**

<sup>14</sup>Xo'on panok, xa 'e i Jesus che i rachoch i ma Pédro. Are xoc paja, xriolo chi iwab u chuch u ji' i ma Pédro; ire cotz'ol chuwi ch'at, 'o 'a' chirij. <sup>15</sup>I Jesus xa 'e u yina u 'ab; are 'uri, xchup i 'a' chirij, xwalijic y xoc chu yijbaxic wach i quiqui tijo.

**C'ax i terejic chirij i Jesus**

<sup>16</sup>Are xoc a'ab, je q'ui i winak xe qui c'am li iwabib chuwach i Jesus. 'O jujun

<sup>18.2</sup> I yobil lépra-le, lic itzel c'ax, n-ta cunbal-re. I 'atbal tzij n-cu ya ta che jun winak ca teheb ru' jun chi 'o i yobil lépra che.

'o itzel tew chique; i Jesus, xa ru' jun tzij xu bij, xe resaj bic; xak xe rutzirsaj ni'pa i iwabib. <sup>17</sup>Are xo'on ire ile, xe'elok pacha u bim can i mam Isafas, chi ajbil u tzij i Dios ujer. Ire u bim canok chi i Jesus "Lic are ire aj 'elsanel bi yobil chake; are ire aj 'elsanel re i c'ax chake." (Queje ile u tz'ibam canok.)

<sup>18</sup>I Jesus, are xrilo je q'ui i winak je 'o chirij chuwach, xu bij chique u tijoxelab: —Jo', choj 'ax ch'akap re i alagun —xu bij.

<sup>19</sup>Are 'uri, 'o jun tijonel re i 'atbal tzij xtejeb ru' i Jesus.

—Mayes —xu bij che—, cwaj quin 'e awu' xa ipa cat 'e wi —xu bij.

<sup>20</sup>I Jesus xu bij che:

—C'ax i terejic chwij. I yac 'o qui jul, xak i tz'iquin 'o qui soc, xui-ri yin chi in Achi aj Chicaj', n-ta pa quin cotz'ba wi in jolom are quin waric —xu bij che.

<sup>21</sup>Te'uri 'o jun chique i je teren chirij xu bij:

—Nim laj winak, c'a te quin terej chawij we xcam ni in kajaw —xu bij.

<sup>22</sup>I Jesus xu bij che:

—Su' wo'or chat terej chwij. Ni'pa i je camnak<sup>k</sup>, cha ya can piqui'ab ique quiqui chajij i que camic —xu bij i Jesus che.

### I Jesus xu 'atij i tew-jab

<sup>23</sup>Te'uri i Jesus xoc pa bárco, je rachi'il u tijoxelab. <sup>24</sup>Xak te'et xpe jun nim laj tew puwi i alagun; i u wi ya, lic quel chicaj, c'a puwi i bárco. I Jesus, lic cwaric. <sup>25</sup>Are 'uri i u tijoxelab xe 'e qui c'astaj.

—Kajwal —xqui bij che—, iChoj a to! iYa coj muktaj pa ya!

<sup>26</sup>I Jesus xu bij chique:

—¿Wuchac lic qui xij iwib? ¿N-ta u cubibal i c'ux chwe? —xu bij.

Are 'uri, xtaq'ui 'anok y xu jek u 'atixic i tew, tak i ya chi quel chicaj; y xe uxlanic, n-que silab ta chic. <sup>27</sup>I rachi'il lic xqui bisoj wach i xo'ono.

—¿Bi chi achial i achi-le chi 'o i milágro pu'ab? —xqui bij chiquiwach—.

Ire, i tew, xak i ya, que cojon che, wach i cu bij —que cha.

### I Jesus xe rutzirsaj queb achiab 'o itzel tew chique

<sup>28</sup>Are ya xe 'ax ch'aka alagun, xe upon pa jyub Gadára. Are 'uri xe 'el li queb achiab pa tak mukbal que i camnak y xe upon ru' i Jesus. I queb-le, 'o itzel tew chique, lic je ch'uj rumal; i winak lic quiqui xij queb chique, rumal-i, mi jun quic'aw che i be-le. <sup>29</sup>Ique-le xqui jek i sic' y xqui bij:

—¿Wach col a tzucuj chi ku' yoj, Jesus, chi at u C'ojol i Dios? ¿Xat c'un na col oj a ya pa c'ax? iMaja na cu rik i 'ij! —xqui bij che.

<sup>30</sup>Nakaj che i lugar-le, je 'o juban uq'uial ak que tijin chi wa'im. <sup>31</sup>Are 'uri i itzel tew queje iri xqui tz'onoj che i Jesus:

—We coj awesaj na chique i achiab, cha ya chake coj oc chique i ak-le —xe cha.

<sup>32</sup>I Jesus xu bij:

—Jix ba chique.

Te'uri i itzel tew xe 'el chique achiab y xe oc chiquipam i ak. Xak te'et conojel i ak xe kaj bi pa'anem, xe 'e tzak pa ya y xe ji'ic.

<sup>33</sup>Are xqui 'an ile, i que chajiw i ak lic xqui bisoj. Xe 'e pa'anem c'a pa tinimit. Are xe upon chila, xe oc chu bixquil ronojel wach i xquilo; xqui bij wach i xa 'ani chique i queb achiab chi 'o itzel tew chique. <sup>34</sup>Te'uri conojel i winak re i tinimit xe 'e chila pa'owi i Jesus. Are xquil u wach, lic xqui tz'onoj che chi ca 'ec; n-cacaj ta ca canaj ire pa qui jyub ique.

### I Jesus xrutzirsaj jun achi sic

**9** <sup>1</sup>Te'uri i Jesus xoc chupam jun bárco y xa 'ax chic ch'aka alagun y xupon chic pu tinimit'. <sup>2</sup>Are 'uri c'amtal bi jun achi ru', siquirnak u ch'acal, 'o chuwa ch'at. Ni'pa i je c'amawnak lok, lic cul qui c'ux che i Jesus. Ire, are xril ile, xu bij che i iwab:

/8.20 I tzij-i "Achi aj Chicaj", cha tzucuj pa Diccionario pa q'uisbal-re i wuj-i. <sup>k</sup>8.22 Are i usuc' i tzij-le, are iri: je camnak piqui c'ux. <sup>l</sup>9.1 I tinimit-le are i Capernaum.

—Wac'al, cha cowij a c'ux; ni'pa i a mac ya cuytajnak chic —xu bij che.

<sup>3</sup>Je 'o jujun aj tijonel re i 'atbal tzij je 'o chila. Ique xqui bij chiquiwach: "I achi-ri cu kajsaj u 'ij i Dios ru' u tzij," xqui bij. <sup>4</sup>I Jesus reta'am chic wach que tijin chu ch'obic, rumal-i xu bij chique: —¿Wuchac n'-us ta qui ch'obo? —xu bij chique—. <sup>5</sup>Ile, n-c'ax tu bixquil chi "Ya xcuytaj a mac." Are i c'ax u bixquil are iri: "Chat walijok, y chat binok," are ile c'ax u 'onquil che jun winak. <sup>6</sup>Xui-ri, yin chi in Achi aj Chicaj, quin 'alijinsaj 'ut chi 'o pin'ab quin cuy ni qui mac i winak waral chuwach i jyub ta'aj —xu bij i Jesus chique. Te'uri xu bij che i achi chi squirnak:

—Chat walijok, cha yaca bi a soc, y jat che awachoch.

<sup>7</sup>I achi sic xwalijic y xa 'e che rachoch. <sup>8</sup>I winak, are xquilo, xe oc 'il che y xqui coj u 'ij i Dios man u yom jun chique chi 'o pu'ab que rutzirsaj i winak, xak cresaj i qui mac.

#### I Jesus xu siq'uuj i ma Matéo

<sup>9</sup>I Jesus xel chila; are ca tijin chi be, xril jun aj tz'onol alcawal, ma Matéo u bi, chi cul pu q'uujibal.

—Chat terej chwij —xu bij i Jesus che. Ire xwalijic y xterej chirij.

<sup>10</sup>I Jesus xe 'e junam cu' u tijoxelab pa rachoch i ma Matéo. Are que tijin chi wa'im, xak xe upon juban chic aj tz'onol alcawal, xak juban chic ajmaquib, que 'e qui tija qui wa cu'. <sup>11</sup>'O jujun aj Fariséo winak xe quilo, y xqui bij chique u tijoxelab i Jesus:

—¿Wuchac i tijonel yix cu tij u wa cu' i mal laj tak aj tz'onol alcawal, xak cu' ajmaquib? —xqui bij.

<sup>12</sup>I Jesus xu ta ile chi xqui bij, y xu bij chique:

—Quin 'an iri man je pacha iwabib. Are i je iwab cajwax jun ajcun chique; i 'utz qui wach n-tu chac ajcun chique. <sup>13</sup>Je i ta u be bien wach usuc' i tzij-i chi i tz'ibtal can chupam u wuj i Dios chi

cu bij: "Are i cwaj yin are quiwil to'bal qui wach i lo'c'anij; n-are ti u sujuxic i chicop chinwach." Queje ile u bim can i Dios —xu bij i Jesus chique—. Yin in c'un-nak in aj siq'uul que i ajmaquib, man quiqui jalwachij qui c'aslema. N-in ta c'un-nak cumal i je 'utz chuwach i Dios —xu bij i Jesus chique.

#### I costúmbre re ujer n-cumaj ta rib ru' u c'utunic i Jesus

<sup>14</sup>Te'uri i u tijoxelab i ma Wan aj kajsanel ya, xe upon ru' i Jesus y xqui bij che:

—Yoj, nic are wi caka 'ano, caka ch'ij jun 'ij queb 'ij chuwach i Dios, n-ta wa caka tijo; xak queje quiqui 'an i aj Fariséo. ¿Wuchac 'uri n-queje ta quiqui 'an i a tijoxelab yet? —xqui bij che.

<sup>15</sup>I Jesus xu bij 'uri i tijojbal tzij-i chique:

—I winak, we que 'e pa nima'ij re jun achi ya ca c'uli'ic, ¿xataba que bisonic? ¿xataba n-quiqui tij ti wa ru'? Quiqui tijo pues, tz'akat ire 'o cu'. Xui-ri, are cu rik i 'ij chi 'elsam chic i achi chiquixol, te'uri quiqui mayij qui nima'ij.

<sup>16</sup>—Mi jun cu c'ojoj jun u 'u' el ru' jun ch'akap c'ojbal c'ac', man i c'ojbal c'ac' xa ca tzajic y cu rakch'ij i c'ul 'el; ru' ile co'on mas nim i rakch'ijnak. <sup>17</sup>Xak queje ile, mi jun cu c'ol i víno c'ac' chupam i 'el tak surum, man we queje quiqui 'an ile, xa ca rakch'ij i surum. Que'elok, co'on mal i surum, y ca sach i víno. Rumal-i, 'o u chac cocsax i víno c'ac' chupam i surum c'ac'; queje ile 'utz que'elic che queb —xu bij i Jesus chique<sup>m</sup>.

#### I Jesus xu walijisaj jun ali camnak, xak xrutzirsaj jun ixok

<sup>18</sup>I Jesus, are ca tijin chu bixquil ile chique, xak te'et xupon jun achi ru', chi nim u patan chiquixol i aj Israel. Xuqui chuwach i Jesus c'a chuwach ulew y xu bij che: —Cuymac, Ta, jun in mi'al c'a te xcamic —co'ono—. Xui-ri, we ta cat

<sup>m</sup> 9.17 I usuc' iri are iri: i c'utunic c'ac' n-cumaj ta rib ru' i c'utunic re ujer.

'e yet wu', xui ca ya a 'ab puwi y ca c'un chic sak chuwach —xu bij.

<sup>19</sup>I Jesus xwalijic y xe 'e ru', junam cu' u tijoxelab. <sup>20</sup>Are que tijin chi be, 'o jun ixok chiquixol i winak chi je teren chirij. I ixok-le, 'ax iwab wi; cablajuj junab 'o chic che chi cril i riq'uil congan; n-ca tani taj. Ire xtejob pan chirij i Jesus y xu yin pan u chi' u 'u', <sup>21</sup>man xu ch'ob pu c'ux: "Quin utzir na we tene quin yin pich' u 'u'," xu bij. <sup>22</sup>Are xu chap u 'u', i Jesus xu na'o; xu pisquillij rib, xu takej pan i ixok y xu bij che:

—Wac'al, cha cowirsaj a c'ux; ya xat utziric rumal u cubibal a c'ux chwe —co'ono. Are 'or 'uri xutzir tan.

<sup>23</sup>Xqui maj chubi qui be, y xe upon ru' rachoch i achi chi nim u patan. Xril i Jesus chi je yij chic i aj bixanel re i mukunic, xak ni'pa i winak 'is que siq'uin che o'ej, <sup>24</sup>xu bij 'uri chique:

—Chix el chi, man i ali n-camnak taj, xa cwaric —xu bij chique.

I winak xa xpe qui tzej che. <sup>25</sup>N-ta co'ono, ire xe resaj bic; te'uri xoc bi pa ja, y xu chap che u 'ab i ali; are 'uri ire xwalijic. <sup>26</sup>Rumal i u 'anom-le, we' xqui ta rason i winak ronojel i jyub-le, chi Jesus u walijsam i ali.

#### I Jesus xe rutzirsaj je queb mawach

<sup>27</sup>Are xel i Jesus chila, je 'o queb mawach xe terej chirij; xe oc chi sic' che. —iNim laj winak, yet at umuk uxiquin i mam David, chawila to'bal ka wach! —xqui bij.

<sup>28</sup>Are xoc i Jesus ru' ja, xak i mawach xe tejob pan ru'. Are 'uri xu bij chique:

—¿Cul i c'ux chwe chi quin tiqui na che ile? —co'ono.

—Katzij cat tiqui'ic, nim laj winak —xe cha.

<sup>29</sup>Te'uri i Jesus xu yin i qui ba'wach, y xu bij chique,

—We qui na pi c'ux chi quix wutzirsaj, queje ca 'an ni ile chiwe —xu bij chique.

<sup>30</sup>Te'uri i qui ba'wach xutzir na. I Jesus lic xu bij chique:

—Chi 'ana cwent, mi lap iri chique i winak, mi xa ta jubí' —co'ono.

<sup>31</sup>Xui-ri, are xe 'el bic, xqui jek u bixquil chique conojel i winak re i jyub-le.

#### I Jesus xruzirsaj jun mem

<sup>32</sup>Are xe 'e ique, xe c'un chal juban winak, cuc'am li jun achi mem. Memernak na rumal itzel tew 'o che. <sup>33</sup>I Jesus xresaj bi itzel tew che, i achi juntir xu jek ch'awic. I winak lic xqui bisoj rumal. Xqui bij:

—Lic n-kilom ta pacha ile, mi tene ronojel i jyub Israel —xe cha.

<sup>34</sup>Xui-ri, i aj Fariséo xqui bij:

—I achi-le cresaj i itzel tew chique i winak xa rumal u cho'ab itzel 'o ru'; i cho'ab 'o ru'-le, are i caj'atzil itzel tew yawnak che —xe cha.

#### I Jesus c'ax que u na i winak chi n-ta ca uc'aw u tzam chique

<sup>35</sup>I Jesus xe u solij ronojel tak i tinimit, ronojel tak i aldéa. 'Is xoc pa tak molbal'ib que i aj Israel winak, xa 'e u tijojbej que i winak chila; xa 'e u paxsaj i 'utz laj tzij chique i winak, xu bij chi petnak chic i u 'atbal tzij i Dios chique. Xak xe rutzirsaj bi chi c'axil, bi chi yobil, 'o chique. <sup>36</sup>Are xe ril i winak, lic c'ax xu na pu c'ux, man que c'achiric, lic n-ta jun que towic; xe rilo pacha juban chij, n-ta que uc'aw u tzam chique. <sup>37</sup>Are 'uri xu bij chique u tijoxelab:

—Lic 'o i jach'ic craj; xui-ri, i ajchac ne te q'ui. <sup>38</sup>Rumal-i, chi tz'onoj che i Rajaw i chac chi que u tak bi mas mocom pa jach' —xu bij chique.

#### I cablajuj apostelab

**10** <sup>1</sup>Te'uri i Jesus xe u siq'uij i cablajuj tijoxelab ru' y xu ya piqui'ab que tiqui chi relsaxic itzel laj tak tew, xak que tiqui chi rutzirsaxic bi chi c'axil, bi chi yobil.

<sup>2</sup>Are i qui bi i cablajuj tijoxelab<sup>a</sup> are iri: nabe, are i ma Simon chi xak quiqui

<sup>a</sup> 10.2 "Apostelab" ca bix chique, chi que'elok "je u takon" pa ka ch'awbal yoj.

bij “ma Pédro” che; te’uri i u cha’, u bi ma Andres; te’uri, je queb u c’ojol i mam Zebedéo: i ma Jacóbo, chilam i u cha’ chi ma Wan; <sup>3</sup>te’uri i ma Felípe, xak i ma Bartolome; te’uri i ma Tomas, xak i ma Matéo chi aj tz’onol alcawal; te’uri i ma Jacóbo chi u c’ojol i mam Alféo; i ma Lebéo chi xak ma Tadéo quiqui bij che; <sup>4</sup>te’uri i jun chic ma Simon, are i jun chi re i partído cananísta; te’uri i ma Júdas Iscarióte chi xo’on panok xc’ayiw i Jesus.

**I Jesus xe u tak bi i rapostelab  
chu bixquil u tzij i Dios**

<sup>5</sup>I cablajuj-le, Jesus xe u tak bic, y xu bij bi chique:

—Are que i solij i tinimit, mix ’e pa i je jekel wi i ne te aj Israel winak; xak mix oc pa tak tinimit re i Samária. <sup>6</sup>Xui cu’ i aj Israel winak quix ’e wi; je pacha juban chij, xa je sachnak. <sup>7</sup>Are quix ’ec, chi paxsaj u tzijol i ’atbal tzij aj chicaj; chi bij chique chi ya ca jekanic. <sup>8</sup>Che iwutzirsaj iwabib; che i walisaj i je camnak; chiwesaj i c’ax chique ni’pa ’o i yobil lépra chique; xak che iwesaj bi itzel tew chique i winak. Queje ile chi ’ana na. Lic sipam chiwe ni’pa quix tiqui yix chu ’onquil, ni lo’om taj. Xak mi tz’onoj i rajil, we xi ’an i pawor chique i winak.

<sup>9</sup>Are quix ’ec, n-ti mer nimak rajil chi c’am bic, xak mi ne ch’utik rajil. <sup>10</sup>Xak mi c’am bi i teb, xak mi ne jun chic i camix, xak mi ne jumolaj chic i xajab, xak mi ne i ch’amiy. Mi c’am bi tak ile, man jun ajchac ’o re che, wach i cajwax che; i winak quiqui ya na chiwe wach rajwaxic chiwe. <sup>11</sup>Yix, are quix upon che jun tinimit, are quix upon che jun aldéa, chi tzucuj jun winak chi quix u c’ulaj che rachoch; chix jekel chila, c’a te qui canaj canok are quix el chila. <sup>12</sup>Are quix oc ru’ ja, chi tz’onoj che i Dios cu ya i uxlambal qui c’ux. <sup>13</sup>I winak chi rajaw ja, we ’utz i c’ulaxic xqui ’an chiwe, ca q’uiji i ’utz-le piquiwi. We n-’us ta i c’ulaxic xqui ’ano, mi tz’onoj i ’utz re i

Dios piquiwi are quix el ru’ ja. <sup>14</sup>Ique-le, we n-xix qui c’ulaj taj, xak n-cacaj ti u tayic i tzij chi qui bij chique, chix el ’uri chila. Are quix el che i ja-le, o we xak che i tinimit-le, chi pu can i ulew che iwakan (c’utbal-re chique chi c’o qui mac chiquij). <sup>15</sup>Katzij i quin bij chiwe: pa q’uisbal ’ij, are ca ’at tzij piquiwi tak i tinimit, mas nim na i tojpen ca pe piquiwi i tinimit-le chuwach ile chi xpe piquiwi i queb tinimit Sodóma y Gomórra ujer°.

**Ca pe ch’o’oj chiquij i je re i Cristo**

<sup>16</sup>Chitape’, yin quix in tak bi chiquixol i je aj ch’o’oj chiwij; ix pacha chij ’uri chiquixol i utiw. Chi ’ana cwent che iwib, pacha co’on jun cumatz, n-cu ya ta rib che i jun. Xui-ri, chi ’ana che iwib pacha quiqui ’an i palomax, lic n-ta jun mal quiqui ’an che jun chic. <sup>17</sup>Chi ’ana cwent, man ’o ni winak quix qui jach na piqui’ab i ’atbal tzij, xak quiqui jic i lo’xic pa tak molbal’ib. <sup>18</sup>Xak quix qui c’am bi chiquiwach i gobernador, xak chiquiwach i nimak tak ’atol tzij xa wumal yin. Xui-ri, queje ile quin i lap na chiquiwach ique, xak chiquiwach i ne te aj Israel. <sup>19</sup>Are quix jach na piqui’ab i ’atbal tzij, mix c’achir chu ch’obic wach i qui bij chique, xak mix c’achir chu ch’obic wach u bixquil qui bij na. Are cu rik i ’or-le, Dios cu bij na chiwe wach i qui bij chiquiwach. <sup>20</sup>Man yix, are quix ch’awic, n-are ti yix quix ch’awic, are u Tewal i Ta chicaj ca ch’aw chique.

<sup>21</sup>Quiwil na, ’o i winak que qui jach ni catz qui cha’ piqui’ab i je aj ch’o’oj chiquij, camsal na que; xak je ’o ni kajawxel queje quiqui ’an cu’ i cac’al. Xak queje i ac’alab, quiqui ’an che quib je aj ch’o’oj chiquij i qui kajaw i qui chuch, que qui jach na chique i que camawic. <sup>22</sup>Conojel i winak tzel quix quil na xa wumal yin: xui-ri pachin i cu ch’ijo c’a pa q’uisbal ie, que ’elsax na ’uri pa c’ax. <sup>23</sup>We ix ’o che jun tinimit y quiqui ’an ch’o’oj chiwij, chix ’anmajok; jix chic che jun tinimit.

° 10.15 I queb tzij, “Sodóma” y “Gomórra” ’o pa Dicciónario pa q’uisbal re i wuj-i.



Katzij i quin bij chiwe, i Achi aj Chicaj<sup>p</sup> ca c'un na, are maja quix tzalij li che i qui solixic ronojel tak i tinimit pa Israel.

<sup>24</sup>(Qui tij ni c'ax cumal, pacha quiqui 'an chwe yin.) Jun tijoxel, na nim ti u 'ij chuwach u 'ij u mayes; xak queje jun ajchac, na nim ti u 'ij chuwach u 'ij u patron. <sup>25</sup>Jun tijoxel, ca majaw che chi ca quicot ru', we que'el na che pacha o'onom u tijonel; xak queje jun ajchac, ca majaw che chi ca quicot ru' we que'el na che pacha o'onom u patron. Jun rajaw ja, we quiqui bij ni winak chi ire itzel, xak jun 'uri quiqui bij na ique chiquij i ralc'wal. (We queje xqui bij ile chwe yin, xak queje quiqui bij na 'uri chiwe yix.)

**Mi xij iwib chique i winak;  
are, chi xija iwib che i Dios**

<sup>26</sup>Rumal-i, mi xij iwib chique i winak, wach quiqui 'an chiwe. (Chi 'ana co che i c'ux chu bixquil in tzij chique.) Ni'pa i n-'alijinsam taj, ca 'alijinsax na; ni'pa i uwam u wach, ca 'iltaj ni u wach. <sup>27</sup>Ni'pa i quin bij chiwe cha'ab, chi paxsaj yix pa 'ij; ni'pa i quin bij chiwe ali'al, chix siq'uin chu bixquil chique i winak puwi tak ja. <sup>28</sup>Mi xij iwib chique i que tiqiu chu camsaxic i ch'acul, xui-ri i iwanima n-que tiqiu ta che. Are, chi xija iwib che i Jun, chi 'o pu'ab cu sachsaj u wach i ch'acul xak i iwanima pa 'a'. (Xui i Dios 'o pu'ab cu 'an ile.)

<sup>29</sup>Yix, i Dios lic quix rilo. Iweta'am chi are qui lo' queb tz'iquin xa jun centávo i cajil. N-ta kas cajil chiwach yix. Xui-ri, i Dios lic que u rilo; mi jun chique ca tzak li pulew we i Kajaw yix chicaj n-cu ya ta che. <sup>30</sup>Xak queje yix, i Dios lic quix rilo. Ire xak reta'am neri ni'pa i wi 'o che i jolom chi jujunal. <sup>31</sup>Mi xij iwib 'uri; yix 'ut, mas 'o ni 'ij chiquiwach uq'ual tz'iquin.

**'O u chac caka bij na chique  
i winak we oj re i Cristo**

<sup>32</sup>Conojel ni'pa i quiqui bij chiquiwach i winak chi ique qui yom qui wach wu',

xak queje yin 'uri, quin bij na che in Kajaw chicaj chi je we yin. <sup>33</sup>Xak ni'pa i quiqui bij chiquiwach i winak chi n-qui yom ti qui wach wu', xak queje yin 'uri, quin bij na che in Kajaw chicaj chi ne te we yin.

**I u c'utic i sak laj tzij xa  
cu petsaj i ch'o'oj**

<sup>34</sup>Mi ch'ob yix chi in c'un-nak xa que in chomarsaj ni winak chuwach i jyub ta'aj. N-rumal ta ile in c'un-nak; in c'un-nak chu petsaxic ch'o'oj chiquixol i winak<sup>q</sup>. <sup>35</sup>Rumal in c'unbal, quiqui 'an ni ch'o'oj jun achi ru' u kajaw, jun ali ru' u chuch, jun alibaxel ru' u chuch ralib. <sup>36</sup>Que'elok 'o ni jujun chique i winak je are quixokil calc'wal je aj ch'o'oj chic chiquij. <sup>37</sup>Xui-ri, jun chi we-yin, 'o u chac c'ax chin u na ni yin chiquiwach u chuch u kajaw. Xak 'o u chac c'ax chin u na ni yin chiquiwach u mi'al u c'ojol. We n-queje ta co'on ire ile, lic n-ca majaw ta che 'uri we we-yin. <sup>38</sup>Jun we-yin 'o u chac ca terej chwij, tupu ca cam na rumal. Pachin n-craj ti u 'anic ile, n-ca majaw ta 'uri che chi we-yin. <sup>39</sup>Pachin jun xa c'ax cu na u c'aslemal re waral, xa cu sach 'uri u c'aslemal chi sakil. Xui-ri, we 'o jun ca sachsax nu wach u c'aslemal xa wumal yin, ca ya' 'uri u c'aslemal sakil.

**Pachin quiqui rik ni qui  
sipon chuwach i Dios**

<sup>40</sup>Pachin jun quix u c'ulaj ru', que'el na 'uri pacha yin quin u c'ulaj na ru'. Xak pachin i quin u c'ulaj na yin ru', que'el na 'uri chi cu c'ulaj ni Jun chi in takawnak lok. <sup>41</sup>Iweta'am chi jun ajbil u tzij i Dios, co'on panok ca ya' ni sipon che rumal i Dios. Xak pachin i cu c'ulaj jun ajbil u tzij i Dios ru', we xa rumal u takon i Dios, ire ca ya' ni sipon 'uri che xak jun ru' pacha i ca ya' che i ajbil u tzij i Dios. Xak pachin jun cu c'ulaj jun 'utz laj winak ru', xa rumal 'utz i jun chuwach i Dios, xak ire 'uri i Dios cu ya

<sup>p</sup> 10.23 I Achi aj Chicaj are i Jesus mismo. Are ire are i Tolque i winak chi coy'em na, xui-ri je q'ui i winak n-queta'am taj. <sup>q</sup> 10.34 Are ca paxsax i sak laj tzij, ca pe 'uri i ch'o'oj chiquixol i winak.



ni 'utz che pacha i cu ya che i winak jun chi lic 'utz. <sup>42</sup>Pachin jun cu ya jubi' u ya' che jun ral in tijoxel yin, we xu ya na che xa rumal teren na chwij, katzij 'uri xak ca ya' ni 'utz puwi rumal i Dios —xu bij i Jesus chique.

**Wach i xu bij i Jesus chique  
i u tijoxelab i ma Wan**

**11** <sup>1</sup>I Jesus queje ile xutzin chu bixquil chique i cablajuj u tijoxelab wach quiqui 'ano. Te'uri xa 'e pa tak tinimit re i jyub-le, xa 'e chi qui tijoxic i winak chu bixquil u tzij i Dios chique.

<sup>2</sup>Are ca tijin i Jesus che u chac-le, are 'uri i ma Wan, aj kajsanel ya, tz'apim chic pa cárcel. Ire, are xu ta rason wach ca tijin i Crísto chu 'anic, xe u tak li jujun chique u tijoxelab ru'. <sup>3</sup>Are xe upon ru' i Jesus, xqui tz'onoj che:

—¿Mok yet i Tolke chi u bim i ma Wan chi cat c'unic? ¿O xa cakoy'ej chic jun chic? —xqui bij che.

<sup>4</sup>I Jesus xu bij chique:  
—Chix tzalij chic ru' i ma Wan; chi bij che wach i xi ta, wach i xiwilo chi quin tijin yin chu 'onquil. <sup>5</sup>Chi bij che chi i mawach que tzun chic; xak i je sic, que binic; xak i iwabib chi 'o itzel yobil lépra chique, que utziric; xak i je tac, que tanic; xak i cammak que walijisaxic; xak i niba'ib qui tom i 'utz laj tzij re i quelbal pa c'ax. <sup>6</sup>Xak chi bij che chi 'utz re ire pachin n-cu sach tu cubibal u c'ux chwe —xu bij i Jesus chique u tijoxelab i ma Wan.

**I Jesus xu bij chique i winak  
wach u patan i ma Wan**

<sup>7</sup>Are xe 'e ique, i Jesus xu jek u bixquil chique i winak wach o'onom i ma Wan.

—Yix, are xix 'e che i jyub tz'inilic chu tayquil i ma Wan, ¿wach xiwoy'ej rilic? ¿Xataba xa xix 'e chi rilic jun 'es ca silab rumal i tew? N-are taj. <sup>8</sup>¿Wach 'u i xix 'e chi rilic? ¿Xataba xix 'e chi rilic jun achi, chom u wikic u 'anom che rib? Xak n-are taj. Ni'pa i 'o qui 'u' chom pakalic, ne te

'o pa ta'aj tz'inilic, xa je jekel pa rachoch i 'atol tzij. <sup>9</sup>¿Wach 'u xix 'e chi rilic?

¿Jun ajbil u tzij i Dios? Katzij, are. I jun chi xiwilo-le, lic nim ni u 'ij chiquiwach i je ajbil u tzij i Dios. <sup>10</sup>Man i ma Wan are i jun chi u bim can i Dios chi cu tak na lok. I Dios u bim can chupam u wuj:  
Yin nabe quin tak nubi jun ajbil in tzij chawach yet, man cu yijba ni a be chawach.

(Queje ile u bim can i Dios chupam u wuj.)

<sup>11</sup>Katzij i quin bij chiwe: i ma Wan aj kajsanel ya, nim ni u 'ij ire chiquiwach conojel i winak, c'a chu xebal 'ij sak. Xui-ri, wo'or conojel ni'pa i que oc na pa 'atbal tzij re i Dios, mas nim ni qui 'ij ique chuwach ire.

<sup>12</sup>'Atbal tzij re i Dios, je q'ui quiqui 'an ch'o'oj chirij. Queje qui 'anom li ile c'a are xu jek u chac i ma Wan, c'a are 'o wi wo'or. Lic quiqui 'at qui pen chu 'atixic. <sup>13</sup>Queje ile quiqui 'ano, man conojel i ajbil u tzij i Dios ujer, xak i 'atbal tzij re i mam Moises 'is xqui bij chi ca c'un ni u 'atbal tzij i Dios. Queje qui bim ile conojel, xak queje xu bij i ma Wan are xc'un ire. <sup>14</sup>Y we quiwaj quiwetamaj i sak laj tzij, i ma Wan are i mam Elías chi xqui bij ique ca c'un na. <sup>15</sup>We yix 'o i xiquin chu tayic, chi ta u be iri.

<sup>16</sup>I winak wo'or, ¿wach nawi que in junamsaj ru'? Xa je pacha ac'alab je cul xol tak be; jutzobaj que siq'uin chique cachi'il: "Yix lic n-ta 'o quiwaj," quiqui bij. <sup>17</sup>"Yoj xka xut'ij i su' chiwe, péro n-xiwaj ta xix xajawic. Xak xka bixaj jun bix re i bisonbal, péro n-xix o' taj," quiqui bij. <sup>18</sup>Queje que tijin i winak chu 'anic wo'or; n-ta 'o cacaj, man xc'un i ma Wan chi n-ta kas xu tijo, xak n-ta víno xu tijo, y qui bij yix xa 'o itzel tew ru'. <sup>19</sup>Are xin c'un yin chi in Achi aj Chicaj, 'is ronojel quin tijo y quin tu'u, xui-ri qui bij yix chi lic in aj numel, xak in aj 'abarel, qui bij yix. Xak qui coj in mac chi yin in cachi'il i ajmaquib, xak i mal laj tak aj tz'onol alcawal. Xui-ri, we te xi ta u be wach xo'on i ma Wan, xak wach

i quin 'an yin, quiwetamaj 'uri chi Dios lic 'o u no'oj.

**I tinimit chi n-xqui coj ti Jesus,  
nim ni tojpen ca pe piquiwi**

<sup>20</sup>Ni'pa i tinimit pa o'onom wi uq'ual milágro i Jesus, i winak chila lic n-xqui jalwachij ti qui c'aslemal. Rumal-i, xoc ire che i qui yajic. Xu bij:

<sup>21</sup>—¡To' i wach yix, ix aj tinimit Corazin! To' i wach yix, ix aj tinimit Betsáida. Nic are wi qui coj qui mac i queb tinimit Tíro y Sidon man n-ta Dios cu' qui bij yix. Xui-ri, we te in 'anom uq'ual milágro chila pacha in 'anom iwu' yix, ique 'uri ya qui jalwachim tene chic-i qui c'aslemal. Xak que bison tene-ri rumal i qui mac'. <sup>22</sup>Xui-ri yix, are ca c'un i q'uisbal 'ij, nim ni tojpen ca pe piwi yix chuwach i tojpen chi ca pe piquiwi ique chi je aj Tíro, je aj Sidon. <sup>23</sup>Xak yix, chi ix aj tinimit Capernaum, qui ch'ob yix lic ix 'utz, ya mer quix oc chila chicaj, qui bij yix. Xui-ri, ya mer quix kaj pa 'a'. Man i uq'ual milágro 'antal chiwach yix, we tene 'antal ile chiquiwach i aj Sodóma ujer, ique xqui jalwachij tene qui c'aslemal-i; i qui tinimit-le c'a 'o tene-ri wo'or. <sup>24</sup>Xui-ri yix, are ca c'un i q'uisbal 'ij, nim ni tojpen ca pe piwi, chuwach i tojpen chi ca pe piquiwi ique chi je aj Sodóma —xu bij chique.

**“Chix pet wu'; 'o iwuxlambal”  
xu bij i Jesus**

<sup>25</sup>Are 'uri i Jesus xu coj u 'ij i Dios; xu bij che:

—Quin tioxij chawe Ta, chi at rajaw i caj ulew. Quin tioxij chawe, man a yom chique i n-ti qui 'ij chi quiqui ta u be wach a ch'obom yet. Xui-ri, awuwam u wach chique i 'o qui no'oj, chique i nimak qui nojbal. <sup>26</sup>Katzij, Ta, queje a 'anom ile man queje ile cawaj yet —xu bij che.

<sup>27</sup>Te'uri xu bij chique i winak:

—Ronojel ni'pa i 'olic, in Kajaw u yom pin'ab yin. Mi jun reta'am wach

in patan yin chi in u C'ojol i Dios, xui i Ta chicaj reta'am. Xak mi jun reta'am u wach i Dios, xui yin, chi in u C'ojol weta'am u wach; xak ni'pa i winak chi in 'alijinsam chique, ique 'ut xak queta'am u wach. <sup>28</sup>Chix pet na wu' yin, iwonojel yix chi ix cosnak na, iwonojel yix chi 'o iwekan; yin quin ya i uxlanem chiwe. <sup>29</sup>Chi ya iwib che in yucu chi quin coj chiwe; chix naw na chwe yin, man yin nim in c'ux, xak 'utz in c'ux chiwe. Qui rik ni uxlabal i c'ux 'uri. <sup>30</sup>I yucu chi quin coj yin, n-c'ax taj quix bin ru', xak iwekan quin ya'o, n-a' taj. (Queje ile xu bij i Jesus chique.)

**I u tijoxelab i Jesus xqui ch'up  
u wach i trígo pa uxlabal 'ij**

**12** <sup>1</sup>Xo'on chupan jubi', pa uxlabal 'ij, i Jesus ca bin cu' u tijoxelab pa ticon re i trígo. I u tijoxelab, xpe numic chique; xe oc chu ch'upic u wach i trígo; xe oc chu poch'ic, y xqui tijo. <sup>2</sup>I aj Fariséo winak, are xquil ile, xqui bij che i Jesus:

—Chawilape', i a tijoxelab, n-'us taj que chacun wo'or pa uxlabal 'ij. I 'atbal tzij tz'ibtal can rumal i mam Moises n-cu ya ta chique quiqui mol cosech wo'or —xe cha.

<sup>3</sup>—¿Katzij nawi? —xu bij i Jesus—.

¿Xataba n-iwilom ti yix chupam u wuj i Dios wach xu 'an i mam David ujer?

<sup>4</sup>Ire, cu' i rachi'il are xpe numic chique, xoc pa rachoch i Dios y xu tij i lo'laj caxlanwa, chi yatal chuwach i Dios. I caxlanwa-le, xui yatal chique i sacerdoté quiqui tijo; n-yatal ta chique i to' winak quiqui tijo —xu bij i Jesus chique.

<sup>5</sup>¿Xataba xak ni tom ti yix wach i tz'ibtal can chupam i 'atbal tzij re i mam Moises? Cu bij chi 'o u chac que chacun i sacerdoté pa rachoch i Dios pa uxlabal 'ij. N-mac ta ile, tupu n-que uxlan taj. <sup>6</sup>Bay, chi 'o wi Jun' chiwach yix chi nim ni u 'ij chuwach i rachoch i Dios. <sup>7</sup>Yix n-qui ta tu be wach u bim i Dios chupam u wuj. Xu bij iri: “Cwaj

<sup>r</sup> 11.21 I mer tzij xu bij are iri: qui 'alijinsam tene-ri ru' u cojic qui 'u' re i bis, xak u cojic i chaj chiquij.

<sup>s</sup> 12.6 I Jun-le are i Jesus mísmo.

yin 'o ni c'axnabal i c'ux; n-are ti to' u sujuxic chicop chinwach." (Queje ile tz'ibtal canok.) We tene qui ta u be ile, n-qui coj ta 'uri qui mac i winak chi n-ta jun qui mac. (In tijoxelab-le n-ti qui mac que tijin chu 'anic.)<sup>8</sup> Yin, chi in Achi aj Chicaj xak in 'o puwi i uxlambal 'ij —xu bij i Jesus chique.

**I Jesus xrutzirsaj u 'ab jun  
achi pa uxlambal 'ij**

<sup>9</sup>Te'uri i Jesus xel pa ticon, xa 'e pa molbal quib i aj Israel. Are 'o chila, xril jun achi lic chakijnak u 'ab. <sup>10</sup>Chila xak je 'o juban achiab, quiqui tzucuj u mac i Jesus; xe oc 'uri chu c'amic u pam.

—¿'Utz nawi cutzirsax jun iwab pa uxlambal 'ij? —xqui bij che.

<sup>11</sup>I Jesus xu bij chique:

—Yix, we 'o jun i chij, we ca tzak chupam jun siwan che i uxlambal 'ij, ¿xataba n-quiwesaj ta lok, we pa uxlambal 'ij? Quiwesaj pues. <sup>12</sup>¿Xataba jun achi n-tu 'ij chuwach jun chij? Jun achi mas 'o u 'ij pues. Rumal-i, yatal 'uri chake caka 'an i 'utz che jun winak pa uxlambal 'ij —xu bij chique.

<sup>13</sup>Te'uri xu bij che i achi:

—Cha suc'ba i a 'ab —co'on che.

Are 'uri i achi xu ji pan u 'ab, y xutziric; xcanajic pacha u 'anom i jun chi 'utz. <sup>14</sup>Te'uri i aj Fariséo winak xe 'ec; xe oc 'uri chu ch'obic chiquiwach wach u camsaxic i Jesus quiqui 'ano.

**Wach xo'on i Jesus xe'elok  
pacha u bim i Dios ujer**

<sup>15-16</sup>I Jesus, are xu ta wach cacaj quiqui 'an che, xel chila; y je q'ui i winak xe terej bi chirij. I Jesus 'is xe u cunaj iwabib, xui-ri, xu bij chique chi n-qui qui bij taj pachin ire. <sup>17</sup>Queje ile xe'elok xak jun ru' pacha u bim can i Dios chupam i wuj tz'ibtal can rumal i mam Isafás. Xu bij:

<sup>18</sup>Are iri are i wajchac chi in chom na; ire lic c'ax quin na'o, lic quin quicot rumal.

Quin tak bi in Tewal puwi ire, y que u bij chique conojel i tinimit chi 'o ni tobal-que chuwach i tojpen chi ca pe na.

<sup>19</sup>Ire n-craj ta quiqui chap quib chi tzij, xak n-ca siq'uin taj; xak n-ca taq'ui ta pa tak be, cu 'anbej re nimak tak u bixquil chique i winak.

<sup>20</sup>Ire n-co'on ta c'ax che jun chi n-tu cho'ab:

we 'o jun winak pacha jun ajij cotquic, ire n-cu q'uis ti u patz'ic; xak we 'o jun winak pacha jun cantil cu rayij ca chupic, ire n-cu q'uis ti u chupic.

Queje co'on ire ile, c'a ca pe ni 'utz suc'ulic chuwach i jyub ta'aj.

<sup>21</sup>I ronojel tak i tinimit, quiqui cuba ni qui c'ux che ire, chi rumal ire que 'el ni ique pa c'ax.

(Queje ile u tzij i Dios chi u tz'ibam can i mam Isafás.)

**Xqui bij i aj Fariséo chi u cho'ab  
i Jesus xa ru' itzel petnak wi**

<sup>22</sup>Te'uri 'o jun achi mawach, c'amtal bi chuwach i Jesus. Ire xak mem, man 'o jun itzel tew che. I Jesus xu rutzirsaj, te'uri i achi chi mawach xtzunic, xak xch'awic. <sup>23</sup>Conojel i winak lic xqui bisoj che, y xqui bij:

—¿Mokxa are i Tolke chi koy'em? —xe cha.

<sup>24</sup>Xui-ri, i je aj Fariséo are xqui ta, xqui bij:

—N-are taj. I achi-le, i cho'ab chi 'o ru' xa ru' itzel ca pe wi. Are i rumal 'uri ca tiqui chi relsaxic bi itzel tew. I cho'ab chi 'o ru', xa ru' i Beelzebu ca pe wi, chi 'o piquiwi itzel tak tew —xqui bij.

<sup>25</sup>I Jesus reta'am wach quiqui ch'obo, y xu bij jun tijojbal tzij chique, c'utbal-re chi n-katzij taj wach que tijin chu bixquil. Xu bij:

—I 'atbal tzij re jun tinimit, we quiqui 'an tak tzobajil che quib man quiqui 'anbej ch'o'oj chiquiwach, xa quiqui sach

<sup>1</sup>12.23 I tzij chi xqui bij waral are "umuk uxiquin can i mam David"; are xqui bij ile, xe'elok "are i Tolke."

qui wach 'uri. Xak queje jun tinimit, xak queje i je alal; we n-junam ti qui wach, we quiqui jach quib chiquiwach, n-que najtin ta 'uri. <sup>26</sup>Xak queje que'el ile che i Satanás, man we 'o jujun itzel quiqui 'an ch'o'oj chiquiwach je itzel, n-que najtin ta 'uri. <sup>27</sup>Qui bij yix chi ru' u cho'ab i Beelzebu xwesaj bi itzel tew. Bay, xak i tijoxelab yix xak caquesaj bi itzel tew chique i winak; épachin yawnak i qui cho'ab ique 'ut? Ile quiqui 'an i tijoxelab yix; ca 'alijin 'uri chiwe chi n-usuc' taj wach i xi bij. <sup>28</sup>Xui-ri, yin que wesaj bi itzel tak tew rumal u Tewal i Dios chi 'o wu'. Ile 'ut c'utbal-re chiwe chi i 'atbal tzij re i Dios ya 'o chic chi.

<sup>29</sup>Qui bij yix chi ru' ni u cho'ab itzel, xwesaj bi itzel tew-le. Xui-ri, mi jun ca tiqui che oquic pa cu 'at wi tzij jun (pacha itzel), chi relsaxic wach i 'o pu'ab, we maja u ximom i jun-le. We u ximom chic, te'uri ca tiqui chi relsaxic wach i 'o pu'ab —xu bij chique. Xak xu bij:

<sup>30</sup>—Pachin n-cu ya tu wach wu', ire aj ch'o'oj 'uri chwij. Xak pachin jun n-quin u to ta che i molonic, ire xa cu quichersaj bic.

<sup>31</sup>Rumal-i quin bij chiwe, chi 'ana cwent xak manal mi bij chirij u Tewal i Dios. I winak, ca cuytaj ni qui mac chique, xak ni'pa i n-'us taj chi quiqui bij; xui-ri, we quiqui bij mal laj tak tzij chirij u Tewal i Dios, ile n-ca cuytaj ta chic chique. <sup>32</sup>I winak, we c'ax que ch'aw chwij yin, ile ca cuytaj na chique; xui-ri we c'ax que ch'aw na chirij u Tewal i Dios, i mac-le lic n-ta u cuytajic. N-ca cuytaj ta wo'or, xak mi ne co'on panok, are cu jek u 'atbal tzij i Dios.

**Jun 'utz laj winak, 'utz i cu bij, man 'utz i 'o pa ranima**

<sup>33</sup>Jun che', we 'utz laj che', cu ya u wach 'utz; xak we n-'us ta laj che', i u wach xak n-'us taj. Jun che' ca 'iltaj na che u wach we 'utz. <sup>34</sup>IYix ix rac'al cumatz! ¿Wach nawi u bixquil i 'utz qui 'an na? man lic ix mal. Jun, are ca

ch'awic, wach i quel pu chi', pu c'ux petnak wi, ni'pa u molom rib chila.

<sup>35</sup>Jun 'utz laj winak, 'utz i cu bij, man 'utz i 'o pa ranima; xak jun mal laj winak, n-'us ti cu bij, man n-'us ti 'o pa ranima. <sup>36</sup>Y yin quin bij chiwe, are ca c'un i q'uisbal 'ij, conojel 'is quiqui bij na chuwach i Dios wach tak i tzij qui bim chi n-'us taj. <sup>37</sup>Rumal wach i a bim, ca 'at ni tzij pawí, ca 'iltaj 'uri we 'o i a mac, o we n-taj.

**I winak xa cacaj rilic jun milágro**

<sup>38</sup>Je 'o jujun aj Fariséo winak, tak jujun aj tijonel re i 'atbal tzij, xqui bij che i Jesus:

—Tijonel —xe cha—, cacaj cakil jun milágro, c'utbal-re chake chi Dios 'o awu'.

<sup>39</sup>I Jesus xu la' u wach chique:

—I winak wo'or, lic je mal na, lic n-qui qui coj ta chic i Dios. Yix qui rayij ca 'an ni jun milágro chiwach, c'utbal re u cho'ab i Dios wu'; xui-ri, n-ta jun milágro ca 'an ni chiwach. I tom chic wach i milágro xa 'ani che i ma Jonas, chi ajbil u tzij i Dios ujer. Xui i milágro-le quiwil na. <sup>40</sup>Ire xu ch'ij oxib 'ij, oxib a'ab, chupam i nim laj car; bay, xak queje quin 'an ni yin, chi in Achi aj Chicaj; quin ch'ij ni oxib 'ij, oxib a'ab, quin muktaj na. <sup>41</sup>Are ca pe i 'ij chi ca 'at ni tzij piquiwi i winak, i aj Nínive chi xe u pixbaj i ma Jonas, quiqui coj na i mac yix ix winak re wo'or. Queje quiqui 'an ni ile, man i winak aj Nínive xqui jalwachij qui c'aslemal are xupon i ma Jonas chu bixquil u tzij i Dios chique. Xui-ri, yix lic n-qui jalwachij ti c'aslemal tupu 'o Jun<sup>u</sup> chi, mas nim ni u 'ij chuwach i ma Jonas; rumal-i quiqui coj na i mac. <sup>42</sup>Xak i ixok, chi ujer 'atol tzij re i pa Sur, xak ire cu coj ni i mac yix ix winak re wo'or, are ca pe i 'ij chi ca 'at ni tzij piquiwi i winak. Queje cu 'an na ire-le, man yix n-qui waj ta qui ta i Jun chi 'o u no'oj. I ixok-le, lic mas naj xpe wi chu tayic u nojbal i ma Salomon,

<sup>u</sup> 12.41 I Jun-le are i Jesus mismo.

chi mas 'o u no'oj. Y wo'or 'o Jun' chi, nim ni u 'ij chuwach i ma Salomon, péro yix n-quiwaj tu tayic wach i cu bij —xu bij i Jesus chique.

**Jun itzel tew cu tzucuj tan chic  
u tzalijbal che jun winak**

<sup>43</sup>I Jesus xak xu bij i tzij-i chique:

—Jun itzel tew, we xel che jun winak, xa ca bin pa chakij jyub chu tzucucix pa cuxlan wi, y n-cu rik taj. Te'uri cu ch'ob pu jolom: <sup>44</sup>“Quin tzalij chic che i wachoch pa i xin el wi” cu bij; y ca tzalij chic 'uri. Are cupon tan chic ru' achi, cu riko pacha jun ja n-tu pam, lic jos'im, lic yijbam na che jun rajaw c'ac'. <sup>45</sup>Te'uri i itzel tew que u tzucuj bi rachi'il, y que u rik je wukub chic, mas je mal chuwach ire. Que u c'am bi ru', y conojel que oc che achi. Chila que jeki wi. Te'uri i achi-le, que'elok mas mal na chuwach li ujer. Xak queje ile que'el chique i winak re wo'or (man yix n-ta jun c'utunic 'utz qui ya chique, quiqui c'olbej piqui c'ux —xu bij i Jesus chique i aj Fariséo).

**Je pachin i u chuch i u cha' i Jesus**

<sup>46</sup>I Jesus c'a ca ch'a'at cu' i winak are xe upon u cha', xak i u chuch. Ique je 'o chi sak, cacaj que lapan ru'. <sup>47</sup>Are 'uri 'o jun achi xu bij che i Jesus:

—I a chuch cu' i a cha' je 'o chi sak, cacaj que lapan awu' —xu bij che.

<sup>48</sup>Xui-ri, i Jesus xu bij che i achi:

—¿Je pachin in chuch, je pachin in cha'? —co'ono.

<sup>49</sup>Are 'uri, xu c'ut che u 'ab ni'pa i u tijoxelab je 'o ru', y xu bij:

—Ique-le je are in chuch, je in cha' —xu bij—. <sup>50</sup>Pachin i que tijin chu 'anic pacha craj in Kajaw chicaj, je are in chuch 'uri, je are in cha', je are i wanab —xu bij.

**Jun tijojbal tzij re i ticon**

**13** <sup>1</sup>Che i 'ij-le, i Jesus xel ru' ja, xa 'e chu chi' i alagun, y xcubi chila. <sup>2</sup>Are 'uri xe moltaj tan chic

uq'ual winak ru'. Rumal-i, i Jesus xa 'an chupam jun bárco, y xcubi chupam. Je ni'pa i winak 'is xe canaj chi tak seneb. <sup>3</sup>Te'uri xu jek u c'utic juban tak tijojbal tzij chique. Xu bij:

—'O jun achi ca 'e chu tiquic u ticon.

<sup>4</sup>Are xe u quirij i rija', 'o jubi' xa 'e tzak pa be. Te'uri xe c'un i tz'iquin y xqui tij bic. <sup>5</sup>Xak 'o jubi' chic xa 'e tzak pa tak abaj, chi n-ta kas ulew che. I ija-le, juntir xalax lok, man n-muktajnak ta mas. <sup>6</sup>Xui-ri, are xel li 'ij, xchakij na, man n-ta ra' 'enak pulew. <sup>7</sup>Xak juban chic xa 'e tzak pa q'uix; i q'uix xq'uuiyic, y xu camsaj i ticon. <sup>8</sup>Xak 'o ni ija xa 'e tzak pa 'utz laj ulew; lic q'ui ni u wach xu ya'o. 'O ni rakan xu ya jun ciénto u wach; xak 'o i xu ya sesénta; xak 'o i xu ya tréinta —xu bij. Te'uri xu bij chique:

<sup>9</sup>—We yix 'o i xiquin chu tayic, chi ta u be 'uri —xcha.

**Wach u chac i tak tijojbal tzij  
xu bij i Jesus chique i winak**

<sup>10</sup>I u tijoxelab i Jesus, are xu bij ire ile, xe teheb ru'. Xqui tz'onoj che:

—¿Wuchac xa tijojbal tzij ca bij are cat tijin chu c'utic chique i winak? —xqui bij che.

<sup>11</sup>I Jesus xu bij 'uri chique:

—Yix 'ut, i Dios u yom chiwe qui ta u be wach usuc' i 'atbal tzij aj chicaj. I juban winak (chi n-que terej ta chwij) n-qui qui ta tu be. <sup>12</sup>Queje o'onom i Dios ile, man ni'pa i quiqui c'am na wach cu sujuy ire chique, mas cu ya 'uri chique; queje ile nim ni 'o cu'. Ni'pa i n-cacaj ti u c'amic wach cu sujuy i Dios chique, que sax na 'uri i jubi' chi 'o cu'. <sup>13</sup>Rumal 'uri, xa ru' tijojbal tzij quin c'ut chique i winak, man ique, tupu que tzunic, n-ta quiquilo; tupu que tanic, n-qui qui ta taj, xak n-qui qui ta tu be. <sup>14</sup>Que'el chique pacha u bim i Dios chupam u wuj u tz'ibam can i mam Isaías chi ajbil u tzij i Dios ujer; ire xu bij:

Yix, katzij neri, qui ta na, péro n-qui ta tu be;

<sup>v</sup> 12.42 I Jun-le are i Jesus mismo.

katzij neri, quix taken na, péro n-ta quiwil na.

<sup>15</sup> Man i winak-i, n-cacaj ta quiqui ta u be,

xa qui tz'apim i qui xiquin,  
xak qui mutz'um i qui ba'wach,  
man n-que tzun ta ru' qui ba'wach,  
xak n-que tan ta ru' qui xiquin.  
N-ta quiqui ta u be piqui c'ux,  
xak n-que c'un ta wu', col qui  
cunbej quib.

(Queje ile u bim i Dios.)

<sup>16</sup> Xui-ri yix, n-ix ta queje ile. Lic 'utz iwe, man i ba'wach yix que tzunic, xak i xiquin que tanic. <sup>17</sup> Katzij i quin bij chiwe, je q'ui i ajbil u tzij i Dios ujer, xak je q'ui i je terejnak chirij, xcaj te rilic wach quix tijin yix chi rilic wo'or, péro n-xquil taj; xak xcaj u tayic te'ek pacha i quix tijin yix chu tayic wo'or, péro n-xqui ta taj.

**I Jesus xu sakij wach i usuc'  
i tijojbal tzij u bim**

<sup>18</sup> Te'uri Jesus xu bij chique:

—Chi ta 'uri u be wach usuc' i tijojbal tzij chi xin bij mier re i aj ticol ticon.

<sup>19</sup> Ni'pa i winak chi quiqui ta i tzij re i 'atbal tzij aj chicaj, we n-quiqui ta tu be, que'elok pacha xo'on ija chi xtzak pa be. Queje i winak-le, man ca c'un itzel, i cresaj i 'utz laj tzij chi tictal piqui c'ux. <sup>20</sup> Xak i ija chi xtzak pa abaj, ile pacha i winak chi quiqui ta i 'utz laj tzij, y que quicotic xqui cojo. <sup>21</sup> Xui-ri, je pacha jun ticon chi n-naj taj 'enak i ra'; n-que najtin taj. Are ca pe i c'ax piquiwi rumal i 'utz laj tzij qui cojom, xak ca pe i qui yo'yaxic cumal i winak, xa caco'taj canok. <sup>22</sup> Xak i ija chi xtzak pa q'uix, ile pacha i winak chi quiqui ta i 'utz laj tzij, xui-ri, xa que c'achir rumal i qui c'aslemal waral chuwach i jyub ta'aj, xak i qui rayijbal re mas ubitak que; ile xa cu chup i 'utz laj tzij. Rumal-i n-ta ca wachin chique. <sup>23</sup> Are ija chi xe 'e tzak pa 'utz laj ulew, ile pacha i winak chi quiqui ta i 'utz laj tzij, xak quiqui ta u be. Ique lic que wachinic; 'o jujun chique je pacha i rakan chi xu ya cien u wach; xak

'o jujun quiqui ya sesénta u wach; xak 'o jujun quiqui ya tréinta. (Queje ile xu bij i Jesus chique.)

**Wach i xo'on i mal laj 'es chuxol i trigo**

<sup>24</sup> I Jesus xu bij chic jun tijojbal tzij chique, are iri:

—I 'atbal tzij re aj chicaj, que'elok pacha i tzij-i: 'O jun achi xu tic i trigo pa rulew; chom laj ija xu tico. <sup>25</sup> Xui-ri, are 'is que war conojel, xc'un jun aj ch'o'oj chirij i rajaw, y xu tic can mal laj ticon ru' i trigo (pacha trigo ca tzunic, péro n-are taj). <sup>26</sup> Are xe po'ic, junam xe q'uuyic; xui-ri, are xpe u wach i trigo, are 'uri xa'alijin i juban chi n-trigo taj. <sup>27</sup> Te'uri i ajchaquib xe 'e chu bixquil ru' i rajaw: “Nim laj winak, i ija chi a ticom na, lic chom, épa xpe wi i mal laj 'es chi 'o ru'?” xe cha. <sup>28</sup> I rajaw xu bij chique: “Xa are jun aj ch'o'oj chwij xa 'anaw ile.” Te'uri i ajchaquib xqui bij che: “¿Cawaj ca 'e ka mich'a i mal laj 'es?” xe cha. <sup>29</sup> “Mi mich'o,” xu bij i rajaw, “man we qui mich' i mal laj 'es, mokxa ca mich'taj i trigo ru’,” xu bij. <sup>30</sup> “Utz chi ya che ca q'uuy na, junam ru' i trigo. Are cakaj caka jek nu ch'upic u wach i trigo, are 'uri que in tak bi i aj molonel chi relsaxic i mal laj 'es. Te'uri ique quiqui 'an manoj che, man ca porox na. We utzjin ile, caka mol i trigo y caka ya pu c'olbal,” xu bij i rajaw. (Are ile are i tijojbal tzij xu bij i Jesus chique.)

**I tijojbal tzij re u q'uuyic  
i ija re i mostas**

<sup>31</sup> I Jesus xak xu bij jun chic tijojbal tzij chique. Xu bij:

—I 'atbal tzij re aj chicaj que'elok pacha co'on jun ija re i mostas, are jun achi cu tic pa rulew. <sup>32</sup> I ija-le, lic ch'utin na chiquiwach i ronojel ija. Xui-ri, we xpo'ic, mas nim na que'el chiquiwach i ronojel i ticon. Lic nim que'elok, pacha jun che; te'uri i tz'iquin que c'unic y quiqui 'an qui soc che tak u 'ab.

**I tijojbal tzij re i cunbal re i caxlanwa**

<sup>33</sup> I Jesus xak xu bij jun chic tijojbal tzij chique. Xu bij:

—I 'atbal tzij re aj chicaj co'on pacha co'on i cunbal re i caxlanwa. Ile, we jun ixok cu chapo, y cu coj oxib almul arin ru', tupu xa jubi' i cunbal 'o ru', cwalij u wach i 'or ronojel. (Xak queje ile co'on i 'atbal tzij re aj chicaj.)

**I Jesus, ni'pa i c'utunic  
xo'ono, xa ru' i tijojbal tzij**

<sup>34</sup>I Jesus, ronojel i c'utunic-le, xu bij chique i winak ru' tijojbal tzij; n-ta tzij xu bij chique, we n-are ti tijojbal tzij. <sup>35</sup>Xe'elok pacha u bim can jun ajbil u tzij i Dios ujer. Xu bij:

Ru' i tijojbal tzij quin 'an wi i  
c'utunic chique;  
quin sakirsaj ni'pa tak i uwam u  
wach, c'a chu xebal 'ij sak.

(Queje ile tz'ibtal canok.)

**Xu sakij wach usuc' i tijojbal  
tzij re i mal laj 'es**

<sup>36</sup>Te'uri i Jesus xe u 'ijla bi i winak y xoc pa ja. Are 'uri i u tijoxelab xe tejeb pan ru' y xqui tz'onoj che:

—Cha sakij chake wach usuc' i tijojbal tzij xa bij, che i mal laj 'es tictal can pa ticon.

<sup>37</sup>Te'uri i Jesus xu bij:

—Are i ca ticaw i 'utz laj ija, are yin chi in Achi aj Chicaj. <sup>38</sup>Are i pa quin tic wi, are i jyub ta'aj. Are i 'utz laj ija, are i winak chi qui jachom quib pa 'atbal tzij re i Dios; are i mal laj tak 'es, are i winak 'uri chi je re itzel. <sup>39</sup>Are i aj ch'o'oj chirij i rajaw i ticon, are itzel chi ca ticaw i mal laj ija. Are i molonic re i ticon, are i qui molic i winak pa q'uisbal 'ij. I ajchaquib chi quiqui mol i ticon, je are i ángel. <sup>40</sup>I mal laj tak 'es, ca mol u chi', y ca c'ak pa 'a' porobal-re. Xak queje ca 'an ni ile pa q'uisbal re u wach i jyub ta'aj. <sup>41</sup>Yin, chi in Achi aj Chicaj, que in tak li in ángel ru' in ticon, col qui molbej-que ni'pa i je qui tacpum i cachi'il pa mal, xak conojel ni'pa i que 'anaw i mal. <sup>42</sup>Te'uri que c'ak na pa 'a' pa orno. Chila que o' na; xak quiqui kach'ach'e'j uwaque rumal ni uyej quiqui tijo. <sup>43</sup>Te'uri, ni'pa i je 'utz chuwach i

Dios, que q'uuij pa cu 'at wi tzij ire. I qui 'ij qui chomal ique, pacha ca tzun i 'ij. We yix 'o i xiquin chu tayic, chi ta u be 'uri. (Queje ile xu bij i Jesus chique u tijoxelab.)

**I tijojbal tzij re i mer muktalic**

<sup>44</sup>(Te'uri xu bij jun chic tijojbal tzij. Xu bij:)

—I 'atbal tzij re aj chicaj queje pacha uq'uial mer muktal chupam juban ulew. Ca c'un jun achi y cu rikop. N-xresaj ta lok, xa cu muk chic can u wi, y lic ca quicotic ca 'ec; 'is que u c'ayij na ni'pa i 'o ru'. Te'uri ca petic y cu lo' i ulew man 'o i beyomal chupam. (Queje ile i 'atbal tzij re aj chicaj.)

**I tijojbal tzij re i chom laj  
ral abaj, pérla ca bix che**

<sup>45</sup>(O jun chic tijojbal tzij xu bij chique, are iri:)

—I 'atbal tzij re aj chicaj are pacha jun chom laj ral abaj, lic pakal rajil, pérla ca bix che. Jun aj c'ay pérla, ca 'e chu tzucuxic i tak i pérla, y cu lo'o. <sup>46</sup>Ire, we xu rik jun chi lic chom, lic pakal rajil, ca 'e chu c'ayixic ronojel i ubitak-re, lo'bal-re. (Queje co'on ire ile man lic chom; xak queje ile i 'atbal tzij re aj chicaj.)

**I tijojbal tzij re i ataraya**

<sup>47</sup>(Te'uri xu bij i Jesus chique:)

—I 'atbal tzij re aj chicaj queje pacha jun ataraya. I je aj chapol car, are quiqui c'ak bi i ataraya pa ya, 'is bi chi caril cu chap lok. <sup>48</sup>Are nojnak chic i ataraya, caquesaj li 'uri chu chi' i ya. Te'uri que cubi chi qui tzucuxic i 'utz chique i car. Ni'pa i 'utz, que qui c'ol na chupam jun chicach; i ne te 'utz, que qui c'ak bic. <sup>49</sup>Queje co'on ni ile pa q'uisbal 'ij; que 'el ni ángel chi qui chayic i ne te 'utz chiquixol i je 'utz. <sup>50</sup>Te'uri que c'ak na pa 'a' pa orno. Chila que o' na; xak quiqui kach'ach'e'j uwaque rumal qui bis. (Queje ile i tijojbal tzij xu bij i Jesus chique.)

**'O i c'utunic c'ac', xak 'o  
i c'utunic re ujer**

<sup>51</sup>Te'uri i Jesus xu tz'onoj chique:



—¿Xi ta u be ronojel iri? —co'ono.

Katzij —xqui bij—, xka ta.

<sup>52</sup>Te'uri xu bij chique:

—Jun tijonel re i 'atbal tzij tz'ibtal can rumal i mam Moises, we ire nawnak che i tzij chi quin bij yin re i 'atbal tzij aj chicaj, 'utz re ire 'uri. Que'el ire pacha jun rajaw ja chi 'o ubitak-re c'ac', xak 'o i re ujer. Che i queb-le 'is cu chapo." (Queje ile xu bij chique u tijoxelab.)

### I Jesus n-xajwax ta cumal i rach aj tinimit

<sup>53</sup>I Jesus, are xutzin chu bixquil i tak tjojbaj tzij-le, xel chila pa Capernaum y xa 'e pa Nazaret. <sup>54</sup>Chila xoc chu c'utic chique i aj Israel winak pa qui molbal'ib. Ique, are xqui ta, lic xqui bisoj che. Xqui bij 'uri:

—¿Ipa xa 'e u nawsaj wi rib i achi-le, chi lic 'o u nojbal? ¿Wach u tiquilem che i milágro-le? <sup>55</sup>Ire xa are rac'al i mam chi aj 'anol mexa, xak i u chuch xa are ati Mariy. I je u cha' xa are i a-Jacóbo, i a-Jose, xak i a-Simon, i a-Júdas. <sup>56</sup>Xak i ranab je jekel chi ku' yoj. ¿Ipa xretamaj wi 'ut ronojel ile? —xqui bij.

<sup>57</sup>Rumal-i, lic n-xcaj taj wach i xu bij, wach i xu 'ano. Are 'uri i Jesus xu bij chique:

—Jun ajbil u tzij i Dios, conojel i winak quiqui coj u 'ij, xui i je rach aj tinimit n-quiqui coj tu 'ij, xak queje i je aj ru' rachocho —xu bij.

<sup>58</sup>Ire n-ta kas milágro 'uri xu 'an chila, man ique n-ta u cubibal qui c'ux che.

### Wach u camsaxic i ma Wan aj kajsanel ya

**14** <sup>1</sup>Che tak i 'ij-le, i ma Heródes, chi 'atol tzij re i jyub Galiléa, xu ta rason wach co'on i Jesus. <sup>2</sup>Xu bij ire chique i rachi'il:

—Ire-le, are i 'etz ma Wan, aj kajsanel ya, ya walijnak chic che i camic —xu bij—. Are i rumal 'uri chi 'o i cho'ab ru' chu 'onquil i milágro —xcha.

<sup>3</sup>I u camic i ma Wan, queje iri xic'aw wi: i ma Heródes xu tak u chapic i ma

Wan y xqui ximo, y xqui c'am bi pa cárcel. Queje xo'on ire ile rumal i rixokil. I ixok-le, ati Erodiys u bi, are i rixokil i ma Felípe chi catz qui cha' quib ru' i ma Heródes. <sup>4</sup>I ma Wan u bim ujer che i ma Heródes:

—N-'us taj chi ca 'an awixokil che i ixok-le —xu bij.

<sup>5</sup>Rumal-i, i ma Heródes craj cu camsaj i ma Wan, xui-ri xu xij rib chique i winak. Conojel i winak qui cojom chi i ma Wan lic ajbil u tzij i Dios.

<sup>6</sup>Are xc'un i nima'ij re u 'ij i ma Heródes, xc'un i ralit i ati Erodiys, xa xajaw chiquiwach conojel i je 'o ru'. I ma Heródes lic kus xrilo. <sup>7</sup>Rumal-i xu bij che i ali chi cu ya na che pachique tak ca tz'onox che, y xu cuxtaj u bi i Dios puwi wach i xu bij.

<sup>8</sup>I ali, ya bital chic che rumal u chuch wach i cu tz'onoj; are 'uri xu bij che i ma Heródes:

—Cha ya li u jolom i ma Wan aj kajsanel ya; waral chupam jun plato cha ya chwe —xu bij.

<sup>9</sup>I ma 'atol tzij lic xibisonic are xu ta ile. Xui-ri, xu tak u 'anic pacha xbig che, man ire xu cuxtaj u bi i Dios puwi wach i xu sujuj che i ali. Xak ni'pa i je 'o chila ru' 'is xqui ta wach i xu bij; rumal-i, xu 'ano. <sup>10</sup>Are 'uri xu tak i relsaxic u jolom i ma Wan pa cárcel. <sup>11</sup>Te'uri xqui c'am li u jolom chupam jun plato, y xqui ya che i ali; ire xa 'e u jacha che u chuch.

<sup>12</sup>Te'uri xe upon i u tijoxelab i ma Wan chu c'amic i u ch'acul; xqui c'am bic y xqui muku. Te'uri xe 'e qui bij che i Jesus chi xcamsax i ma Wan.

### Wach i qui tzukic jo'ob mil winak xo'on i Jesus

<sup>13</sup>I Jesus, are xu ta ile, xel chila utuquel. Xoc bi chupam jun bárco, xa 'e che jun jyub tz'inilic. Xui-ri, i winak lic xqui ta pa xa 'e wi. Ique xe 'el pa tak qui tinimit, xe sutin chu chi' i ya, xe 'e chu c'ulaxic i Jesus. <sup>14</sup>Ire, are xel pa bárco, xe ril tan chic uquial winak je 'o chila.

<sup>w</sup> 13.52 Ire 'o i c'utunic c'ac' ru', xak 'o i c'utunic re ujer, tobal-re che u c'aslemal chuwach i Dios.



Lic xril to'bal qui wach, y xe rutzirsaj i iwabib. <sup>15</sup>Are ya coc a'ab, i u tijoxelab xe tejeb pan ru' y xqui bij che:

—Ya xkaj i 'ij; i waral-i n-ta winak jekel chi. Che a 'ijla bi i winak; cha ya chique que 'e pa tak aldéa chu lo'ic wach i quiqui tijo —xqui bij.

<sup>16</sup>I Jesus xu bij chique:

—N-tu chac que 'ec; chi ya yix chique wach quiqui tij na —xu bij.

<sup>17</sup>—N-ta ku' yoj wach caka ya chique; xui jo'ob caxlanwa ru' queb car —xe cha.

<sup>18</sup>—Chi c'ama li waral —xu bij i Jesus chique.

<sup>19</sup>Te'uri xu bij chique i winak chi que cubi chuwach tak q'uim. Ire xu chap i jo'ob caxlanwa xak i queb car, xtzun chicaj y xu tioxij che i Dios. Te'uri xu pir i caxlanwa y xu ya chique u tijoxelab; ique xqui jach chique i winak. <sup>20</sup>Conojel 'is xqui tijo, y xe nojic. Xak xsobrin can cablajuj coban. <sup>21</sup>I uq'uial winak chi xe tzukic, xui achiab 'o jo'ob mil chique, y mas puwi ile je 'o juban ixokib, tak i ac'alab.

#### Wach u binic i Jesus chuwi ya

<sup>22</sup>Te'uri Jesus xu bij chique u tijoxelab chi que oc pa bárco, que 'ax chic ch'akap. Xu bij chique que nabeaj nubí chuwach ire, tz'akat que u 'ijla bi i winak. <sup>23</sup>Xutzin ile, xel bi Jesus chuwi jun jyub utuquel chu tz'onoxic che i Dios. Are xoc a'ab, utuquel 'o chila chuwi jyub. <sup>24</sup>Are 'uri i u tijoxelab je 'o pa bárco pa nic'aj ya. I uwi ya lic quel chicaj, quel 'an chirij i bárco rumal i tew chi lic xpe chirij. <sup>25</sup>Are ya ca pe u sakiric, i Jesus ca tijn chi be chuwi ya, ca tijn u tejebic cu'. <sup>26</sup>I u tijoxelab, are xquilo chi ire ca bin chuwi ya, lic xqui xij quib che. Rumal 'uri, xe siq'uín chu bixquil:

—iIle, jun xibinel! —xe cha.

<sup>27</sup>Are 'uri i Jesus xu bij chique:

—iMi xij iwib! Xa yin. iChi cowirsaj i c'ux!

<sup>28</sup>Te'uri i ma Pédro xu 'ijla y xu bij che:

—Kajwal, we lic katzij yet, cha ya na chwe quin bin awu' puwi i ya —xu bij.

<sup>29</sup>—Sa'aj wu' —xu bij i Jesus che.

I ma Pédro te'uri xel chupam i bárco y xu jek bi binic chuwi ya, ca 'e ru' i Jesus. <sup>30</sup>Xak te'et xriilo chi lic nim i tew, y xu xij rib rumal. Are 'uri xu ticba sachic pa ya; rumal-i, xsiq'uín chu bixquil:

—iKajwal, chin a to!

<sup>31</sup>I Jesus juntir xu chap pan che u 'ab. Xu bij che:

—A-Pédro, ¿n-tu cubibal a c'ux chwe? ¿Wuchac xa xij awib? —xcha.

<sup>32</sup>Are xe oc bi ique pa bárco, i tew xuxlanic. <sup>33</sup>Are 'uri ni'pa i je 'o pa bárco, xe xuqui chuwach i Jesus.

—Katzij yet at u C'ojol i Dios —xe cha.

#### I Jesus xe u cunaj iwabib pa tinimit Genesaret

<sup>34</sup>Te'uri xqui maj chubi qui be puwi ya, y xe upon chu chi' i ta'aj Genesaret. <sup>35</sup>I winak chila, are xquetamaj are i Jesus xuponic, xqui paxsaj rason ronojel i ta'aj-le. Te'uri xe qui c'am li ni'pa i iwabib ru' i Jesus. <sup>36</sup>Lic xqui tz'onoj che, chi cu ya na chique i iwabib quiqui yin na jubi' u chi' u 'u'; y ni'pa i xqui chap ni u 'u', 'is xe utzir na.

#### Wach ca 'anaw che jun winak chi n-ch'am taj

**15** <sup>1</sup>Te'uri 'o jujun chique i aj Fariséo winak xe upon ru' i Jesus, xak juban tijonel re i 'atbal tzij re i mam Moises. Ique je petnak c'a pa tinimit Jerusalen. Are 'uri xqui tz'onoj che i Jesus:

<sup>2</sup>—I a tijoxelab yet, ¿wuchac n-quiqui 'an ti ka costúmbre<sup>x</sup> chi qui c'utum can i katit kamam? N-quiqui coj ta retalil che i ujer 'atbal tzij re u ch'ajic qui 'ab are quiqui tij i qui wa —xqui bij che.

<sup>3</sup>I Jesus xu la' u wach chique:

—Yix 'ut, ¿wuchac na quix terej chirij i costúmbre? ¿Wuchac ni cojom ti retalil che i méro tzij u bim can i Dios? Xa i canam can u 'onquíl. <sup>4</sup>I Dios u bim na:

<sup>x</sup> 15.2 I costúmbre-le xa are u ch'ajic 'an u kul qui 'ab lic na'al c'a piqui ch'uc.

“Cha cojo qui 'ij a kajaw a chuch,” xak u bim na: “Pachin c'ax ca ch'aw chiquij u kajaw u chuch, cha cam saxok.” Queje ile u bim i Dios. <sup>5</sup>Xui-ri, yix qui ya na che jun achi cu bij che u kajaw, cu bij che u chuch: “N-cat in to taj,” cu bij che, “man ni'pa i 'o wu' in sulum chic che i Dios,” cu bij che. <sup>6</sup>Yix, we queje cu bij i jun ile, qui bij na 'uri, n-ta chic chukul que u to u kajaw u chuch. Que'el 'ut chi i kajsam u 'ij u tzij u pixab i Dios; xa quix terej chirij i costúmbre yix. <sup>7</sup>Yix ixa queb i palaj! Lic katzij wach u tz'ibam can i ujer ajbil u tzij i Dios, mam Isaías. Lic u tz'ibam canok wach quix tijin yix chu 'anic wo'or. Xu bij canok chi Dios u bim na:

<sup>8</sup> I winak-i lic quiqui coj in 'ij ru' qui chi,

xui-ri, ru' qui c'ux n-qui qui 'an taj.

<sup>9</sup> I u cojic in 'ij quiqui 'ano, lic n-ta cu chacuj,

man i tzij que tijin chu c'utic,

xa cu' winak petnak wi.

(Queje ile u bim i Dios —xu bij i Jesus chique.)

<sup>10</sup>Te'uri xe u siq'uuj i winak ru' y xu bij chique:

—Chi ta na wach quin bij; chi bisoj u tayic u be wach ca 'anaw che jun winak chi n-ch'am taj. <sup>11</sup>N-are ti wach coc pu chi' ca 'anaw che chi n-ch'am taj, xa are i tzij chi quel li pu chi'; are ca 'anaw 'uri che chi n-ch'am taj —xu bij i Jesus chique.

<sup>12</sup>Te'uri i u tijoxelab i Jesus xe tejeb pan ru', y xqui bij che:

—¿Xawil yet chi xpe coywal i aj Fariséo che i tzij-le? —xqui bij che.

<sup>13</sup>(—N-ta quin ch'ob yin che ile. I qui patan ique, n-ru' ti in Kajaw petnak wi.) Xu bij i Jesus: —Ni'pa i ticon chi nu ticom ti in Kajaw chicaj, xa que mich' na ru' i ra'. <sup>14</sup>Mi coj retalil chique ique; xa je mawach laj tak c'ambeal chique i juban chic mawach. Jun mawach, we cu c'am bi jun rach mawach, junam 'uri que 'e tzak pa siwan —xu bij i Jesus chique.

<sup>15</sup>Te'uri i ma Pédro xu bij che:

—Cha sakij ni tijojbal tzij chake chi xa bij-le —co'ono.

<sup>16</sup>Are 'uri i Jesus xu bij:

—¿Yix, maja bari qui ta u be wach i quin bij? <sup>17</sup>¿N-qui ta ta bari u be ile, chi wach tak coc chupam jun winak n-are ti ca 'anaw che chi n-ch'am taj? Xa coc chupam u chi', y ca 'e che u pam; xa quic'awic y quel tan chic. <sup>18</sup>Xui-ri, wach i quel pu chi', pu c'ux 'uri petnak wi. Are ile are ca 'anaw chique i winak chi ne te ch'am. <sup>19</sup>Man xa piqui c'ux ca pe wi ronojel tak n-'us taj. Are rumal 'uri ca pe i qui nojbal chi n-'us taj; are rumal 'uri 'o i camsanic, xak 'o i je c'ulanic quiqui kajsaj qui 'ij cu' i n-cachijil ta quib; xak 'o i ne te c'ulanic xak quiqui kajsaj qui 'ij chiquiwach; are ile chi ca 'anaw chique chi ne te ch'am, y piqui c'ux petnak wi. Xak queje ili'omab, xak queje i je aj 'anol mentir, xak queje i je aj nuc'ul tzij. <sup>20</sup>Are i ni'pa ile are ca 'anaw chique i winak chi ne te ch'am. We jun n-cu ch'aj tu 'ab are cu tij u wa, ile 'ut n-are ti ca 'anaw che chi n-ch'am tu pu c'ux. (Queje xu bij i Jesus ile chique.)

#### Wach rutzirsaxic i ralit jun ixok chi n-aj Israel taj

<sup>21</sup>Xo'on chupanok, i Jesus xel chila, xa 'e c'a pa jyub pa 'o wi i queb tinimit, Tíro y Sidon. <sup>22</sup>Chila jekel wi jun ixok n-aj Israel taj;<sup>23</sup> ire xc'un ru' i Jesus y co xu bij:

—iNim laj winak! iYet chi at umuk uxiquin can i mam David! iChawila to'bal in wach! Jun walit lic 'o itzel tew che, mas cu tij uyej rumal —co'ono.

<sup>23</sup>I Jesus n-ta xu bij che. I u tijoxelab xe tejeb ru' y lic xqui tz'onoj che:

—Cha taka bi ixok-le, man to' ca siq'uinic teren li chikij —xe cha.

<sup>24</sup>I Jesus n-xu la' tu wach chique, xa xu bij jun moxbal tzij che ixok:

—I Dios in u takom na lok xui chique i je aj Israel winak, chi pacha je chij je sachnak —co'ono.

<sup>15.22</sup> Ire aj Canaan winak.

<sup>25</sup>I ixok xtejeb ru' y xuqui chuwach.  
—Nim laj winak, ichin a to! —xu bij.

<sup>26</sup>I Jesus xu bij jun chic moxbal tzij che ixok:  
—N-'us taj ca maji ni qui wa i ac'alab, we xa ca ya' chique i tz'i —co'ono.

<sup>27</sup>—Katzij ile, nim laj winak —xu bij i ixok—, xui-ri, xak i tz'i xak quiqui mol ni uc'aj i wa chi ca puk chuxe' i mexa re i cajaw —xu bij.

<sup>28</sup>I Jesus xu bij 'uri:  
—Ixok, ilic nim u cubibal a c'ux chwe!  
Quin 'an na che awac'al pacha i cawaj —xu bij.

Are xu bij i Jesus ile, juntir xutzir i ralit i ixok.

#### **Wach cutzirsaxic uq'ual winak chi ne te aj Israel**

<sup>29</sup>Xo'on chupanok, i Jesus xel chila y xu tzalej u chi' i alagun Galiléa. Te'uri xel bi puwi jun jyub y xcubi chila. <sup>30</sup>Lic je q'ui i winak xe upon ru'. Xqui c'am bi i je sic, xak i je mawach, xak i je mem, xak i je clis, xak juban chic iwabib, je q'ui. Ni'pa i xe qui ya chuwach i Jesus, conojel xe rutzirsaj. <sup>31</sup>Rumal-i, i winak lic xqui bisoj, man i mem xe ch'aw na; xak i je clis, xe utzir na; xak i je sic, xe binic; xak i mawach, xe tzun na. 'Is xe oc chu cojic u 'ij i Dios, chi qui Dios i aj Israel.

#### **Wach i qui tzukic cajib mil winak xo'on i Jesus**

<sup>32</sup>Xo'on chupanok, i Jesus xe u siq'uij i u tijoxelab ru', y xu bij chique:  
—To' qui wach i winak-i, man are oxib 'ij iri chi je 'o chi wu'; n-ta chic wach quiqui tijo. N-cwaj ta que in tak bi che cachoch we n-ti wa qui tijom bic, mokxa que tzak pa be —xu bij chique.

<sup>33</sup>I u tijoxelab xqui bij:  
—¿Pa coj 'e wi chu c'amic i wa waral, tzukbal-que uq'ual winak-i? N-ta jun jekel waral —xe cha.

<sup>34</sup>I Jesus xu tz'onoj chique:  
¿Ni'pa i caxlanwa 'o iwu'?  
—Wukub —xe cha—, ru' jubi' ral tak car.

<sup>35</sup>Te'uri i Jesus xu bij chique i winak chi che cubi chuwach ulew. <sup>36</sup>Ire xu chap i wukub caxlanwa, tak i car. Xu tioxij che i Dios, xu piro y xu ya chique u tijoxelab. Ique xqui jach bi chique i winak. <sup>37</sup>Conojel 'is xqui tijo y xe nojic. Are xquelej ile, i u tijoxelab xqui mol ni'pa i ch'akatak chi xsobrinic; xnoj wukub chicach che. <sup>38</sup>I uq'ual winak chi xe tzukic, xui achiab 'o cajib mil chique, y mas puwi ile je 'o ni ixokib, xak i ac'alab. <sup>39</sup>Are 'uri i Jesus xe u 'ijla bi i winak, xoc pa bárcu, y xa 'e che i jyub Magdála.

#### **I aj Fariséo xak i aj Saducéo cacaj rilic jun milágro**

**16** <sup>1</sup>Xo'on panok, 'o jujun aj Fariséo winak cuc'am quib cu' juban aj Saducéo xe upon ru' i Jesus. Cacaj ique quiqui c'am u pam i Jesus, rumal-i xqui bij che chi cu c'ut jun milágro chique, c'utbal-re chi Dios 'o ru'. <sup>2</sup>Ire xu la' u wach chique:

—Yix lic iweta'am usuc' u wach i caj, wach i co'ono. Are ca kaj i 'ij, we cak, qui bij yix chi “Chwek, chom laj 'ij, man cak i uwacaj,” qui bij. <sup>3</sup>Xak we 'o jun u sakirbal, i uwacaj lic cak, xak 'ekmuj, qui bij yix 'uri chi “N-chom ti 'ij wo'or, man i uwacaj xa cak y 'ekmuj,” qui bij. Yix lic quiwil nu be i uwacaj, wach i co'ono; xui-ri, n-quiwil tu be wach ca tijin i Dios chu 'onquíl che tak i 'ij-i. <sup>4</sup>I winak wo'or, lic je mal na, lic n-quiqui coj ta chic i Dios. Yix quiwaj ca 'an ni jun milágro chiwach, c'utbal re u cho'ab i Dios wu'. Xui-ri, n-ta jun milágro ca 'an ni chiwach, xui pacha i xa 'an che i ma Jonas ujer. (Queje ile xu bij i Jesus chique.) Te'uri xe u canaj canok y xa 'ec.

<sup>5</sup>Te'uri i Jesus cu' u tijoxelab, xe 'ax chic ch'aka alagun. Ique, xsach chiqui c'ux n-ta qui wa xqui c'am bic. <sup>6</sup>Are 'uri i Jesus xu bij chique:

—Chitape', chi 'ana cwent chique i aj Fariséo xak i aj Saducéo; xa je pacha cunbal re i caxlanwa —xu bij chique.

<sup>7</sup>I u tijoxelab n-xqui ta tu be; xe oc chu bixquíl chiquiwach:

—Xu bij ire ile man yoj n-ta ka caxlanwa ka c'amom lok —xqui bij.

<sup>8</sup>I Jesus xu na'ò wach quiqui bij.

—¿Wuchac qui bij ile chi n-ta ka caxlanwa? —xu bij chique. iYix n-ta kas u cubibal i c'ux chwe! <sup>9</sup>¿Maja qui ta u be 'uri? ¿N-ca c'un ta bawa chi c'ux chi yin, che i jo'ob caxlanwa, xe in tzuk ni jo'ob mil achiab? ¿I ni'pa i coban xsobrinic?

<sup>10</sup>¿Xak n-ca c'un ta chic chi c'ux chi yin, che i wukub caxlanwa, xe in tzuk ni cajib mil achiab? ¿I ni'pa chicac xsobrin 'uri? <sup>11</sup>¿Wuchac 'uri n-qui ta tu be chi n-are ta rumal i caxlanwa xin bij yin ile? iChi 'ana cwent che i cunbal re i caxlanwa que i aj Fariséo xak i aj Saducéo! —xu bij chique.

<sup>12</sup>Te'uri i u tijoxelab xqui ta u be chi ire n-are ti cu bij i cunbal re i caxlanwa. Are i usuc' i xu bij, are chi qui 'ana cwent che i qui c'utunic i aj Fariséo xak i aj Saducéo.

#### Xu bij i ma Pédro chi Jesus are i Tolque chi coy'em

<sup>13</sup>I Jesus, are xe upon pa jyub Cesaréa re i Filípo, xu bij chique u tijoxelab:

—¿Wach quiqui bij i winak chi in pachin yin chi in Achi aj Chiaj? ¿Wach quiqui bij ique? —co'ono.

<sup>14</sup>I u tijoxelab xqui bij:

—'O jujun quiqui bij chi yet at i 'etz ma Wan aj kajsanel ya, quiqui bij. Xak 'o jujun quiqui bij chi yet at i ujer mam Elías; xak 'o jujun quiqui bij chi at i ujer mam Jeremías, o mok at jun chic ujer ajbil u tzij i Dios. (Queje ile xqui bij i tijoxelab che i Jesus.)

<sup>15</sup>Are 'uri xu bij chique:

—Y yix, ¿wach qui bij chi in pachin yin? —co'ono.

<sup>16</sup>I ma Simon Pédro xu bij:

—Yet at Crísto (i Tolke chi at koy'em); at u C'ojol i Dios c'aslic —co'ono.

<sup>17</sup>—i'Utz awe yet! —xu bij i Jesus che—. 'Utz i xa bij, a-Simon Bar-Jonas<sup>2</sup>.

N-ru' ta winak petnak wi i tzij-le; lic ru' in Kajaw chicaj petnak wi. <sup>18</sup>Rumal-i, quin bij chawe: yet at a-Pédro, i usuc' i a bi que'elok “abaj”; puwi i abaj-le<sup>a</sup> quin yac i wachoch. Ni'pa i je jutzobaj re i Dios, lic n-ca sachsax tu wach i tzobajille; mi tene i u cho'ab i camic ca tique che. <sup>19</sup>Yin quin ya i lawe<sup>b</sup> chawe, chi jakbal-re i ocal pa cu 'at wi tzij i Dios. Wach tak i ca 'atij yet waral chuwach i jyub ta'aj, i Dios cu ya u wach awu'. Xak wach tak ca ya na yet chique i je re i Dios chi quiqui 'an waral chuwach i jyub ta'aj, xak ca ya' na chique rumal i Dios —xu bij che i ma Pédro.

<sup>20</sup>Te'uri xu bij chique u tijoxelab mi jun quiqui lap wi, we are ire i Tolque chi coy'em.

#### I Jesus xu bij chi ca camsax na

<sup>21</sup>Te'uri i Jesus xoc chu sakixic chique u tijoxelab chi 'o u chac ca 'e ire pa Jerusalen, xui-ri i nimak tak mam'ib chila, junam cu' i caj'atzil i sacerdoté, tak i je tijonel re i ujer 'atbal tzij, ire lic cu tij uvej cumal. Xu bij chique chi ca camsax na, y ca walij churox 'ij.

<sup>22</sup>Are 'uri i ma Pédro xu siq'uij i Jesus ru', y xu bij che:

—iAy, Kajwal! iMa bij ile! I Dios chu 'atij ile chi xa bij —co'on che.

<sup>23</sup>I Jesus xu pisquilij rib; xu bij che i ma Pédro:

—iChat el na chin wach, a-Satanas! Ma 'an latz' che in be. A nojbal yet n-queje ta pacha u ch'obom i Dios. Ca ch'ob yet pacha quiqui ch'ob i to' winak —xu bij i Jesus che.

<sup>24</sup>Te'uri i Jesus xu bij chique u tijoxelab:

—Pachin jun craj ca terej chwij, 'o u chac mu ch'ob chic rib, xui-ri cha terej na chwij, tupu ca cam na rumal. <sup>25</sup>Pachin jun xa c'ax cu na u c'aslemal re waral, xa cu sach 'uri u c'aslemal chi sakil. Xui-ri, we 'o jun ca sachsax nu

<sup>2</sup> 16.17 Bar-Jonas are ucab u bi i ma Simon, chi que'el pa qui ch'awbal i aj Hebréo: “u c'ojol i ma Jonas”.

<sup>a</sup> 16.18 I abaj-le chi pacha i cubibal re i rachoch i Dios, are i u 'anom i Dios-le rumal u Tewel; are i jekbal re u 'alijinsaxic u sak laj tzij chique i to' winak. <sup>b</sup> 16.19 I usuc' i tzij-le are iri: Quin ya chawe chi que i to ni'pa i cacaj que oc pa 'atbal tzij aj chicaj.

wach u c'aslemal waral xa wumal yin, ca ya' 'uri u c'aslemal sakil. <sup>26</sup>Jun, we cu ch'ac ronojel i beyomal re u wach i jyub ta'aj, xui-ri we cu sach u c'aslemal sakil, n-ta que'el wi 'uri, n-ta u ch'acom 'uri. ¿Wach u tojic 'uri co'on na, ch'acbal re u c'aslemal sakil, we u sachom? N-taj. <sup>27</sup>Man yin, chi in Achi aj Chicaj, quin c'un na ru' u 'ij u chomal in Kajaw, xak cu' in ángel. Are 'uri, quin ya na chique i winak chiqui jujunal wach i tojbal-re ni'pa qui 'anom na. <sup>28</sup>Sak laj tzij i quin bij chiwe, je 'o jujun waral chi n-que cam ta tan, c'a quin quil na are col in 'ana ni in 'atbal tzij waral —xu bij i Jesus chique.

**Wach u yojtajic u tzunbal i  
Jesus rumal u chomal i Dios**

**17** <sup>1</sup>Wakib 'ij ric'awic ile, i Jesus xe u c'am bi i ma Pédro, i ma Jacóbo, xak i ma Wan chi u cha' i ma Jacóbo, y xe 'e quituquel che jun nim laj jyub naj u wi. <sup>2</sup>Are je 'o chila, i u tzunbal i Jesus lic xyojtajic; i u palaj lic pacha u tzunbal 'ij ca walch'inic; xak i u 'u' lic xo'on sak, pacha i sak re i 'ij. <sup>3</sup>Xak te'et, xquil i 'etz mam Moises, xak i 'etz mam Elías, que ch'a'at ru' i Jesus. <sup>4</sup>Are 'uri i ma Pédro xu bij che i Jesus:

—iMayes, 'utz xe'eloc chi oj 'o chi! We cawaj, caka 'an oxib mujbal waral, jun awe yet, jun re i mam Moises, xak jun re i mam Elías —co'ono.

<sup>5</sup>Are ca tijin i ma Pédro chu bixquil ile, xkaj li jutzobaj sutz' piquiwi, lic ca walch'inic, y xe sach chupam. Chupam i sutz'-le xqui ta jun chupal:

—Iri are in C'ojol chi lic c'ax quin na'o —xu bij—, lic quin quicot rumal ire. Chi ta 'ut wach i cu bij —co'ono.

<sup>6</sup>I u tijoxelab i Jesus, are xqui ta ile, lic xqui xij quib; xqui jupij bi quib chuwach ulew. <sup>7</sup>Are 'uri i Jesus xtejeb pan cu'; xe u yino y xu bij chique:

—Chix walijok; mi xij iwib —co'ono.

<sup>8</sup>Ique, are xe tzun 'anok, n-ta chic xquilo; xui chic i Jesus 'o cu'.

<sup>9</sup>Are que tijin li qui kajic tzam jyub, i Jesus xu bij chique:

—Ni'pa i xiwil yix, mi lap tan chique i winak, c'a cu rik ni' ij are in walijnak chic yin, chi in Achi aj Chicaj —co'ono.

<sup>10</sup>Te'uri i u tijoxelab xqui tz'onoj che i Jesus:

¿Wuchac quiqui bij i tijonel re i 'atbal tzij chi nabe ca c'un i mam Elías? Nabe na cakil u c'unic i mam Elías chuwach i u c'unic i 'atbal tzij aj chicaj, quiqui bij.

<sup>11</sup>I Jesus xu bij:

—Katzij i quiqui bij chi mam Elías nabe ca c'un na, col u yijba ni ronojel.

<sup>12</sup>Xui-ri, yin quin bij chiwe chi mam Elías ya c'un-nak chic, péro ique n-xquetamaj tu wach. Xa xqui 'an che ni'pa i xcax u 'anic ique. Xak queje yin, chi in Achi aj Chicaj, quin tij ni uyej piqui'ab ique —co'ono.

<sup>13</sup>Te'uri i u tijoxelab xqui ta u be chi are i ma Wan aj Kajsanel ya chi ca tijin i Jesus chu lapic chique. U sakirsam chique chi ma Wan pacha i mam Elías ya xc'unic.

**I Jesus xruzirsaj jun ala chi 'o atac che**

<sup>14</sup>Te'uri xe kaj li che i jyub y xe upon chic cu' uq'ual winak chi je moltajnak. Are 'uri 'o jun achi xtejeb ru' i Jesus y xuqui chuwach.

<sup>15</sup>—Nim laj winak —xu bij che—, chawila to'bal u wach i wac'al. Ca pe i atac che, y lic cu tij i camic rumal. Q'ual mul ca tzak pa 'a, ca tzak pa ya rumal. <sup>16</sup>In c'amom na li waral cu' a tijoxelab, xui-ri n-que tiqui ta chi rutzirsaxic —co'ono.

<sup>17</sup>Te'uri i Jesus xu bij:

—iAy, yix, n-tu cubibal i c'ux che i Dios; lic ix sachnak na! i'O tan chi 'ij in 'o iwu', y yix n-ta i nawic! ¿Ni'pa nawic chic 'ij c'a craj? —xu bij—. Chi c'ama li ac'al waral —co'ono.

<sup>18</sup>Te'uri i Jesus xu yaj i itzel tew chi 'o che ala, y xa 'ec. I ac'al juntir xutziric.

<sup>19</sup>Te'uri i u tijoxelab i Jesus, are quituquel chic, xqui tz'onoj che:

—¿Wuchac n-xoj tiqui ti yoj chi relsaxic bi itzel tew-le? —xqui bij.

<sup>20</sup>—N-xix tiqui ta che man n-ta kas u cubibal i c'ux che i Dios —xu bij i

Jesus chique—. Katzij i quin bij chiwe: i cubibal i c'ux che i Dios, we lic katzij, quix tiqui chu 'anic milágro ru'. N-ta co'ono we xa pich' pacha u nimal jun ija re mostas, we lic katzij, quix tiqui 'uri chi relsaxic jun nim laj jyub rumal. We tene qui bij che i jyub-i: "Chat el chi; jat chila," qui bij ne che, pues quel 'uri. 'Is quix tiqui chu 'onquíl 'uri. <sup>21</sup>Xui-ri, we quiwaj quiwesaj itzel tew pacha i jun-le, 'o u chac quix tijin chu tz'onoxic che i Dios, xak chi mayij ni wa'im rumal —xu bij i Jesus chique.

**I Jesus xu bij tan chic  
chi ca camsax na**

<sup>22</sup>Xo'on panok, are que tijin chi be pa jyub Galiléa, i Jesus xu bij chique u tijoxelab chi ire, chi Achi aj Chicaaj, ya ca jachtaj na piqui'ab i winak. <sup>23</sup>Ique quiqui camsaj na; xui-ri churox 'ij ca walij na, xu bij. I u tijoxelab, are xqui ta i tzij-le, lic xe oc chi bis.

**Wach u tojic i impuést  
re i rachoch i Dios**

<sup>24</sup>I Jesus cu' u tijoxelab, are xe upon pa tinimit Capernaum, 'o jujun aj tz'onol alcawal xe upon ru' i ma Pédro. Que tijin chu tz'onoxic i alcawal re i rachoch i Dios. Xqui bij che i ma Pédro:

—I tijonel yix, ¿xataba n-cu toj ti impuést re i rachoch i Dios? —xe cha.

<sup>25</sup>—Cu tojo pues —xu bij i ma Pédro.

Are xoc i ma Pédro paja, i Jesus juntir xu bij che:

—¿Wach ca ch'ob yet, a-Simon? I 'atol tzij re u wach i jyub ta'aj, are quiqui tz'onoj alcawal chique i winak, ¿pachin cu' quiqui tz'onoj wi? ¿Xataba quiqui tz'onoj chique i je que ique? N-taj. Xui quiqui tz'onoj chique i ne te cach aj tinimit chi je 'o chiquixol.

<sup>26</sup>—Katzij —xu bij i ma Pédro—. Xui chique i ne te cach aj tinimit quiqui tz'onoj wi.

Are 'uri i Jesus xu bij:

—Entons i je re i 'atol tzij n-quiqui toj taj. Bay, yoj oj re i 'atol tzij chi lic katzij —xu bij—. <sup>27</sup>Xui-ri, n-cakaj ta

caka petsaj i coywal; 'utz jat chiya, ja c'aka awansuélo pa ya. Chawesaj i nabe car we xchaptaj rumal awansuélo. Pu chi', ca rik wi jun sak pwak. Co'on ile ca tojbej re i impuést we yin, xak i awe yet. Cha c'ama bic y cha tojo canok —xu bij i Jesus che.

**Pachin mas naj u 'ij pa  
cu 'at wi tzij i Dios**

**18** <sup>1</sup>Are 'uri xe teheb pan i u tijoxelab i Jesus ru', y xqui bij che:

—I 'atbal tzij aj chicaaj, are ca pe pakawi, ¿pachin 'uri naj u 'ij que'elok? —xqui bij che.

<sup>2</sup>Are 'uri i Jesus xu siq'uij jun ac'al ru', y xu ya chiquiwach. <sup>3</sup>Xu bij chique:

—Katzij i quin bij chiwe: yix we n-qui jalwachij ta i nojbal, we n-qui 'an ta che iwib pacha u no'oj jun ac'al, n-quix oc ta 'uri pa ca 'at wi i tzij chi ca pe chicaaj. <sup>4</sup>Que'el 'uri chi pachin co'on che rib pacha u no'oj i ac'al-i, pachin co'on ch'utin che rib, ire 'ut are i mas naj u 'ij pa cu 'at wi tzij i Dios.

**To' u wach i jun we xa cu  
tzaksaj jun ch'utin**

<sup>5</sup>We 'o jun cu c'ulaj jun ac'al ru' pacha iri, rumal i c'axnabal u c'ux chwe yin, quel 'uri pacha yin quin u c'ulaj. <sup>6</sup>Jun ch'utin chi u cubam u c'ux chwe, we 'o jun co'on che chi ca tzak chupam u mac, nim laj mac 'uri u 'anom ire. Mas 'utz que'el che, we tene ca xim jun ca' rij u kul y ca c'ak bi pa ya, ji'bal-re. I camic-le, mas 'utz chuwach i mac chi u 'anom che. <sup>7</sup>I To' qui wach i winak waral chuwach i jyub ta'aj, man lic 'o ni tzaksabal-que! Lic 'o na; xui-ri to' u wach i jun chi cu tzaksaj jun chic chupam u mac. iMi 'an yix ile!

<sup>8</sup>We are a 'ab, we are awakan ca 'anaw chawe cat macunic, su' cha c'upij y cha c'aka bic. Mas 'utz ile, ca rikbej re a c'aslemal, tupu xa jun a 'ab, xa jun awakan. Mas 'utz ile chuwach i queb a 'ab, queb awakan we xa cat 'e pa 'a' rumal, i 'a' chi n-tu q'uisic. <sup>9</sup>Xak we are

a ba'wach ca 'anaw chawe cat macunic, ile su' chawesaj y cha c'aka bic. Mas 'utz ile, ca rikbej re a c'aslemal, tupu xa jun a ba'wach. Mas 'utz ile chuwach i queb a ba'wach we xa cat 'e pa 'a' re i tojpen rumal'.

#### I tijobal tzij chirij i chij sachnak

<sup>10</sup>Jun ch'utin, mi ch'ob yix chi n-ta kas u 'ij. Quin bij 'u chiwe, i ángel chi je chajal-que nic are wi je 'o chuwach in Kajaw chicaj. <sup>11</sup>Yin chi in Achi aj Chicaj in c'un-nak chi qui to'ic ni'pa i je sachnak.

<sup>12</sup>¿Wach i qui bij yix chi cu 'an jun achi, we je 'o cien u chij, we xsach jun chique? ¿Wach co'on na ire 'uri? ¿Xataba n-que u canaj ta can i novénta y nuéve che i jyub pa i que wa wi, que u tzuébe re i jun chi sachnak? Que u tzucuj na pues. <sup>13</sup>Y we xu riko, mas ca quicot ru' i jun-le chiquiwach i novénta y nuéve chi n-xe sach taj. <sup>14</sup>Xak queje co'on i Kajaw yix chi 'o chicaj. Craj ire chi mi jun ch'utin pacha iri ca sachic.

#### Wach u cuyic u mac jun awachalal

<sup>15</sup>We 'o jun awachalal u 'anom mal chawe, cha 'ijla 'uri are utuquel; queje ile cha sakirsaj che wach u mac chawe. Ire, we xu ta u be wach i xa bij che, quix canaj chic can 'uri iwatz i cha' iwib.

<sup>16</sup>Ire, we n-co'on ta cas wach i ca bij che, te'uri che i siq'uij ni jun chic, queb chic, iwu'. Queje ile i je queb oxib quiqui ta wach u cojic u mac ca 'ano. <sup>17</sup>We xak n-co'on ta cas ire chique ique, cha bij 'uri pa molbal'ib. We xak n-co'on ta cas chique pa molbal'ib, chi 'ana 'uri che pacha lic n-ta Dios ru', o pacha jun mal laj aj tz'onol alcawal.

<sup>18</sup>Katzij i quin bij chiwe: wach tak i qui 'atij yix waral chuwach i jyub ta'aj, i Dios cu ya u wach iwu', xak cu 'atij chila chicaj. Xak wach tak qui ya chique i je re i Dios chi quiqui 'an waral, xak ca ya' na li chique rumal i Dios chila chicaj.

<sup>19</sup>Xak quin bij chiwe: we je 'o queb chixol yix waral chuwach i jyub ta'aj lic

xak jun i qui nojbal are quiqui tz'onoj che i Dios, in Kajaw chila chicaj cu ya na chique wach i quiqui tz'onoj. <sup>20</sup>Queje ile co'ono, man pa je 'o wi je queb je oxib qui molom na quib wumal yin, xak yin in 'o na cu' ique —xu bij chique u tijoxelab.

<sup>21</sup>Te'uri i ma Pédro xtejeb ru' i Jesus y xu bij che:

—Wajwal, ¿ni'pa mul quin cuy ni u mac i wachalal we macun-nak chwij? ¿C'a wukub mul quin cuy na? —co'ono.

<sup>22</sup>I Jesus xu bij:

—N-xui ti wukub mul ca cuyu. We a cuyum wukub mul, cha cuyu chic seténta mul i wukub-le —xu bij.

#### I mocom chi n-xu cuy tu mac i rachi'il

<sup>23</sup>(Te'uri xu bij jun chic tijobal tzij chique): —I 'atbal tzij aj chicaj are pacha xu 'an jun 'atol tzij; xe u siq'uij u mocom ru' y xu bij chique chi quiqui toj ni qui c'as ru'. <sup>24</sup>Are xu jek u 'onquil ile, xqui c'am li jun ru' chi 'o uq'ual mil u c'as u 'anom ru'. <sup>25</sup>I jun-le lic n-ta ca 'e u c'ama wi, tojbal na re u c'as u 'anom. Rumal-i, i 'atol tzij xu bij chi ca c'ayix na, junam ru' i rixokil, tak i rac'al, xak ronojel i ubitak-re, tojbal na re u c'as. <sup>26</sup>Te'uri i u mocom-le xa xuqui chuwach u patron y xu bij che: “Nim laj winak, cha ya u nimal a c'ux chwe; coq'tuil quin toj ni ronojel in c'as chawe,” co'ono. <sup>27</sup>Are 'uri u patron xril to'bal u wach, y xu chup u c'as; te'uri xro'taj bic. <sup>28</sup>Ire xa 'ec; are 'uri xu c'ulaj jun rach ajchac. I rach ajchac-le, 'o jubi' u c'as ru'; are 'uri xu chapo y xoc chu chapic pu kul, y xu bij che: “Cha tojo chwe ni'pa a c'as wu,” co'on che. <sup>29</sup>I rach ajchac xa xuqui chuwach y xu bij che: “Cha ya u nimal a c'ux chwe; coq'tuil quin toj ni ronojel in c'as chawe,” co'ono. <sup>30</sup>I jun n-xraj taj; su' xu chapo y xu tz'apij pa cárcel. Chila xu ya wi c'a cu toj ni u c'as che. <sup>31</sup>Xak je 'o juban cach ajchaquib xquilo wach xo'on i jun che i cachi'il. Ique lic c'ax xqui na'o wach i xa 'ani che. Rumal-i, xe 'e qui bij

© 18.9 I usuc' i tzij-i are iri: i n-'us ta laj a nojbal, cha jalwachij na; ma 'an chic pacha n-ti Dios awu', mokxa cat 'e pa 'a' rumal. We ca ch'ob yet 'o jujun n-ta kas qui 'ij chuwach i Dios, chawesaj i nojbal-le pa c'ux.

che i qui patron wach u mac i jun xu 'ano. <sup>32</sup>I qui patron xu tak u siq'uixic, y xu bij che: "Lic at mal laj winak! Yin xin bij na chawe chi ni'pa i a c'as wu', 'is xin cuy na chawe, man lic xa tz'onoj cuybal mac chwe. <sup>33</sup>Rumal-i, 'o chakul yet queje cha 'ana ni ile, cha cuyu ni u mac i jun we 'o u c'as awu'. 'O u chac chawila to'bal u wach, pacha xin 'an yin chawe yet, xwil to'bal a wach." Queje ile xu bij i 'atol tzij che. <sup>34</sup>Y lic xpe roywal che. Rumal-i, xu tak u tz'apixic pa cárceel, c'a cu toj ni ronojel u c'as che. (Queje ile i tijojbal tzij xu bij i Jesus chique.)

<sup>35</sup>Pa q'uisbal-re xu bij chique:

—Xak queje ca 'ani chiwe yix rumal in Kajaw aj chicaj, we yix chi jujunal n-qui cuy ti qui mac iwachal ronojel i c'ux —xu bij i Jesus chique.

#### N-us taj quiqui jach quib je c'ulanic winak

**19** <sup>1</sup>Are xutzin chu bixquil ronojel ile, i Jesus xel pa Galiléa y xa 'e pa Judéa. Chila xu 'axuj i ya re i Jordan. <sup>2</sup>Je q'ui i winak je teren chirij; chila xe rutzirsaj iwabib.

<sup>3</sup>Are 'uri xe upon juban aj Fariséo ru'; cacaj quiqui c'am u pam, tzaksabal-re quiqui 'ano. Y xqui tz'onoj che:

—Jun achi, we craj cu jach can i rixokil, ¿wach cu bij i 'atbal tzij tz'ibtal can rumal i mam Moises? ¿Xa bi chi maquil 'utz nawi cu jacho? Queje ile xqui bij che i Jesus.

<sup>4</sup>Ire xu la' u wach chique:

—¿Xataba n-iweta'am taj wach i tz'ibtal can chupam u wuj i Dios? Cu bij chi i Dios chu xebal 'ij sak, are xe u 'an i winak, "jun achi, jun ixok xe u yijba."

<sup>5</sup>Xak xu bij i Dios chi "are i rumal 'uri chi jun achi 'o u chac quel cu' u kajaw u chuch man cacuc'aj quib ru' i rixokil. I je queb-le que'elok xa je jun chi winak." (Queje ile tz'ibtal canok.) <sup>6</sup>Rumal-i que'elok ne te queb chic, ique xa je jun xe'elok. Rumal-i i winak, n-ta piqui'ab quiqui yoj ile chi u yijbam i Dios xa jun u 'anom chique. (Queje ile xu bij i Jesus chique i aj Fariséo.)

<sup>7</sup>Te'uri xqui tz'onoj chic che i Jesus:

—¿Wuchac 'uri xu bij i mam Moises chique i achiab chi 'o u chac quiqui ya jun wuj chique i quixokil, jachbal-que quiqui 'ano? Te'uri quiqui jach 'u bic. ¿Wuchac 'ut queje xu bij ire ile, we n-queje ta craj i Dios ile? —xqui bij che i Jesus.

<sup>8</sup>Ire xu la' u wach chique:

—Queje xu ya i mam Moises ile chiwe man yix lic ix buy. Are rumal 'uri chi xu ya chiwe qui jach ni iwixokil. Xui-ri, chu xebal 'ij sak, n-queje ti ile u ch'obom li Dios. <sup>9</sup>Quin bij iri chiwe: we 'o jun cu jach nubi i rixokil, y we i rixokil n-tu mac u 'anom ru' jun chic achi, i rachijil te'ek 'o u mac 'uri chuwach i Dios we xcuc'aj chic quib ru' jun chic ixok. Xak we jun achi ca q'uiji ru' jun ixok we xa jachtal can rumal i rachijil, lic 'o ni u mac 'uri i ucab achi chuwach i Dios. (Queje xu bij i Jesus ile chique.)

<sup>10</sup>Te'uri i u tijoxelab xqui bij che:

—We queje que'el ile, jun achi ru' jun ixok, mas 'utz 'uri we n-cu tzucuj ta rixokil —xe cha.

<sup>11</sup>I Jesus xu bij chique:

—Colo katzij ile, xui-ri n-conojel taj quiqui ch'ijo chi n-ta quixokil; xui ique quiqui ch'ijo chi yatal u cho'ab i Dios cu'. <sup>12</sup>Je 'o i achiab chi n-quiqui tzucuj ta quixokil: 'o jujun chique chi n-tz'akat ti qui ch'acul chi calaxic; xak 'o jujun chique chi n-tz'akat ti qui ch'acul man xa ril 'antal chique; xak 'o jujun chi n-quiqui tzucuj ta quixokil rumal u chac i Dios, u chac i 'atbal tzij aj chicaj. We 'o jun ca tiqui chu ch'ijic ile, chu 'ana na —xu bij.

#### I 'atbal tzij aj chicaj, que ique chi je pacha ac'alab

<sup>13</sup>Je 'o jujun winak xe qui c'am li ac'alab ru' i Jesus, cu yabey na re u 'ab piquiwi, xak cu tz'onbey i 'utz re i Dios piquiwi. Xui-ri, i u tijoxelab xqui jek qui 'atixic i je uc'awnak i ac'alab. <sup>14</sup>I Jesus, are xrilo, xu bij chique:

—Chi ya chique i ac'alab que c'un wu'; me i 'atij, man ni'pa i je pacha ac'alab



piqui c'ux, 'o-que che i 'atbal tzij aj chicaj —xu bij chique u tijoxelab.

<sup>15</sup>Are 'uri xu coj u 'ab piquiwi i ac'alab; te'uri xel chila.

**Jun achi beyom xu tzucuj u c'aslemal chi n-tu q'uisic**

<sup>16</sup>O jun achi, c'a ala, xupon ru' i Jesus y xu bij che:

—Nim laj winak, at 'utz laj tijonel, čwach tak i 'utz quin 'an na, quin rikbej re in c'aslemal chi n-tu q'uisic? —xu bij.

<sup>17</sup>I Jesus xu bij che:

—čWuchac ca bij “utz” chwe yin? N-ta jun chi 'utz, xui Dios —xu bij—. Xui-ri we cawaj cat oc che i c'aslemal katzij, cha 'ana pacha cu bij u tzij u pixab i Dios —xu bij che.

<sup>18</sup>—čPachique che? —xu bij i achi.

I Jesus xu bij che:

—Mat camsanic; ma kajsaj a 'ij ru' jun ixok chi n-awixokil taj; ma 'an ela'; mat t'oronic; <sup>19</sup>cha cojo qui 'ij a kajaw a chuch; y c'ax cha na a lo'c'anij pacha c'ax u na'ic awib yet —xu bij i Jesus che.

<sup>20</sup>—Ronojel ile 'is quin tijn chu 'anic; in 'anom na lok c'a are in ch'utin —xu bij i achi che—. čWach c'a craj quin 'ano? —xu bij.

<sup>21</sup>I Jesus xu bij che:

—We cawaj lic n-ta chic rajwaxic chawe chuwach i Dios, jat, ja c'ayij ni'pa i 'o awu', y cha jacha chique i niba'ib. Ca rik 'uri a beyomal chicaj. Te'uri chat petok y chat terej chwij —xu bij i Jesus che.

<sup>22</sup>I achi, are xu ta ile, lic ca bisonic, man lic beyom; xu maj bi u be, y xa 'ec. <sup>23</sup>Are 'uri i Jesus xu bij chique i u tijoxelab:

—Katzij i quin bij chiwe: i beyomab, c'ax coquic pu'ab i 'atbal tzij aj chicaj.

<sup>24</sup>Quin camulij chic u bixquil: c'ax roquic jun beyom, coc pu'ab i Dios; c'ax ni ile chuwach i ric'awic jun camey<sup>d</sup> che i tel re jun acuxa —xu bij chique.

<sup>25</sup>I u tijoxelab, are xqui ta ile, lic xqui bisoj. Te'uri xe oc chu bixquil chiquiwach:

—čPachin quelsax na 'uri chupam u mac? —xe cha.

<sup>26</sup>I Jesus xe u takej y xu bij chique:

—I winak n-que tiqui ta chu 'anic ile; xui-ri i Dios ronojel 'is ca tiqui che —xu bij.

<sup>27</sup>Are 'uri i ma Pédro xu bij che:

—Kajwal, yoj, ronojel ni'pa i 'o ku', xka canaj canok y oj terejnak chawij. čWach i ca ya' chake 'ut? —co'ono.

<sup>28</sup>I Jesus xu bij chique:

—Katzij i quin bij chiwe, are cu rik i 'ij chi ca jaltaj ronojel ni'pa 'o chuwach i jyb ta'aj, are 'uri ca ya' i 'ij yix. Are 'o chic i Achi aj Chicaj<sup>e</sup> pa nim laj u 'atbal tzij, xak yix chi ix terejnak chwij xak ca ya' i patan nim u 'ij. Yix 'uri qui 'at ni tzij piquiwi i je cablajuj tzobaj aj Israel winak. <sup>29</sup>Conojel ni'pa i co'tam can ubitak-que wumal yin, nim na quiqui ch'ac puwi ile. We 'o jun u canam can i rachoch, o we i ratz u cha', o we i ranab, o we u chuch u kajaw, o we u canam can rixokil, o we i rac'al, o we i rulew xa wumal yin, nim i cu ch'ac na. Ca ya' na 'uri jun científico che, puwi ni'pa ile chi xa jun 'o te'ek ru', xak ca ya' jun u c'aslemal chi n-tu q'uisic. <sup>30</sup>Xui-ri, ni'pa i je nabe wo'or, je q'ui na que canaj can pa q'uisbal-re; xak je q'ui chi je 'o can pa q'uisbal-re wo'or, are ique are i que nabeaj na —xu bij i Jesus chique.

**I tijojbal tzij re i ajchaquib**

**20** <sup>1</sup>(Are 'uri i Jesus xu bij jun chic tijojbal tzij chique, xu bij:)

—I 'atbal tzij aj chicaj co'on pacha jun rajaw ticon chi que u tzucuj rajchaquib quiqui mol ni u wach i úva. Ire we' xa 'ec, que u tzucuj u mocom. <sup>2</sup>Xu rik u mocom y xu bij chique chi are jun sak pwak i cajil re jun 'ij. Te'uri xe u tak bi pa chac pa rulew. <sup>3</sup>Xo'on panok, colo a las nuéve re i ra'anbal 'ij, xa 'e pa q'uebal. Xe u rika juban achiab n-ta quiqui 'ano. <sup>4</sup>Xu bij chique: “We quiwaj i chac, jix pa wulew, je i molo in cosech; y yin quin toj na pacha ca majaw chiwe,” xu

<sup>d</sup>19.24 I “camey” ca bixic-i are jun chicop aj ekan, mas nim chuwach jun caway. <sup>e</sup>19.28 Are i Jesus mismo.

bij chique. Ique xe 'ec. <sup>5</sup>Xak queje xo'on pa'ij, xak queje xo'on a las tres re u kajbal 'ij. <sup>6</sup>Xak queje tan chic xo'ono are xkaj i 'ij, colo a las cinco: xa 'e pa q'uebal, xe u rika juban achiab n-ta quiqui 'ano. Y xu bij chique: "¿Wach qui 'olba yix chi, jun 'ij? ¿N-ta ba i chac-i?" co'ono. <sup>7</sup>Y xqui bij ique che: "Mi jun u sujum chac chake," xe cha che. "Jix pa wulew," xu bij i achi, "je i molo in cosech; yin quin toj na pacha ca majaw chiwe," xu bij chique. <sup>8</sup>Are ya xoc a'ab, i rajaw i chac xu bij che i uc'awnak i mocom: "Che a siq'uij i ajchaquib y che a tojo. Nabe che a tojo bi ni'pa i xe c'un q'uisbal-re. Are i je ocnak nabe, q'uisbal-re che a tojo bic," xu bij che. <sup>9</sup>Xe'elok chi are i xe oc a las cinco re i kajbal 'ij, xya' bi jun sak pwak chique. <sup>10</sup>Are i je ocnak nabe, quiqui bij ique mas nim ni quiqui ch'ac ique chiquiwach i je ocnak q'uisbal-re, quiqui bij ique. Xui-ri, xak xa jun sak pwak xya' chique chiqui jujunal. <sup>11</sup>Are xqui chapo, xe oc chu bixquil che i rajaw i chac chi n-'us ta xo'on che i cajil. <sup>12</sup>Xqui bij: "Are i je c'un-nak q'uisbal-re, xak jun i qui tojic xa 'an ku' yoj. Ique, xa jun 'or xe chacunic, y yoj jun 'ij entera xka ch'ij i chac, xka ch'ij i 'ij," xqui bij che i rajaw. <sup>13</sup>Ire xu bij che i jun, "Chatape', yin n-xix in t'or taj. ¿Xataba n-xka bij ta wa, chi quix chacun jun 'ij chuwach jun sak pwak? Xka bij pues. <sup>14</sup>Cha chapa i awajil y jat. Are i cwaj yin, quin ya na che i jun pacha i xin ya chawe yet; n-ta co'ono we xa pa q'uisbal-re xoquic. <sup>15</sup>¿Xataba n-ta we yin che in mer, wach cwaj quin 'an che? 'Olic pues. ¿O xa ca titat a pam che, chi 'utz xin 'an yin chique i juban?" Queje ile xu bij i rajaw. <sup>16</sup>Are que'el 'uri, ni'pa i je pa q'uisbal-re, que'elok je nabe; y xak i je nabe, que 'elok que canaj c'a pa q'uisbal-re. Queje que'el ni ile, man tupu je q'ui i je sic'tal na, ne te q'ui je chatalic —xu bij i Jesus chique.

**I Jesus xu bij tan chic  
chi ca camsax na**

<sup>17</sup>Xo'on panok, i Jesus ca tijin chi be cu' u tijoxelab, 'enam-que pa Jerusalem.

Are 'uri xe u siq'uij i cablajuj ru', y xe u 'ijla qituquiel:

<sup>18</sup>—Yix iweta'am ya xka maj bi ka be pa Jerusalem. Are coj upon chila, yin chi in Achi aj Chicaj, quin jachtaj na piqui'ab i caj'atzil i sacerdoté, piqui'ab i tijonel re i 'atbal tzij. Ique quiqui 'at na tzij pinwi y quiqui bij na chi 'o u chac quin camsaxic. <sup>19</sup>Te'uri quin qui jach na piqui'ab i ne te aj Israel winak: ique 'ut quin qui yo'ya, quin qui ch'ay na, quin qui camsaj chuwach cruz. Xui-ri, churox 'ij, quin walijisax tan chic —xu bij i Jesus chique.

**Wach i xu tz'onoj i qui chuch  
i ma Jacóbo, i ma Wan**

<sup>20</sup>Te'uri i qui chuch i ma Jacóbo i ma Wan, chi je u c'ojol i mam Zebedéo, xtejeb pan ru' i Jesus je rachi'il i ralab. Xuqui chuwach i Jesus, tz'onbal-re jun pawor che. <sup>21</sup>I Jesus xu tz'onoj che:

—¿Wach cawaj yet? —co'ono.

I ixok xu bij:

—Are at 'o chic che a 'atbal tzij, cwaj yin cha ya chique i queb wac'al-i que cubi jujun pa tak a tzal, jun pa wikabim, y jun pa moxim —xu bij i ixok che.

<sup>22</sup>—Yix n-iweta'am taj wach i qui tz'onoj —xu bij i Jesus chique—. Ni'pa i c'ax quin ic'aw na wi yin, ¿quix tiqui yix 'uri chu ch'ijic ile? Ni'pa i uyej chi quin ic'aw na wi yin, ¿quix tiqui yix che ile? —xu bij chique.

—Coj tiqui'ic —xe cha.

<sup>23</sup>Are 'uri i Jesus xu bij:

—Katzij, yix 'is quix ic'aw na chupam i c'ax-i, xak qui tij ni uyej pacha quin ic'aw wi yin. Xui-ri, n-ta pin'ab yin quin bij pachin ca cubi pin wikabim xak pin moxim. Xui in Kajaw 'o pu'ab; ire u yijbam chic i c'olbal-le, ire reta'am pachin que q'uiji che —xu bij i Jesus chique.

<sup>24</sup>I lajuj chic u tijoxelab, are xqui ta wach i xqui bij i je queb-le chi je catz qui cha' quib, ique xpe coywal chique. <sup>25</sup>Are 'uri i Jesus xe u siq'uij y xu bij chique:

—Yix iweta'am chi i nimak tak 'atol tzij quiqui 'an che quib pacha je cajaw

i winak chi je 'o piqui'ab; i winak chi nimak qui patan que rajawin piquiwi i cach winak. <sup>26</sup>Xui-ri; n-ix ta queje yix ile. Are i qui 'an ni yix, pachin craj que'elok nim u 'ij, cha chacun 'uri chiquij i rachi'il. <sup>27</sup>Are pachin craj cu ya rib chu nabeal, chu 'ana 'uri che rib pacha mocom chiquij i rachi'il. <sup>28</sup>Chu 'ana 'uri che rib pacha quin 'an yin chi in Achi aj Chicaj; in c'un-nak na, pacha mocom chiquij i winak; n-are ti ique je in mocom yin. In c'un-nak man quin ya na wib chi camic, tojbal-re i quelbal pa c'ax chique uq'uial winak —xu bij i Jesus chique.

#### I Jesus xe rutzirsaj je queb mawach

<sup>29</sup>Xo'on chupanok, ique que tijin quelic pa tinimit Jerico, je q'tui i winak je teren chirij i Jesus. <sup>30</sup>Chila je 'o wi queb mawach je ch'uquernak pa be. Are xqui ta chi ya quic'aw i Jesus, ique xe siq'uin chu bixquil:

—iNim laj winak! iYet chi at umuk uxiquin can i mam David, chawila to'bal ka wach! —xqui bij.

<sup>31</sup>I winak chi je teren bi chirij i Jesus xe qui yajo y xe qui 'atij. Xui-ri, ique xa xqui cowij mas u bixquil che i Jesus:

—iNim laj winak! iYet chi at umuk uxiquin can i mam David, chawila to'bal ka wach! —xe cha.

<sup>32</sup>Te'uri i Jesus xtac' canic y xe u siq'uuj ru'. Xu bij chique:

—¿Wach quiwaj quin 'an chiwe? —xu bij.

<sup>33</sup>Ique xqui bij che:

—Nim laj winak, cakaj coj tzunic —xe cha.

<sup>34</sup>Are 'uri i Jesus c'ax xe u na'o. Xu chap qui ba'wach y juntir xe tzunic. Te'uri xak ique xe terej bi chirij i Jesus.

#### Wach u cojic u 'ij i Jesus are xoc pa Jerusalen

**21** <sup>1</sup>Are nakaj chic je 'o wi pa Jerusalen, xe upon pa tinimit Betfage, pa 'o wi i ral jyub Olívos. Are

'uri i Jesus xe u tak bi queb u tijoxelab, <sup>2</sup>xu bij chique:

—Jix che i aldéa-le chi 'o pan chakawach. Chila qui rik wi jun ati asna yukulic, 'o jun rac'al ru'. Chi toro lok, y che i c'ama lok. <sup>3</sup>Y we 'o ca tz'onow chiwe wach u chac quix tijin chu toric, chi bij che chi cu rik u chac che i Kajwal, y ire juntir cu tzalij chal chawe, chix chok che —xu bij Jesus chique.

<sup>4</sup>Queje xqui 'an ile, y xe'el 'uri pacha u tz'ibam can jun ajbil u tzij i Dios ujer. Ire u tz'ibam canok:

<sup>5</sup>Cha bij iri chique i aj tinimit Sion:<sup>f</sup>  
“I 'atol tzij yix ya ca c'un iwu'.

Ire nu 'anom ta nim che rib,  
xa cul chirij jun buru ca c'unic;  
ca c'unic cul chirij jun ral buru,  
rac'al jun ati asna aj ekan.”

(Queje ile u tz'ibam can i ajbil u tzij i Dios ujer.)

<sup>6</sup>I u tijoxelab i Jesus xe 'ec y xqui 'an na pacha i bital chique.

<sup>7</sup>Xqui c'am li ati asna ru' i rac'al. Te'uri xqui coj qui 'u' chiquij; i Jesus xa 'an chirij. <sup>8</sup>Je q'ui i winak je rachi'il pa be; ique xqui rip i qui 'u' chuwach, wikbal re i pu be. Xak je 'o jujun xqui ch'up u xak che' y xqui coj pa be. <sup>9</sup>I winak chi je nabe chuwach, xak i je teren lok, conojel xe oc chi sic':

—iNim u 'ij ire chi umuk uxiquin i ka rey mam David! iDios chu ya ni 'utz puwi i jun-i chi u takom na lok!<sup>g</sup>  
iChocsax ni u 'ij i Dios! (Queje ile xe siq'uin chu bixquil.)

<sup>10</sup>Are xoc bi i Jesus pa Jerusalen, i winak conojel xe ch'ujer na rumal i quicotemal. Je q'ui xe tz'onowic:

—¿Pachin i achi-le? —xe cha.

<sup>11</sup>—Are i Jesus, chi ajbil u tzij i Dios; ile chi aj Nazaret, u cwenta i Galiléa — xqui bij i winak.

#### I Jesus xe resaj i je aj c'ay pa rachoch i Dios

<sup>12</sup>Te'uri i Jesus xoc pa rachoch i Dios; are 'uri 'is xe resaj ni'pa i aj c'ayinel xak

<sup>f</sup>21.5 I tinimit Sion-le, are i Jerusalen mísmo. <sup>g</sup>21.9 I mer tzij xu bij are iri: i jun chi ca c'un publi i Kajwal.

i aj lo'onel je 'o xe ja. Xe u bal'atij qui mexa i je aj jalwachil u wach qui mer i winak, xak queje i qui tem i je aj c'ay palomax. <sup>13</sup>Xu bij chique:

—I Dios, chupam u wuj, u bim can i tzij-i: “I wachoch, lic jun ja re qui tz'onbal i winak chwe”; xui-ri yix i 'anom qui jul ili'omab che —xu bij i Jesus chique.

<sup>14</sup>Chila pa rachoch i Dios je 'o jujun mawach, xak je 'o jujun je clis je 'o chila. Ique xe teheb pan ru' i Jesus, y ire xe rutzirsaj. <sup>15</sup>Xak je 'o jujun ac'alab je 'o chila que tijin chi sic': “iNim u 'ij ire chi umuk uxiquin i ka rey mam David!” xqui bij. I ajwab sacerdoté, xak i je tijonel re i tzij pixab, are xquilo wach xo'on i Jesus, are xqui ta qui tzij i ac'alab, ique lic xpe coywal. <sup>16</sup>Are 'uri xqui bij che i Jesus: —¿N-ca ta ti yet wach que tijin chu bixquil? ¿'Utz nawi ile, ca bij yet? —xe cha.

—Katzij xin ta —xu bij i Jesus chique—. Ique que tijin chu 'onquil pacha u tz'ibam can jun ajbil u tzij i Dios ujer. Ire xu bij che i Dios:

Yet a 'anom chique i ac'alab,  
xak chique i c'a que tz'umanic  
lic quiqui bixaj a 'ij (—xu bij).

<sup>17</sup>Are 'uri i Jesus xe ro'taj canok y xa 'e c'a Betánia, que u 'ana jun a'ab chila.

#### **Wach u chakijsaxic jun che' xo'on i Jesus**

<sup>18</sup>Are xsakiric, xu maj chubi u be, xa 'e pa Jerusalen. Are ca tijin chi be, i Jesus xpe u numic. <sup>19</sup>Xak te'et xril jun che', u che'lal hígo, 'o xucut be. Ire xa 'e pan ru' i che'; lic n-ti u wach xu rik che, xui u xak. Are 'uri i Jesus xu bij jun c'okbal tzij che i che':

—iYet n-cat wachin ta chic! —xu bij che.

Are 'uri i che' juntir xchakijic. <sup>20</sup>I u tijoxelab, are xquil ile, lic xqui bisoj. Xqui bij che i Jesus:

—¿Wach xa 'ani che i che'-le, chi juntir xchakijic? —xe cha.

<sup>21</sup>I Jesus xu bij chique:

—Katzij i quin bij chiwe, we lic 'o u cubibal i c'ux, we lic n-ta cu bij i c'ux,

xak yix quix tiqui chu 'anic pacha i xin 'an yin che i che-i. Y n-xui ta la ile, xak quix tiqui che, we qui bij che i jyub-i, “Chat el chi, ja c'aka awib pa mar,” qui bij che, ile lic co'on na. <sup>22</sup>Yix, wach i qui tz'onoj che i Dios, we lic qui cojo chi quiwil na, ca ya' na 'uri chiwe —xu bij i Jesus chique.

#### **Xtz'onox che i Jesus bi chi 'atbal tzijal 'o pu'ab**

<sup>23</sup>Te'uri i Jesus xoc chic pa rachoch i Dios y xoc chi qui tijoxic chila. Are 'uri xe teheb pan i caj'atzil i sacerdoté ru', xak i nimak tak mam'ib que i aj Israel, y xqui tz'onoj che:

—¿Pachin xyaw ile pa'ab chi cat tijin chu 'onquil? —xqui bij che—. ¿Bi chi 'atbal tzijal 'o pa'ab, chi queje ca 'an ile? —xe cha.

<sup>24</sup>I Jesus xu bij chique:

—Xak yin quin tz'onoj jun tzij chiwe. We qui bij usuc' chwe, te'uri xak quin bij yin chiwe bi chi 'atbal tzijal 'o pin'ab. <sup>25</sup>Chi bij chwe pachin xyaw pu'ab i ma Wan cu kajsaj ya piquiwi i winak. ¿Are i Dios yawnak che, o xa winak yawnak che? —xu bij i Jesus chique.

Ique xe oc chu bixquil chiquiwach:

—¿Wach caka bij na che? —que cha—. We caka bij chi are i Dios yawnak ni ile pu'ab i ma Wan, ire cu bij na 'uri chake: “¿Wuchac 'uri n-xi coj taj wach i xu bij?” <sup>26</sup>We xak caka bij chi xa ru' winak petnak wi wach i xu bij i ma Wan, lic caka xij kib chique i winak; man conojel i winak quiqui bij chi ma Wan lic ru' i Dios petnak wi wach i u bim —xqui bij chiquiwach.

<sup>27</sup>Rumal-i xqui bij che i Jesus:

—N-keta'am taj —xe cha che.  
—Xak yin n-quin bij ta 'uri chiwe wach i 'atbal tzij 'o pin'ab, chi quin 'an tak iri —xu bij chique.

#### **Queb alabom chi xe tak rumal qui kajaw**

<sup>28</sup>Te'uri i Jesus xu bij chique:

—¿Wach qui ch'ob yix che i tzij-i? 'O jun achi, je 'o queb u c'ojol. I achi xu

bij che i jun: “Wac'al, jat wo'or pa chac chupam in ticon,” xu bij che. <sup>29</sup>I rac'al xu la' u wach che: “N-cwaj taj,” xu bij. Xui-ri, xu jalwachij u no'oj y xa 'e pa chac. <sup>30</sup>Te'uri i qui kajaw xak xu 'ijla i jun chic, pacha xo'on che i nabe. Ire xu bij chi ca 'ec; “Ey,” co'ono, xui-ri, n-xa 'e taj. <sup>31</sup>¿Pachique chique i je queb u c'ojol xo'ono pacha craj i qui kajaw? —xu bij i Jesus chique i nimak tak mam'ib.

—Are i nabe —xe cha.

—Katzij i xi bij —xu bij i Jesus chique—. Xak quin bij na yin chiwe chi 'o i je mal laj tak aj tz'onol alcawal, xak 'o ixokib ajmaquib que tijin coquic pu'ab i Dios, y yix n-taj. Ique je pacha i rac'al i achi chi xo'ono pacha craj u kajaw. <sup>32</sup>Xui-ri yix ix pacha i ucab u c'ojol man n-xix cojon ta che u tzij i ma Wan aj kajsanel ya. Xc'un ire chu c'utic chiwe wach craj te i c'aslemal, xui-ri n-xix cojon taj. I je aj tz'onol alcawal, xak i ixokib ajmaquib, ique xqui cojo. Tupu xiwil yix ile, n-xi jalwachij ti nojbal, cojbal-re u tzij —xu bij i Jesus chique.

**Wach xqui 'an i aj mediant  
che u c'ojol i rajaw ulew**

<sup>33</sup>Te'uri xu bij chique:

—Chi ta chic jun tijojbal tzij quin bij na chiwe. 'O jun achi nim i rulew, u ticom úva chuwach. Te'uri xu coj coral chirij; xu yijba pa quiqui yitz' wi u wa'al i úva, xak xu yijba jun ral ja tac'tic chupam i ticon, chajbal-re ronojel. Te'uri xe u coj jujun ajchaquib, je aj a média ru'; y xa 'e ire naj che jun tinimit. <sup>34</sup>Are xu rik i 'ij re i cosech, xe u tak li u mocom chu tz'onoxic i re ire chique i raj mediant. <sup>35</sup>Are xe upon i mocom, xe qui chapo. I jun, xqui ch'ayo; i jun chic, xqui camsaj; i jun chic, xqui coj abaj che. <sup>36</sup>Te'uri i rajaw ticon xe u tak chali juban chic u mocom, mas je q'ui na chiquiwach i je nabe. Are xe uponic, i je raj mediant xqui 'an chic chique pacha xqui 'an chique i juban chi je nabe.

<sup>37</sup>Pa q'uisbal-re, xu tak li i mer u c'ojol. Xu ch'ob ire: “Ique lic que cojon

na che i wac'al-i,” xu ch'ob ire. <sup>38</sup>Xui-ri, are xquil i u c'ojol i rajaw ulew, xqui bij chiquiwach: “Are ire-le are i rajaw ulew co'on panok; chaka camsaj,” xe cha, “man yoj coj canajic oj rajaw,” xe cha. <sup>39</sup>Rumal-i xqui chapo, y xquesaj li chuwach ulew, y xqui camsaj. (Queje ile i tijojbal tzij xu bij i Jesus chique.)

<sup>40</sup>Te'uri xu tz'onoj chique:

—Bay, are ca c'un ni rajaw i ulew, ¿wach co'on ni ire chique i ajchaquib-le? —xu bij.

<sup>41</sup>Ique xqui bij:

—Ire lic que u camsaj ni je aj 'anol mal-le; lic n-cril ta to'bal qui wach. Te'uri cu ya i rulew chique juban chic aj mediant, chi quiqui jach i re ire che, are cu rik i 'ij —xe cha i mam'ib che i Jesus.

<sup>42</sup>Te'uri i Jesus xak xu bij chique:

—¿Xataba n-iwilom taj wach tz'ibtal can chupam u wuj i Dios? Queje iri cu bij:

I abaj chi n-xcaj ti xqui coj i je aj 'anol ja,

are i abaj-le chi xe'elok lic nim ni u chac che i cubibal ja.

Are i xe'elok-le, are i Kajwal Dios xa 'anawic,

y kakil yoj, lic 'utz ile chi u 'anom ire.

(Queje ile tz'ibtal canok.)

<sup>43</sup>Rumal-i, quin bij chiwe chi Dios cresaq ni u chac<sup>h</sup> pi'ab yix y cu ya na piqui'ab juban chic ajchaquib je 'utz, chi quiqui ya ni cosech che i Dios pacha ca majawic. <sup>44</sup>I abaj-le chi xin bij chiwe, we 'o jun ca 'e tzak puwi, xa ca paxic; xak i abaj-le, we ca tzak chirij jun winak, lic co'on na c'ajc'aj che —xu bij i Jesus chique.

<sup>45</sup>I je ajwab sacerdoté, xak i je aj Fariséo, are xqui ta wach i tijojbal tzij xbix chique, ya xquetamaj chi xa are ique que u lap na.

<sup>46</sup>Rumal-i cacaj ique quiqui chapo, xui-ri xqui xij quib chique i uq'ual winak, man i winak quiqui bij chi Jesus ajbil u tzij i Dios.

**Wach xqui 'an i je sic'tal  
che jun c'ulanquil**

**22** <sup>1</sup>I Jesus xu jek chic u bixquil i tijojbal tzij chique. Xu bij:

<sup>h</sup> 21.43 I mer tzij xu bij are iri: Cresaq ni 'atbal tzij aj chicaj pi'ab yix.

<sup>2</sup>—I 'atbal tzij re aj chicaj, pacha iri: 'O jun nim laj 'atol tzij xu yijba i nima'ij re u c'ulanquil i u c'ojol. <sup>3</sup>Are xu rik i 'ij, xe u tak bi u mocom cu' i je siq'uim chic, que'e qui bij chique chi ya yij chic i wa'im. Xui-ri, ique n-xcax ta xe c'unic. <sup>4</sup>Te'uri xe u tak chubi juban chic u mocom chi qui siq'uixic. Xu bij chique: "Ji bij chique ni'pa i je in siq'uim na, chi ya yij chic i wa'im. Chi bij chique chi je in camsam chic i chicop chi je in ti'ojersam. Ronojel 'is yij chic; ique che petok, chix chok chique." <sup>5</sup>Xui-ri, i je siq'uim na, n-xqui 'an ta cas chique i takon. 'O jun chique xa 'e pa rulew, xak jun chic xa 'e chi c'ayinic. <sup>6</sup>Xak je 'o jujun xe qui chap i takon y xqui 'an c'ax chique y xe qui camsaj. <sup>7</sup>Rumal-i, i 'atol tzij lic xpe roywal che; xe u tak bi u soldádo chi qui camsaxic ni'pa i xe 'anaw i camic-le, xak chu poroxic i qui tinimit. <sup>8</sup>Te'uri xu bij chique u mocom: "Ronojel 'is yij chic re i nima'ij, xui-ri ique chi je in siq'uim na, n-xmajaw ta chique chi que petic. <sup>9</sup>Rumal-i, jix yix pa nimak tak be, y che i siq'uuj che i nima'ij ni'pa i que i rik chila," xu bij chique u mocom. <sup>10</sup>Ique 'is xe 'el pa tak be, y xe qui mol ni'pa i xe qui c'ulaj. Xe qui mol i je 'utz laj tak winak, xak i ne te 'utz. Queje ile xqui nojsaj i u paja.

<sup>11</sup>Te'uri xoc i 'atol tzij pa je moltajnak wi i je u siq'uim ru'. Are 'uri xril jun achi cu' chi nu cojom ti u 'u' re i nima'ij. <sup>12</sup>Y xu bij che: "Yet, ¿wach awoquic chi, chi na cojom ti a 'u' re i nima'ij?" xu bij. I jun n-xu rik taj wach cu bij che. <sup>13</sup>Te'uri i 'atol tzij xe u siq'uuj i u mocom, xu bij chique: "Chi xima i u 'ab, i rakan, y chiwesaj bi rija pa 'ekum. Chila co' na, xak cu kach'ach'ej ni uware rumal u bis," xu bij chique. <sup>14</sup>Queje ile que'elok man tupu je q'ui i je sic'tal na, ne te q'ui je chatalic. (Queje i tijobal tzij ile xu bij i Jesus.)

**Chi ya che i 'atol tzij wach 'o re che; xak queje i Dios, chi ya che wach 'o re che**

<sup>15</sup>Are 'uri i aj Fariséo xe 'ec y xe oc chu ch'obic chiquiwach wach jun tzij

quiqui tz'onoj che i Jesus, tzaksabal-re quiqui 'ano. <sup>16</sup>Te'uri xe qui cha jujun je 'o cu', xak juban chic chi je teren chirij i ma Heródes, y xe qui tak bi ru' i Jesus.

—Nim laj winak —xqui bij che, are xe upon ru'—, keta'am chi yet xui i sak laj tzij ca bij. Keta'am chi yet katzij ca c'ut i 'utz laj be re i Dios, lic n-ca 'an ta cas che wach quiqui bij i winak chawij. Yet n-ca coj ta retalil che, tupu je nimak tak winak. <sup>17</sup>Cha bij 'u chake, wach i ca bij yet, ¿'Utz nawi, caka toj impuéstó che i 'atol tzij, o n-'us taj? —xqui bij che.

<sup>18</sup>I Jesus xretamaj chi n-'us ta quiqui ch'obo are xqui bij ile. Xu bij chique:

—Yix, ixa queb i palaj! ¿Wuchac xa tzaksabal-we qui 'ano? <sup>19</sup>Chi c'utu jun sak pwak chwe, chi tojbal re impuéstó —co'ono.

Y xe qui c'ama jun sak pwak. <sup>20</sup>Are 'uri i Jesus xu tz'onoj chique:

—¿Pachin u q'uexwach iri 'o chuwach? ¿Pachin u bi iri tz'ibtal chuwach? —xu bij chique.

<sup>21</sup>—Re i 'atol tzij —xe cha ique.

—Bay, chi ya 'uri che i 'atol tzij wach 'o re ire che, xak chi ya che i Dios wach 'o re ire che —xu bij i Jesus chique.

<sup>22</sup>Ique, are xqui ta ile, lic xqui bisoj che. Are 'uri xqui canaj canok y xe 'ec.

#### **I Jesus xu sakirsaj chi 'o ni qui walijbal i camnak**

<sup>23</sup>Xak are i 'ij-le, je 'o jujun aj Saducéo xe upon ru'. (I aj Saducéo quiqui bij chi i je camnak n-que walij ta chic.) Xqui bij che:

<sup>24</sup>—Nim laj winak, i mam Moises u bim canok chi jun achi, we xcamic, we n-ta rac'al ru' can i rixokil, 'o u chac 'uri ca c'uli i ratz u cha' i achi ru' ixok malcan, pu q'uexel i camnak. Queje ile ca q'uiji na can rac'al i camnak ru' ixok. Je ile u bim canok. <sup>25</sup>Bay, o'onom lok, je 'o wukub ku' yoj, je catz qui cha' quib. I nabe chique xc'uli'ic, y xo'on panok xcamic, n-ta rac'al. I ixok malcan xcanaj can ru' ucab cha'axel. <sup>26</sup>Te'uri i achi-le xcam chic, i ixok xc'uli chic ru' urox cha'axel. I achi-le xak xcamic. Queje

xqui 'an i wukub achiab-le. <sup>27</sup>Xak xo'on panok, xcam i ixok. <sup>28</sup>Bay, we ta que walij chic i camnak, ¿pachique chique i je wukub-le, chi mer rachijil que'elok? Man 'is xc'uli cu' i je wukub achiab-le —xe cha.

<sup>29</sup>I Jesus xu la' u wach chique:

—Yix xa ix sachnak na; n-qui ta tu be wach cu bij u tzij i Dios chi tz'ibtal canok; xak n-iweta'am taj wach i nim laj u cho'ab i Dios. <sup>30</sup>Are que walij ni camnak, que 'elok pacha i u ángel i Dios aj chicaj; n-que c'uli taj. I achiab, i ixokib n-que c'uli ta chic. <sup>31</sup>I qui walijbal i camnak, katzij 'olic. ¿Xataba n-iwilom ti yix wach u bim can i Dios chiwe? U bim can ire: <sup>32</sup>“C'a in u Dios i mam Abraham, xak i mam Isaac, xak i mam Jacob,” xu bij. I oxib-le je camnak chic are xu bij i Dios ile. Bay, chuwach i Dios, c a je c'as na; i Dios n-are ti qui Dios i je camnak, are i qui Dios i je c'aslic —xu bij i Jesus chique. (Queje ile xu sakirsaj chique chi 'o ni qui walijbal i camnak). <sup>33</sup>I winak, are xqui ta ile, lic xqui bisoj che i c'utunic xo'on i Jesus.

#### Wach i tzij 'atz u 'ij, re i tzij pixab

<sup>34</sup>I aj Fariséo, are xqui ta rason chi Jesus xtiqui chu la'ic u wach i qui chi' i je aj Saducéo, xqui mol la quib. <sup>35</sup>O jun chique chi tijonel re i 'atbal tzij u tz'ibam can i mam Moises. Xraj ire xu tz'onoj jun tzij che i Jesus, tzaksabal-re co'ono. Xu bij che:

<sup>36</sup>—Nim laj winak, ¿pachique tzij re i 'atbal tzij mas 'o u chac chi caka cojo? —xu bij.

<sup>37</sup>I Jesus xu bij che:

—“Chawaj Awajwal Dios ronojel a c'ux, ronojel awanima, ronojel a nojbal.” <sup>38</sup>Are i jun-le chi mas 'o u chac coj cojon che; are mas 'o u 'ij ile chiquiwach i juban. <sup>39</sup>Te'uri i ucab tzij (chi 'o u chac coj cojon che) laj cu maj i jun-le. Cu bij: “C'ax che a na a lo'c'anij pacha c'ax u na'ic awib yet ca 'ano,” cu bij. <sup>40</sup>I queb tzij-le are mer u xebal ronojel tak i 'atbal tzij u tz'ibam can i mam Moises, xak are u xebal ronojel tak i c'utunic qui canam

can i ajbil u tzij i Dios. (Queje xu bij i Jesus ile chique.)

#### I Jesus lic Dios; n-to' ta umuk uxiquin can i mam David

<sup>41</sup>Tz'akat c'a qui molom quib i je aj Fariséo, <sup>42</sup>i Jesus xu tz'onoj chique:

—¿Wach qui ch'ob yix chirij i Cristo, chi Toliwe iwoy'em? ¿Pachin i ratit u mam? —xu bij chique.

Ique xqui bij:

—Ire are ni umuk uxiquin can i mam David —xe cha.

<sup>43</sup>Are 'uri i Jesus xu bij chique:

—¿Wuchac 'uri i mam David xu bij “Wajwal” chirij i Cristo are xu lapo? Lic rumal ni u Tawal i Dios xu bij ile. I mam David xu bij i tzij-i:

<sup>44</sup>Xu bij i Kajwal Dios che i Wajwal Cristo:

“Chat cul na pin wikabim, c'a cu rik ni 'ij

que in ya na pawakan ni'pa i je aj ch'o'oj chawij,” xu bij.

Queje ile u tz'ibam can i mam David ujer. <sup>45</sup>¿Wach u 'onquil 'uri chi Cristo xa umuk uxiquin i mam David? ¿Wach u 'onquil ile man lic are i mam David xu bij “Wajwal” che i Cristo? (Queje xu bij i Jesus ile chique i aj Fariséo, cu sakijbej-re chique chi Cristo n-to' ta winak, lic Dios.)

<sup>46</sup>Mi jun chique xu rik chic u la'ic u wach che, mi jupaj. Are xo'on ile, te'uri mi jun xu cowij chic u c'ux chu tz'onoxic mas tzij che i Jesus.

#### I Jesus cu coj qui mac i aj Fariséo, xak i nimak tak aj tijonel

**23** <sup>1</sup>Te'uri i Jesus xoc chu bixquil i tzij-i chique i winak, xak chique u tijoxelab:

<sup>2</sup>—I je tijonel re i 'atbal tzij, xak i aj Fariséo, 'o chiquikul quiqui sakij chiwe wach usuc' i 'atbal tzij chi u tz'ibam can i mam Moises. <sup>3</sup>Rumal-i chix cojon na che, lic chi 'ana cas che wach i quiqui bij; xui-ri, mi 'an yix pacha quiqui 'an ique. Mi 'an na, man ique n-quiqui 'an taj pacha tak i quiqui bij. <sup>4</sup>Ique, nim i



ekan quiqui ya chiquij i winak, c'ax u ch'ijawic; xak n-que ton ta ru', mi xa ta jubí'. <sup>5</sup>Ronojel wach i quiqui 'ano, quiqui 'an na man xa cacaj que 'iltaj cumal i winak. Kus quiquil u c'amic bi jupaj u tzij u pixab i Dios pasim chupam jun ral tz'um chuwach qui palaj. Xak kus quiquil u batz'catixic tz'um rij tak qui 'ab. I tz'um-le xak tz'ibtal jutakpaj u tzij i Dios chuwach; kus quiquil ique we nim u wach. Xak i u chi' i qui 'u', lic nimak i rismachi' 'o che, mas nimak chuwach i que i to' winak. Queje quiqui 'an ique ile, quiquilbej na re i winak chi lic je re i Dios, quiqui bij ique. <sup>6</sup>Are que 'e pa tak nima'ij, xa quiqui tzucuj i chomik laj tak q'uijibal. Are que 'e pa molbal'ib, xak quiqui tzucuj i qui cubical chi 'o u 'ij. <sup>7</sup>Are que 'e pa q'uebal, lic kus quiqui ta are que tioxix cumal i winak, ocsabal re qui ij. Xak kus quiqui ta are ca bix "nim laj tijonel" chique.

<sup>8</sup>Mi 'an yix pacha ique-le; mi ya chique i winak chi quiqui bij "nim laj tijonel" chiwe. Man iwonojel yix, iwatz i cha' iwib; xa jun i Tijonel yix, are i Crísto. <sup>9</sup>Xak mi bij i kajaw che jun winak waral chuwach i jyub ta'aj, cojbal re u 'ij, man xa jun i Kajaw 'olic, are i Ta chicaj. <sup>10</sup>Xak mi ya chique i winak quiqui bij "kaj'atzil" chiwe, man xui i Crísto are Iwaj'atzil. <sup>11</sup>Pachin co'on mocom che rib chiquij i juban, are i mer nim 'uri chixol. <sup>12</sup>Man pachin co'on nim che rib, ire 'ut xa ca kajsax u 'ij; xak pachin co'on ch'utin che rib, ire ca nimarsax na 'uri u 'ij.

<sup>13</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! N-qui c'ut ti sak laj tzij chique i winak; xa qui tz'apij i uchija re i 'atbal tzij aj chicaj are 'o i cacaj que oc bic. Yix n-quiway ta quix oc bic, xak n-qui ya ta chique ique que oc bic.

<sup>14</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! Xa qui maj i cachoch ixokib malcanib, te'uri qui 'an nimak tak i tz'onbal che i Dios, xa sachsabal-re chiquiwach i winak, wach i 'anom.

Queje ile i nimarsam ni tojpen chi ca pe na piwi.

<sup>15</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! Lic quix 'e jela, quix 'e jewa, che i c'utunic qui 'ano, ch'acbal na re jun i tijoxel. Xui-ri, we xix tiqui che, que'el ire 'uri lic mas mal chiwach yix; ca 'e pa 'a' nabe chiwach yix, xa rumal i c'utum che.

<sup>16</sup>To' i wach yix chi ix aj c'ambeal chi xa ix mawach. Qui bij yix chi "We jun winak cu cuxtaj u bi i rachoch i Dios puwi i u tzij, n-chukul ta 'o wi 'uri u 'onquil pacha u bim," qui bij yix. "Péro we cu cuxtaj u bi i óro re i rachoch i Dios, 'o chukul 'uri co'on na pacha i u bim." Queje qui bij yix ile. <sup>17</sup>iLic ix sachnak na; lic ix mawach! ¿Pachique mas 'o i u 'ij? ¿Xataba are i óro? N-are taj. Are i rachoch i Dios chi mas 'o u 'ij, y co'on che i óro chi xak 'o u 'ij. <sup>18</sup>Xak qui bij yix chi "We jun winak cu cuxtaj u bi i altar puwi i u tzij, n-chukul ta 'o wi 'uri i u 'onquil pacha u bim," qui bij yix. "Péro we cu cuxtaj u bi i sipon chi 'o puwi i altar, 'o chukul 'uri co'on na pacha i u bim." Queje qui bij yix ile. <sup>19</sup>iLic ix sachnak na; lic ix mawach! ¿Pachique mas 'o i u 'ij? ¿Xataba are i sipon? N-are taj. Are i altar chi mas 'o u 'ij, y co'on che i sipon chi xak 'o u 'ij. <sup>20</sup>We 'o jun cu cuxtaj u bi i altar, xe'el 'uri xak xu cuxtaj u bi wach tak i 'o puwi i altar. <sup>21</sup>Xak we jun cu cuxtaj u bi i rachoch i Dios, xe'el 'uri xak xu cuxtaj u bi i Dios chi 'o chila. <sup>22</sup>Xak we jun cu cuxtaj u bi i caj, xe'el 'uri xu cuxtaj i u cubibal i Dios, pa cu 'at wi tzij, xak xu cuxtaj i Dios chi cul chila.

<sup>23</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! (Qui 'an pen i cojonc che i ral tzij re i 'atbal tzij chi n-ta kas ropis.) Ni'pa i 'o iwu' chi n-ta kas u chac, pacha i ral tak arawen, i anix, tak i comin, ile 'ut qui 'an pen i relsaxic jun tant che i lajuj, y qui ya na che i Dios. Xui-ri, n-qui 'an ti pen i cojonc che i tzij re i 'atbal tzij chi lic 'o u chac qui 'an na. N-qui 'an ta pen u 'anic i suc'ulic cu' i winak; n-qui 'an ta



pen rilic tobal qui wach; n-kas ta quix terej chirij i Dios. Are i ni'pa iri, are 'o u chac qui 'an na; xak 'o u chac qui jach i nabe tant che i Dios che i qui ch'aco. <sup>24</sup>iYix xa ix aj c'ambeal lic ix mawach! iWe 'o jun ral 'us chupam i ya' re i qui tijo, quiwesaj la 'ut; xui-ri we 'o jun camey chupam, xa qui tu' la bic!<sup>i</sup>

<sup>25</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! Lic qui 'an pen u ch'ajic i bas, tak i lak, xui-ri n-qui ch'aj ti i pi c'ux yix. I ubitak iwe, to' iwel'am na, xa quix tijin chu molic u chi', xui ile qui ch'obo. Que'elok pacha xui i rij i bas, xui i rij i lak i ch'ajom na, péro i u pam lic tz'il. <sup>26</sup>Ix mawach laj tak Fariséo, nabe chi ch'aja i u pam i bas, i u pam i lak, man que'el 'uri chom na ronojel.

<sup>27</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! Ix queje pacha jun pantion, lic chom, sak i rij, péro i u pam n-ch'am taj, xa 'o can u bakil camnak chupam, xa 'o ca 'ay chupam. <sup>28</sup>Yix ix queje ile; lic 'utz quix 'anaw chiquiwach i winak xui-ri i pi c'ux lic n-ch'am taj, xa ix nojnak che i mal; xa queb i palaj i 'anom che iwib.

<sup>29</sup>To' i wach yix, ix tijonel re i 'atbal tzij, xak yix chi ix aj Fariséo. iXa queb i palaj! Qui 'an pen u yijbaxic qui pantion i ujer ajbil u tzij i Dios, cojbal re qui 'ij. Qui 'an pen u wikic qui mukbal' i je re i Dios ujer. <sup>30</sup>Te'uri qui bij ni yix, "We tene yoj oj 'o che i 'ij-le que i katit kamam, yoj 'ut n-queje tene que ka camsaj-i i ajbil u tzij i Dios," quix cha. <sup>31</sup>Xui-ri, ru' i n-'us taj qui 'ano, i 'aljinsam chi lic ix xak jun cu' ique. Lic ix qui muk qui xiquin can ique chi xe qui camsaj i je ajbil u tzij i Dios ujer; xa ix qui cwentá ique. <sup>32</sup>Chi q'uisa u 'anic 'uri wach i xqui jek u 'anic iwattit i mam.<sup>k</sup> <sup>33</sup>iYix xa ix cumatz! iXa ix rac'al cumatz! N-quix tiqui ta chu jeq'uic

iwib chuwach i tojpen pa 'a'. <sup>34</sup>Que in tak nubi je ajbil u tzij i Dios chiwe, que in tak bi 'o qui no'oj, xak i je tijonel que in tak bi iwu'. Yix qui camsaj ni jujun chique, xak 'o jujun que i camsaj chuwach cruz, xak 'o jujun chic qui 'an ni c'ax chique pa tak molbal'ib, xak 'o jujun chic que iwoktaj, n-quix uxlan ta chi coktaxic pa tak tinimit. <sup>35</sup>I mal laj tak 'anic chi xqui 'an iwattit i mam ujer, xak are quix tijin yix chu 'anic wo'or, xak ca pe ni tojpen piwi yix rumal. Lic ix xak jun cu' ique chi xe qui camsaj i winak je 'utz. Are u jekanic, are u camsaxic i a-Abel chi n-tu mac, y queje ile petnak c'a are 'o wi chi xi camsaj i mam Zacarías pa rachoch i Dios!<sup>l</sup> <sup>36</sup>Katzij i quin bij chiwe, ni'pa i tojpen re iri ca pe na piquiwi i winak aj wo'or.

#### Xo' i Jesus cumal i aj Jerusalem man n-xcaj ti 'utz

<sup>37</sup>iAy, yix, ix aj Jerusalem! iYix chi que i camsaj i ajbil u tzij i Dios; yix chi to' qui col abaj chique i je u takon i Dios! iQ'uialmul lic in rayim quix in mol wu', pacha co'on jun ati ac' cu' i rac'al, que u ya chuxe' u xic'! iQueje ile xwaj te yin, y yix n-xiwaj taj! <sup>38</sup>Chitape', i tinimit yix co'tax na can rumal i Dios. <sup>39</sup>Quin bij chiwe, queje ile quix e'el na; n-quiwil ta chic in wach c'a cu rik ni 'ij chi quin i c'ulaj na iwu'. Qui bij na: "iChu ya ni 'utz i Kajwal Dios puwi i Jun chi u takom lok!" quix cha. (Queje xu bij i Jesus ile chique.)

#### Wach i retamaxic caka 'ano are ya ca c'un i q'uisbal 'ij

**24** <sup>1</sup>I Jesus xel pa rachoch i Dios; ya cu maj u be. Are 'uri xe teheb i u tijoxelab ru', y xe oc chu c'utic ni'pa i ja re i rachoch i Dios. <sup>2</sup>I Jesus xu bij chique: —¿Y yix c'a qui takej ni'pa ile? Katzij i quin bij chiwe: ronojel iri ca wulijsax na.

<sup>l</sup>23.24 I usuc' i xu bij-le que'elok: Yix qui 'an pen chu 'anic i ral tak tzij re i 'atbal tzij chi n-ta kas u chac, xui-ri, ni'pa i 'o u chac chi qui 'an na, n-qui coj ta retalik che. <sup>l</sup>23.29 I mer tzij xu bij are "monuménto". I monuménto ca bixic, xqui 'ano cuxtabal re jun camnak. <sup>k</sup>23.32 I ujer tak caj'atzilab nic are wi xe qui camsaj i ajbil u tzij i Dios, y wo'or xak queje cacaj quiqui 'an ique ile che i Jesus. <sup>l</sup>23.35 I mam Zacarías-le, u c'ojol can i mam Berequías. I catit qui mam i aj Israel winak xqui camsaj chuwaja re i rachoch i Dios; xqui camsaj chirij i altar, chuwach i lugar chi 'o u 'ij.

Mi jun abaj ca canaj chic puwi i rachi'il —xu bij chique.

<sup>3</sup>Te'uri xe 'e chuwi jyub Olívos i Jesus xcubi chila. Are 'uri i u tijoxelab xe tejeb pan ru'. Xe oc chu tz'onoxic che, al'al:

—Cakaj caketamaj umpa ca 'ani ile chi xa bij. ¿Wach cakilo are ya cat c'unic? ¿Wach cakilo are ya ca c'un i q'uisbal re tak i 'ij-i? —xe cha che.

<sup>4</sup>I Jesus xu bij:

—Chi 'ana cwent iwib, mokxa 'o quix qui t'oro. <sup>5</sup>Man je q'ui que c'un na, y quiqui 'an che quib pacha yin. “Yin in i Toliwe,” que cha; cumal ique-le, je q'ui que t'ortaj na. <sup>6</sup>Yix xak qui ta ni rason chi 'o nimak tak ch'o'oj jela, xak nimak tak ch'o'oj jewa. Mix c'achir rumal, man 'o ni u chac queje ile co'ono; xui-ri, are qui ta i tzij-le, c'a maja ca c'un ni q'uisbal re tak i 'ij-i. <sup>7</sup>O ni tinimit quiqui 'an ch'o'oj che jun chic. I winak re jun 'atol tzij xak quiqui 'an ch'o'oj che jun chic nim laj 'atol tzij. Ca pe wa'jal, ca pe yobil, ca pe i ucabranak pa tak tinimit. <sup>8</sup>Lic ca c'un na ile, xui-ri xa are i jekbal re i c'ax chi ca petic.

<sup>9</sup>Yix quix chaptaj na, quix ya' na pa tojpen, y quix camsax na. Conojel i winak tzel na quix quilo xa wumal yin. <sup>10</sup>Che i 'ij-le, je q'ui na quiqui sach u cubikal qui c'ux che i Dios; xak je q'ui na, tzel na quiquil quib; xak 'o ni quiqui jach i cachi'il piqui'ab i tzel que 'ilawic. <sup>11</sup>Xak je q'ui ni aj t'oronel que c'un na, quiqui bij chi je ajbil u tzij i Dios; je q'ui ni winak que qui t'or na. <sup>12</sup>Ni'pa i ca pe ru' itzel lic ca q'uiar na, je q'ui na 'uri i winak quiqui sach i c'axnabal qui c'ux chiquiwach. <sup>13</sup>Xui-ri, pachin i quiqui ch'ijo c'a pa q'uisbal-re, que 'el na 'uri pa c'ax. <sup>14</sup>Xak i 'utz laj tzij re i 'atbal tzij re i Dios ca paxsax na, ronojel u wach i jyub ta'aj, man caquetamaj na conojel i tinimit; te'uri ca pe i q'uisbal re u wach i jyub ta'aj.

<sup>15-16</sup>I ajbil u tzij i Dios, mam Daniel, u tz'ibam canok wach ca c'unic; xu bij ire chi cocsax na jun tzel laj kajsabal re u 'ij i rachoch i Dios. Are quiwil yix ile tac'al chila che i lugar 'o u 'ij pa rachoch i Dios,

ni'pa i je 'o pa jyub Judéa, che 'anmaj 'uri chuwa tak jyub. Pachin crajlaj i tzij-i, chu ta usuc'. <sup>17</sup>Ni'pa je 'o 'an puwija re i cachoch, su' che kaj la lok; we oc chic chupam, quiqui c'ambej re ubitak-que. <sup>18</sup>Xak ni'pa i je 'o pa tak ticon, we tzalij lok que qui c'ambej re qui 'u'. iPa'anem che 'anmajok! <sup>19</sup>Chupam i 'ij-le, to' qui wach ixokib chi 'o i yobil chiquij, xak ique chi 'o cac'al que tz'umanic, c'ax i qui 'anmajic ique. <sup>20</sup>Chi tz'onoj che i Dios chi n-joron ti tew are quix 'anmaj chuwach ile, xak n-are ta chupam i uxlambal 'ij. <sup>21</sup>Man i uyej che tak i 'ij-le, lic c'ax. C'a chu xebal 'ij sak, n-ta jun c'ax petnak lic c'ax chuwach ile; xak n-ta chic jun chic ca petic, lic c'ax chuwach ile. <sup>22</sup>Y we i Dios n-co'on ta che, chi xa 'atal 'ij 'o ni c'ax-le, 'is que cam na conojel. Xui-ri, ire cu 'atij na; queje co'on ire ile rumal i c'axnabal u c'ux chique i je re ire.

<sup>23</sup>Rumal-i, che tak i 'ij-le, we 'o i que bin chiwe: “Chiwilape' chi 'o wi i Tolke,” que cha, o we quiqui bij: “Le i 'olic-le,” que cha, mi cojo. <sup>24</sup>Man que c'un ni aj t'oronel chi quiqui 'an che quib pacha je toliwe, xak que c'un jujun quiqui 'an che quib pacha je ajbil u tzij i Dios. Quiqui 'an ni milágro, xak nimak tak 'anic, 'ilbal-re we que tiqui chi qui t'oric ni'pa i je re i Dios. <sup>25</sup>Ya in bim chic iri chiwe wach i qui c'ulmaj co'on panok. <sup>26</sup>Rumal-i, we ca bix chiwe: “Chiwilape' chila 'o wi i Tolke pa ta'aj tz'inilic,” que cha, mix 'e chila; xak we ca bix chiwe: “Chiwilape' chi 'o wi paja,” quiqui bij chiwe, mi cojo. <sup>27</sup>Mi cojo, man i Achi aj Chicaj n-ali'al taj ca c'unic. I u c'unic ire co'ono pacha co'on jun nim laj u rep 'a' ca repcanic, chi co'on sak ronojel u wach i caj. <sup>28</sup>(I tojpen lic ca c'un-na.) Pa 'o wi jun ch'aculaj camnak, chila que moltaj wi i c'uch.

#### Wach i u c'unic i Achi aj Chicaj

<sup>29</sup>Are quic'aw ni'pa i c'ax re i 'ij-le, are 'uri i 'ij ca 'ekumaric; i ic' n-ca tzun ta chic; i ch'umil que tzak na li chicaj; xak wach tak 'o chicaj que sicsax na. <sup>30</sup>Are

'uri ca 'iltaj jun seña chicaj, re in c'unbal yin chi in Achi aj Chicaj. Y conojel i tinimit chuwach i jyub ta'aj que o' na. Y quin quil na chi quin c'un pa tatz', nim na in cho'ab, in chomal. <sup>31</sup>Ca tataj jun nim laj trompet, y que in tak bi in ángel c'a pa que 'el wi li i cajib tew c'ulala; que in tak li jewa, xak que in tak bi jela, quiqui molbej-que ni'pa i je in chom, ronojel u wach i jyub ta'aj.

<sup>32</sup>Yix iweta'am wach i seña quiwil che u che'lal hígo are ya ca c'un i 'alaj; chix naw che i che'-le. Ile, are quiwilo chi ca pe tan chic u tux, y co'on rax, iweta'am 'uri ya ca mi' tan chic i ulew. <sup>33</sup>Xak queje quiwetamaj are ya ca c'un i q'uisbal re tak i 'ij-i. Are quiwil yix pacha tak in bim chiwe, chi ta u be 'uri ya ca pe i 'ij in bim chiwe; ya jekanic cu 'ano. <sup>34</sup>Katzij i quin bij chiwe, ya ca c'un ronojel ni'pa in bim-le; i winak je re wo'or quiquil na. <sup>35</sup>I caj, i ulew ca sachic, xui-ri in tzij yin n-ca sach taj, ca 'antaj na ronojel ni'pa in bim chiwe.

<sup>36</sup>Mi jun reta'am pachique 'ij, pachique 'or, co'on ile. Xak mi ne i ángel aj chicaj, xak mi ne u C'ojol i Dios n-reta'am taj; xui i Ta chicaj reta'am.

<sup>37</sup>I winak n-quiqui yijba ta quib che i 'ij-le are ca c'un i Achi aj Chicaj. Xa quiqui 'an na pacha xqui 'an i winak re tak i 'ij re i mam Noe ujer. <sup>38</sup>Ique ujer, are maja ca pe i nim laj jab chi xu nojsaj u wach i jyub ta'aj che i ya, n-xqui yijba ta quib. To' xqui tzuk quib, to' xe tu'unic, to' xqui bisoj i qui c'ulanic; queje xqui 'an ile tz'akat xc'un i 'ij chi xoc i mam Noe pa nim laj bárco. <sup>39</sup>To' queje ile xqui 'ano, y n-xqui na taj, c'a are xpe i nim laj ya chi 'is xe u c'am bic. Xak queje quiqui 'an na ile are quin c'un yin chi in Achi aj Chicaj. <sup>40</sup>Chupam i 'ij-le, je 'o ni queb achia, que chacun junam pa qui ticon; jun chique ca c'am nubic; i jun, ca canax canok. <sup>41</sup>Xak je 'o ni queb ixokib que tijin chi que'em. Jun chique ca c'am nubic; i jun ca canax canok.

<sup>42</sup>Rumal-i, chix c'asc'at na, man n-iweta'am taj wach o'onom 'or ca c'un i Iwajwal. <sup>43</sup>Cha c'un chi c'ux wach co'on

jun rajaw ja. Ire we te reta'am chi cha'ab ca c'un jun ili'om ru', we te reta'am wach o'onom 'or ca c'unic, ire 'ut ca c'asc'at na. N-cu ya ta che coc paja, cre'lajbej re ubitak-re. <sup>44</sup>Xak queje chi 'ana yix, lic chi yijba iwib chin iwoy'ej na; are n-ti qui ch'ob che, are 'uri quin c'un yin chi in Achi aj Chicaj.

**Jun ajchac, chu 'ana i u chac  
pusuc', tupu naj 'o wi u patron**

<sup>45</sup>(I Jesus xu bij chic jun tijojbal tzij chique. Xu bij):

—Iweta'am wach ca 'ani che jun mocom lic 'utz, lic 'o u no'oj. Ire ca ya' na can piquiwi i juban mocom rumal u patron. Chukul ire 'o wi u ya'ic i qui wa are cu rik i 'or. <sup>46</sup>Utz re i achi-le, we ca tijin chu 'onquil wach i rajwaxic chique i mocom are ca c'un chali i u patron.

<sup>47</sup>Katzij i quin bij chiwe, ire ca canax na 'uri puwi ronojel ni'pa i ubitak-re u patron. <sup>48</sup>Xui-ri, we xa mal laj mocom, xa cu ch'ob na: "In patron, n-we' taj ca tzalij chalok," mok cu bij ire. <sup>49</sup>Are 'uri cu jek qui ch'ayic i rach ajchac, xak ca 'e cu' i je 'abarel laj tak winak: to' cu' ique ca wa wi, xak ca tu'un wi. <sup>50</sup>Ire n-reta'am taj bi chi 'oril ca c'un u patron. Are n-ta cu ch'ob che, xak te'et ca c'un chalok. <sup>51</sup>I u patron cu ya na 'uri pa nim laj tojpen. Xak jun i tojpen ca ya' che pacha ca ya' chique i je queb qui palaj. Chila co' wi, y cu kach'ach'ej ni uware.

**I tijojbal tzij chiqui i lajuj altom**

**25** <sup>1</sup>(I Jesus xu bij chic jun tijojbal tzij chique.) Xu bij: I 'atbal tzij aj chicaj queje pacha iri: Je 'o lajuj altom xe 'e che jun c'ulanquil. Xqui c'am bi qui cantil man que 'e chu c'ulaxic i achi are ca c'unic. <sup>2</sup>Je jo'ob chique n-ta kas qui no'oj; i je jo'ob chic 'o qui no'oj. <sup>3</sup>I jo'ob chi n-ta kas qui no'oj, n-xqui c'am tubi acéite re i qui cantil we xq'uis u pam. <sup>4</sup>I jo'ob chi 'o qui no'oj xqui c'am bi jujun qui botey acéite, n-xui ti 'o chupam i qui cantil xqui c'am bic. <sup>5</sup>I achi chi ca c'ul'ic xbaytajic. Ique xe u chap waram, y xe waric. <sup>6</sup>Are tiq'uil a'ab, 'o i xe

siq'uin chu bixquil: “iYa xc'un i achi; jix chu c'ulaxic!” xqui bij. <sup>7</sup>I lajuy altom xe walijic, xe oc chu yijbaxic qui cantil. <sup>8</sup>Are 'uri i jo'ob chi n-ta qui no'oj xqui bij chique i je jo'ob cachi'il: “Chi sipaj pich' ka acéite re i ka cantil, man ya ca chupic,” xe cha chique. <sup>9</sup>I altom chi 'o qui no'oj xqui bij: “N-caka ya taj,” xe cha. “Man we caka ya'o, n-co'on ti ke yoj, xak mi ne iwe yix,” xe cha. “Jix chila pa ca c'ayix wi; chi lo'o na iwe yix,” xe cha. <sup>10</sup>Te'uri ique xe 'e chu lo'ic; are je 'enak chu lo'ic, xc'un i achi. Ni'pa i altom chi je yijilic, xe oc ru' ire pa c'ulanquil, are 'uri xtz'apix i uchija. <sup>11</sup>Te'uri xe upon i jo'ob chic, y xqui bij: “iNim laj winak! iNim laj winak! iCha jaka i uchija chake!” xe cha che. <sup>12</sup>Ire xu la' u wach chique: “N-quin 'an taj; n-weta'am ta i wach,” xu bij.

<sup>13</sup>Te'uri i Jesus xu bij chique u tijoxelab:

—Yix, chix c'asc'at na, man n-iweta'am taj pachique 'ij, pachique 'or, quin c'un yin chi in Achi aj Chicaj —xu bij chique.

#### I tijojbal tzij chiquij i oxib mocom

<sup>14</sup>(Te'uri i Jesus xu bij jun chic tijojbal tzij chique. Xu bij):

—I 'atbal tzij re aj chicaj, queje pacha iri: 'O jun achi ca 'e che jun tinimit c'a naj; xe u siq'uij u mocom y xroxanij can u mer cu'. <sup>15</sup>Jun chique xroxanij jo'ob mil sak pwak ru'. Y jun chic, xu ya chic can queb mil sak pwak ru'; y jun chic, xu ya can jun mil ru'. Queje u ya'ic ile xo'on chique, pacha i ca majaw chique chi qui jujunal. Te'uri xu maj u be. <sup>16</sup>I mocom chi xya' can jo'ob mil sak pwak che, ire xoc chi chac ru' i mer. Queje ile xu ch'ac jo'ob mil chirij. <sup>17</sup>Xak queje xo'on i jun chi xya' queb mil che: xak xu ch'ac queb mil chirij. <sup>18</sup>I jun chi yatal jun mil che, xa xu ruwaj u mer i u patron; xo'on jun jul y xu muk pulew.

<sup>19</sup>I patron xnajtinic; te'uri xc'un chic, y xoc chi rajlaxic u mer cu' u mocom.

<sup>20</sup>Nabe xupon i jun chi u yom can

jo'ob mil che. Ire xu jach i jo'ob mil chi yatal che, xak xu jach i jo'ob mil chi u ch'acom. Xu bij: “Nim laj winak, jo'ob mil xa ya chwe, xak jo'ob mil chic xin ch'ac chirij,” xu bij che. <sup>21</sup>I u patron xu bij: “Lic 'utz i a 'anom. Yet at 'utz laj mocom; lic a yom a c'ux chu 'onquil pacha i cwaj yin. Lic 'utz a chac xa 'an ru' i jubi'-le, rumal-i, quin ya na mas pa'ab puwi ile. Chat oc lok, y chat quicot wu',” xu bij che. <sup>22</sup>Te'uri xupon i jun chi yatal queb mil che, Xu bij: “Nim laj winak, queb mil a yom chwe, xak ri i queb mil-i xin ch'ac chirij,” xu bij che. <sup>23</sup>I u patron xu bij: “Lic 'utz i a 'anom. Yet at 'utz laj mocom; lic a yom a c'ux chu 'onquil pacha i cwaj yin. Lic 'utz a chac xa 'an ru' i jubi'-le, rumal-i, quin ya na mas pa'ab puwi ile. Chat oc lok, y chat quicot wu',” xu bij che. <sup>24</sup>Xak xupon chic i jun chi yatal jun mil che. Xu bij che u patron: “Nim laj winak, weta'am chi yet at c'an che a chac; ca jach' i ticon chi na ticom taj, xak ca mol u wach i ticon chi n-yet ti a mulim. <sup>25</sup>Rumal-i xin xij wib; xe'e wuwaj a mer pulew. Chawila, ri a mer-i chi a yom chwe,” xu bij che. <sup>26</sup>“Yet n-at ta 'utz laj mocom; lic ca c'ayo,” xu bij u patron che. “We yet aweta'am chi in c'an che in chac, <sup>27</sup>¿wuchac 'uri n-xa ya ti in mer pa banco, cu ch'acbej na mas? We ta queje ile xa 'ano, quin ch'ac ni yin-i ni'pa i xu ch'aco junam ru' ile chi in yom chawe,” xu bij che. <sup>28</sup>Te'uri xu bij chique i juban je 'o chila, “Chi c'ama i jun mil-le che; chi ya na che i jun chi 'o lajuy mil ru'. <sup>29</sup>Man jun, we 'o jubi' ru', ca ya' na mas che; we jun n-ca chacun ta ru' wach 'o pu'ab, ni'pa i 'o ru' quelsax na che. <sup>30</sup>I n-us ta laj mocom-le, chiwesaj bi rija; 'oj pa 'ekum. Chila co' wi, y cu kach'ach'ej ni uware,” xu bij i qui patron chique.

#### Wach i u jachic quixol i winak ca 'ani pa q'uisbal 'ij

<sup>31</sup>(I Jesus xu bij:) I Achi aj Chicaj<sup>m</sup>, are ca c'un tan chic, coc pu patan che

<sup>m</sup> 25.31 I Achi aj Chicaj are i Jesus mismo.

'atol tzij; junam cu' u ángel ca c'unic. Ca q'uiji na 'uri pu cubibal chi nim u 'ij. <sup>32</sup>I winak re ronojel tak tinimit chuwach i jyub ta'aj que moltaj na chuwach. Te'uri coc chi qui jachic qui pam, pacha jun aj chajil chij que u resaj u chij chiquixol i chabat. <sup>33</sup>Que u ya i u chij pu wikabim; i tak i chabat que u ya pu moxim. <sup>34</sup>Te'uri i 'Atol Tzij" cu bij na chique i je 'o pu wikabim: "Utz iwe yix; u yom ni utzil chomal in Kajaw piwi. Chix petok, chix oc che i q'uijibal chi u yijbam ire chiwe c'a chu xebal 'ij sak. <sup>35</sup>Queje cu ya ire ile chiwe man yix, are xin tij numic, xi ya na chwe wach i quin tijo; are xin c'atic, xi ya ni in ya'; are xin tzucuj in posar, xin i c'ulaj iwu'. <sup>36</sup>Are n-ta chic in 'u', xi ya i ch'ukbal wij; are in iwab, xin i chajij; are in tz'apil pa cárcel, xin i solij na." Queje ile cu bij ni 'Atol Tzij chique. <sup>37</sup>Te'uri, i je 'utz-le quiqui bij na: "Nim laj winak, ¿umpa xa 'an ile? ¿Umpa xka 'ano chi cat numic, y xka ya chawe wach ca tijo? ¿Umpa xka 'ano chi cat c'atic, y xka ya a ya?' <sup>38</sup>¿Umpa xka 'ano chi ca tzucuj a posar y xka ya chawe? ¿Umpa xka 'ano chi n-ta chic a 'u', y xka ya ch'ukbal awij? <sup>39</sup>¿Umpa xka 'ano chi at iwab, xak at 'o pa cárcel, y xat ka solij?" Queje ile quiqui bij na che i 'Atol Tzij. <sup>40</sup>Te'uri i 'Atol Tzij cu bij: "Katzij i quin bij chiwe, ni'pa i utzil chomal i 'anom che jun wachalal, tupu n-ta kas u 'ij, xe'el 'uri lic chwe yin i 'anom wi," cu bij na chique.

<sup>41</sup>Te'uri i 'Atol Tzij cu bij na chique i je 'o pu moxim: "Chix el chi chinwach, yix chi ix c'oktal rumal i Dios. Jix pa 'a' chi n-tu q'uisic, chi yijtalic re itzel junam cu' i u ángel. <sup>42</sup>Yin, are xin tij numic, yix n-xi ya ta chwe wach i quin tijo; are xin tij c'atic, n-xi ya ta in ya'. <sup>43</sup>Are xin tzucuj in posar, n-xi ya ta chwe. Are n-ta chic in 'u', xak n-ta in 'u' xi ya'o. Are in iwab, xak are in 'o pa cárcel, yix n-xin i solij taj." Queje cu bij ni 'Atol Tzij ile chique i je 'o pu moxim. <sup>44</sup>Te'uri ique

quiqui bij na: "Nim laj winak, ¿umpa xat kilo cat numic, o cat c'atic, o are ca tzucuj a posar, o xak are n-ta a 'u', o are at iwab, o xak are at 'o pa cárcel? ¿Umpa xa 'an ile chi n-xat ka to taj?" quiqui bij na che. <sup>45</sup>I 'Atol Tzij cu bij na 'uri chique: "Katzij i quin bij chiwe: yix are xiwil jun we yin chi 'o rajwaxic che, y n-xi to taj, tupu n-ta kas u 'ij, xe'el 'uri chiwe lic are ni yin chi n-xin i to taj," cu bij na chique. <sup>46</sup>Te'uri ique que 'e pa tojpen chi n-tu q'uisic; xak i je 'utz que oc na che i qui c'aslemal chi n-tu q'uisic. (Queje ile xu bij i Jesus chique u tijoxelab.)

**Wach u chapic i Jesus xqui ch'ob i nimak tak mam'ib**

**26** <sup>1</sup>I Jesus, are xutzin u bixquil ile chique, te'uri xu bij chique u tijoxelab:

<sup>2</sup>—Iweta'am yix, xa queb 'ij chic craj, ca c'un i nima'ij páscua<sup>a</sup>. Are 'uri yin, chi in Achi aj Chicaj quin jachtaj na piqui'ab i je aj ch'o'oj chwij man quin qui camsaj chuwach cruz —xu bij chique.

<sup>3</sup>Xak che i 'ij-le, xqui mol quib i ajwab sacerdoté, xak i je tijonel re i 'atbal tzij, xak i nimak tak mam'ib que i aj Israel. Xqui mol quib chuwaya re i nim laj ja pa 'o wi i mam Caifas chi 'atz laj sacerdoté.

<sup>4</sup>Chila xqui yijba wi wach u chapic i Jesus quiqui 'ano ali'al, xak wach i camsabal-re. <sup>5</sup>Xui-ri, xqui bij chiquiwach: —N-'us taj we caka 'ano tz'akat je q'ui i winak waral re i nima'ij, mokxa que oc i winak chi ch'okowic —xe cha.

**Jun ixok xu coj cunbal muy che u jolom i Jesus**

<sup>6</sup>I Jesus 'o pa aldéa Betánia ru' i rachoch i achi Simon, chi "Lepróso" ca bix che. <sup>7</sup>Are 'uri xtejeb jun ixok ru', ruc'am jun chom laj baxo nojnak che acéite lic muy, lic pakal rajil<sup>p</sup>. I Jesus ca tijin chi wa'im, are 'uri i ixok xu jam bi i cunbal puwi i Jesus. <sup>8</sup>I u tijoxelab, are xquil ile, xpe coywal.

<sup>a</sup>25.34 I 'Atol Tzij are i Jesus mísmo. <sup>p</sup>26.2 I nima'ij páscua, ca bixic, are jun nima'ij que i aj Israel. Xqui 'ano, cuxtabal re wach quicel lok, are je 'o piqui'ab i aj Egipto. <sup>p</sup>26.7 I baxo-le, 'antal che abaj pacha sakcho', "alabástro" u bi.

—¿Wuchac i ixok-le to' xo'on c'ax che i cunbal muy? —xe cha chiquiwach—. <sup>9</sup>We ta xu c'ayij, nim ni mer cu chap na che, cu tobej que i niba'ib —xe cha.

<sup>10</sup>Xu ta i Jesus wach quiqui bij y xu bij chique:

—¿Wuchac queje qui bij ile chirij i ixok-le? I xo'on ire-le chwe, lic 'utz. <sup>11</sup>I niba'ib, que'e 'ij sak je 'o na iwu'; yin n-naj ta chic in 'o iwu'. <sup>12</sup>I ixok-i, are xu jam i cunbal muy che in ch'acul, 'utz i xu 'ano, man xu cunaj bi in ch'acul re i mukbal-we. <sup>13</sup>Katzij i quin bij chiwe, xa ipa ca paxsax wi i tzij re i 'elsabal re i qui mac i winak xak ca tataj ni rason wach u 'anom i ixok-i chwe. Queje co'on ile ronojel u wach i jyub ta'aj, c'unsubal re i ixok-i chi qui c'ux i winak —xu bij i Jesus chique.

**Wach u c'ayixic i Jesus  
xo'on i ma Júdas**

<sup>14</sup>Te'uri, jun chique i cablajuj u tijoxelab, i jun chi ma Júdas Iscarióte u bi, ire xa 'e lapan cu' i ajwab sacerdoté. <sup>15</sup>Xu bij chique:

—¿Ni'pa i qui ya chwe we quin jach i ma Jesus pi'ab? —xu bij chique.

Ique xqui ya tréinta sak pwak che.

<sup>16</sup>Are 'uri i ma Júdas xu jek u tzucuxic wach i jachbal re i Jesus co'on piqui'ab.

**I q'uisbal wa'im xu tij i  
Jesus cu' u tijoxelab**

<sup>17</sup>Xc'un i nabe 'ij re i nima'ij chi ca tijaw i caxlanwa chi n-ti cunbal che. I u tijoxelab i Jesus xe tejeb ru' y xqui bij che:

—¿Pa cawaj wi yet que'e ka yijba wi i a wa'im re i nima'ij páscua? —xe cha che.

<sup>18</sup>—Jix pa tinimit —xu bij chique—. Jix ru' jun achi 'o chila y queje iri chi bij che: “Xu bij li ka tijonel: Ya cu rik i 'or chwij re in camic, cu bij. Chawachoch yet caka 'an wi ka wa'im re i nima'ij páscua, yin cu' in tijoxelab, cu bij.” Queje ile chix chok che —xu bij chique.

<sup>19</sup>I u tijoxelab xqui 'ano pacha i xbix chique. Xe 'e chu yijbaxic i wa'im re i nima'ij.

<sup>20</sup>Are xoc a'ab, i Jesus 'o cu' i cablajuj u tijoxelab chi mexa. <sup>21</sup>Are que tijin chi wa'im, xu bij chique:

—Katzij i quin bij chiwe, 'o jun chiwe yix quin u jach na piqui'ab i je aj ch'o'oj chwij —xu bij.

<sup>22</sup>Ique, are xqui ta, lic xe oc chi bis. Chiqui jujunal xe oc chu tz'onoxic che: —Kajwal, ¿mokxa yin? —xqui bij che.

<sup>23</sup>Ire xu bij:

—Pachin cu mu u wa pa lak wu' yin, are ni ire 'uri quin jachaw na. <sup>24</sup>Katzij, yin chi in Achi aj chicaj, quin camsax na, pacha tz'ibtal can chupam u wuj i Dios, xui-ri to'wach i achi chi quin jachaw na piqui'ab i aj ch'o'oj chwij. Mas 'utz que'el che i achi-le ma ta xalaxic —xu bij chique.

<sup>25</sup>Te'uri xch'aw i ma Júdas, chi ca jachaw ni Jesus: —Tijonel, ¿xataba yin quin 'anaw ile? —xu bij.

I Jesus xu bij che:

—Ru' a chi' xa bij —co'ono.

<sup>26</sup>Are que tijin chi wa'im, i Jesus xu chap jun caxlanwa, xu tioxij che i Dios, te'uri xu piro. Xu ya chique u tijoxelab, y xu bij chique:

—Chi tija, are iri are in ch'acul.

<sup>27</sup>Te'uri xu chap jun tu'bal víno, xu tioxij che i Dios, y xu ya chique.

—Chi tu'u yix iri, iwonojel —xu bij chique—. <sup>28</sup>Are iri are in quiq'uel chi ca yijbaw ni trat c'ac' ru' i Dios. Ca turuw na, sachsabal re i qui mac uq'ual winak. <sup>29</sup>Katzij quin bij chiwe, n-quin tu' ta chic u wa'al úva, c'a cu rik ni 'ij quin tu' julaj chic junam iwu' yix, pa cu 'at wi tzij in Kajaw —xu bij chique.

<sup>30</sup>Te'uri xqui bixaj jun bix, cojbal re u 'ij i Dios; are xe utzinic, xe 'e chuwi jyub Olívos.

**I Jesus xu bij che i ma Pédro  
chi cruwaj ni u wach**

<sup>31</sup>I Jesus xu bij chique:

—Wo'or cha'ab, iwonojel yix quin iwo'taj na canok. Weta'am queje ile que'elok, man queje iri u bim can i Dios chupam u wuj: “Quin ya na, chi ca

camsax ni aj yu'ul chij,” xu bij, “te’uri i chij que jacher bic.” Queje ile tz’ibtal canok. <sup>32</sup>Xui-ri, are in walijnak chic che i camic, quin nabeaj na chiwach pa Galiléa —xu bij chique.

<sup>33</sup>Are ’uri xu bij i ma Pédro:

—We conojel ’is cat co’taj canok, yin lic n-cat wo’taj taj —xu bij.

<sup>34</sup>I Jesus xu bij che:

—Katzij i quin bij chawe, che i a’ab-i, are maja ca ch’aw i ac’ re u sakirbal, oxmul ca bij na, chi n-aweta’am ta in wach —co’ono.

<sup>35</sup>—Yin lic n-cat wuwaj taj —xu bij i ma Pédro— n-ta co’ono we junam awu’ coj camsaxic.

Xak queje ile xqui bij conojel i u tijoxelab.

#### Wach u tz’onoxic xo’on i Jesus pa Getsemani

<sup>36</sup>Te’uri xe ’e chic che jun lugar, Getsemani u bi. I Jesus xu bij chique u tijoxelab:

—Chix cul na can chi, tz’akat quin ’e na yin jela chu tz’onoxic che i Dios —xu bij.

<sup>37</sup>Te’uri xe u c’am bi i ma Pédro, xak i queb u c’ojol i mam Zebedéo ru’, y xpe jun nim laj bis, jun nim laj c’ax pu c’ux.

<sup>38</sup>Xu bij chique:

—I bis ’o pa wanima, quin cam rumal, quin na yin. Chix canaj yix waral y chix c’asc’atok —xu bij chique.

<sup>39</sup>I Jesus xa ’e chupan jubi’, xu jupij rib pulew, y xoc chu tz’onoxic che i Dios:

—Ta, cwaj yin, we ta ’o módo, cawesaj i c’ax ’o chinwach. Xui-ri, ma ya chwe pacha i to’ cwaj yin; are, cha ’ana pacha i cawaj yet —xu bij.

<sup>40</sup>Te’uri xtzalij chic cu’ i u tijoxelab; we u rika que waric. Xu ’ijla i ma Pédro:

—¿N-xi ch’ij ta bari xix c’asc’at jun ’or wu’? —xu bij—. <sup>41</sup>Chix c’asc’at na, y chi tz’onoj che i Dios man n-quix tzak ta chupam i mac. Katzij, yix piwanima quiwaj quix c’asc’atic, xui-ri i ch’acul n-tu cho’ab —xu bij.

<sup>42</sup>Are ’uri xtzalij chic ucamul chu tz’onoxic che i Dios. Xu bij:

—Ta, we n-’us taj chi quelsax ni c’ax chi ’o chinwach, we lic ’o ni u chac quin ch’ijo, ’utz ’uri ca ’ani chwe pacha i cawaj yet —xu bij.

<sup>43</sup>Are xtzalij chalok, xe ’e u rika tan chic u tijoxelab que war tan chic; i qui ba’wach ique lic waram craj. <sup>44</sup>Ire xe u canaj canok, y xa ’e chic; are uroxmul xa ’e chu tz’onoxic che i Dios, xak jun chi tzij xu bij chic che. <sup>45</sup>Te’uri xa ’e chic chila cu’ u tijoxelab.

—Bay, chix warok; chix uxlanok —xu bij chique—. Ya xu rik i ’or chi yin, chi in Achi aj Chicaj, quin jachtaj na piqui’ab i ajmaquib. <sup>46</sup>Chix walijok. Jo’. Ya xc’un ire chi quin jachaw na piqui’ab i aj ch’o’oj chwij —xu bij chique.

#### Wach u chapic i Jesus xqui ’ano

<sup>47</sup>I Jesus c’a ca tijin chi tzij are xupon i ma Júdas, chi jun chique i cablajuj u tijoxelab. Ire je ruc’am li uq’uial winak; ’o i cuc’am ch’ich’, ’o i cuc’am che’. Ique je taktal li cumal i ajwab sacerdoté xak i nimak tak mam’ib que i aj Israel. <sup>48</sup>I ma Júdas, chi aj jachanel re i Jesus, u bim can chique wach i seña co’on chique, c’utbal re i Jesus: “Are i jun chi quin tz’ubaj, are ile,” u bim chique. “Chi chapa ’uri,” u bim can chique.

<sup>49</sup>I ma Júdas, are xuponic, xtejeb pan ru’ i Jesus.

—Na’ab, in Tijonel —xu bij che. Y xa ’e u tz’ubaj.

<sup>50</sup>I Jesus xu bij che:

—Achi, ¿Wach cawaj chwe? —xu bij. Are ’uri i juban xe tejeb ru’ i Jesus y xqui chapo; lic co i u chapic xqui ’ano.

<sup>51</sup>Are ’uri, jun chique i rachi’il i Jesus xresaj li u ch’ich’ y xu c’atzij u xiquin i aj takon re i ’atz laj sacerdoté. <sup>52</sup>I Jesus xu bij che:

—Cha c’olo a ch’ich’ pa rachoch, man ni’pa i que ’anaw ch’o’oj ru’ ch’ich’, xak ru’ ch’ich’ que camsax wi —xu bij che—. <sup>53</sup>¿N-aweta’am ta bari, chi we ta cwaj yin, quin tz’onoj che in Kajaw y cu tak li uq’uial ángel chin to’ic? ¡Mas ne chuwach i seténta mil que u tak neli-ri wu’! <sup>54</sup>Xui-ri, we ta quin ’an yin



ile, n-que'el ta 'uri pacha tz'ibtal can chupam u wuj i Dios. Lic 'o ni u chac que'el na pacha i tz'ibtal canok —xu bij che.

<sup>55</sup>Te'uri xu bij chique i winak:

—¿Wuchac xix c'un yix ru' i ch'ich' xak ru' i che', qui c'ambej bi we, pacha qui 'an che jun ili'om? Yin 'ij 'ij in cul chixol yix pa rachoch i Dios, quin tijin chu c'utic chique i winak, y n-xin i chap taj. <sup>56</sup>Xui-ri, 'o ni u chac ca 'ani iri chwe, pacha qui tz'ibam can i ajbil u tzij i Dios ujer —xu bij chique.

Te'uri, ni'pa i u tijoxelab i Jesus xqui canaj canok y xe 'anmajic.

**Wach i c'ax xu tij i Jesus  
piqui'ab i nuc'bal t'isbal**

<sup>57</sup>Ni'pa i qui chapom i Jesus, xqui c'am bi che i rachoch i mam Caifas, chi 'atz laj sacerdoté. Chila qui molom wi quib i je tijonel re i 'atbal tzij xak i nimak tak mam'ib. <sup>58</sup>I ma Pédro, to' chi naj xterej bi chiquij, c'a xupon chuwaja re i rachoch i mam Caifas. Xoc bi chuwaja, chila xcubi wi cu' i policia, cu takejbej-re wach ca 'ani che i Jesus.

<sup>59</sup>I caj'atzil i sacerdoté, xak i nimak tak mam'ib, xak ronojel i nuc'bal t'isbal, 'is xqui tzucuj u mac i Jesus. Cacaj ique quiqui coj u mac chuwach i 'atbal tzij, tupu n-katzij taj, xa camsabel-re cacaj ique. <sup>60</sup>Lic n-ta jun u mac xqui rik chirij, tupu je q'ui xe c'unic y xqui bij mentir chirij. Pa q'uisbal-re, xe upon chic queb testígo chi xa mentir quiqui bij. <sup>61</sup>Xqui bij ique:

—I achi-ri xu bij: “Yin quin tiqui chu wulijsaxic i rachoch i Dios, te'uri che oxib 'ij quin walijisaj wi chic,” xu bij —xe cha.

<sup>62</sup>Are 'uri i 'atz laj sacerdoté xwalijic, y xu bij che i Jesus:

—Yet, ¿lic n-ca la' tu wach chique?

¿Wach usuc' ile quiqui bij chawij? —xu bij.

<sup>63</sup>I Jesus lic n-xch'aw taj. Are 'uri i 'atz laj sacerdoté xu bij:

—Yin, chuwach i Dios c'aslic, quin ya chakul: cha bij i sak laj tzij chake; cha bij 'uri we yet at Crísto<sup>a</sup>, chi u C'ojol i Dios —xu bij che.

<sup>64</sup>I Jesus xu bij:

—Katzij i xa bij. Xak quin iwil ni yin chi in Achi aj Chicaj, in cul na pu wikabim i Dios chi 'atz u cho'ab; xak quin iwil na quin c'un chali pa sutz' chicaj —xu bij chique.

<sup>65</sup>Are 'uri i 'atz laj sacerdoté xu rakh'ij u 'u, c'utbal-re i roywal. Xu bij: —iTzel cu ta i Dios ile! iYa n-ta chic u chac we 'o juban chic col qui bij u mac! Ya xi ta yix waral wach i itzel tzij xu bij. <sup>66</sup>¿Wach qui ch'ob yix che ile? —xu bij chique i rachi'il.

I juban je 'o ru' xqui bij:

—Ire lic 'o u mac; cu maj che chi ca camsaxic —xe cha.

<sup>67</sup>Are 'uri xqui chubaj qui c'axaj chu palaj y xqui ch'ayo. 'O juban chic xqui ch'ay chu palaj <sup>68</sup>y xqui bij che:

—Yet chi at Crísto, cha bij 'u chake pachin xat ch'ayawic —xe cha che.

**I ma Pédro xruwaj u wach i Jesus**

<sup>69</sup>Tz'akat are xqui 'an ile, i ma Pédro cul chuwaja. Are 'uri, xupon jun ali, aj chac pa rachoch i caj'atzil i sacerdoté; xu bij che:

—Xak yet at rachi'il i ma Jesus aj Galiléa —xu bij.

<sup>70</sup>Xui-ri, i ma Pédro xruwaj u wach chiquiwach conojel:

—N-weta'am ti yin wach i ca bij —xu bij che i ali.

<sup>71</sup>I ma Pédro ya ca 'ec, 'o chic che uchibe. Are 'uri xa 'iltaj chic rumal jun chic. Xu bij 'uri chique i je 'o chila:

—I achi-le, rachi'il i ma Jesus chi aj Nazaret —co'ono.

<sup>72</sup>I ma Pédro xu bij chic chi n-reta'am tu wach. Xu cuxtaj u bi i Dios puwi u tzij y xu bij:

—Lic n-weta'am tu wach i achi-le —xcha.

<sup>73</sup>Xo'on chupan jubí, ni'pa i je 'o chila xe tejeb ru' y xqui bij:

<sup>a</sup> 26.63 Are i que'el pa ka ch'awbal yoj: i Tolke chi at koy'em.

—Katzij, xak yet at cachi'il ique. Ca 'alijin che a ch'awbal —xqui bij che.

<sup>74</sup>Te'uri i ma Pédro xu bij chique:

—Chu ya ni tojpen i Dios pinwi, we n-katzij ti quin bij. Lic n-weta'am tu wach i achi-le —xu bij.

Are 'uri xch'aw jun teren. <sup>75</sup>Juntir xc'un chu c'ux wach i bital che rumal i Jesus, man u bim che: “Are maja ca ch'aw i ac' re u sakirbal, quin awuwaj na oxmul,” u bim i Jesus che. Te'uri i ma Pédro xel chila, lic c'ax xu na u c'ux, lic xo' rumal.

**Wach u jachic i Jesus  
pu'ab i ma Piláto**

**27** <sup>1</sup>Are xsakiric, i caj'atzil i sacerdoté xak i nimak tak mam'ib que i aj Israel, ique xjunamtaj qui no'oj wach u camsaxic i Jesus quiqui 'ano. <sup>2</sup>Xqui xim i Jesus y xqui c'am bi ru' i ma Piláto chi gobernador, y xqui jach pu'ab.

**Wach u camic i ma Júdas**

<sup>3</sup>I ma Júdas, chi c'ayiwnak i Jesus, are xrilo chi ca camsax na, lic xbison che wach u 'anom. Are 'uri xa 'e u tzalij chic i tréinta sak pwak chique i caj'atzil i sacerdoté, tak i nimak tak mam'ib. <sup>4</sup>Xu bij chique:

—Lic in macun-nak; in jachom jun achi che i camic chi n-tu mac —xu bij.

Ique xqui la' u wach che:

—¿Bi ke-yoj che? —xe cha—. iLic awe yet pa wach wi ile! —xe cha che.

<sup>5</sup>Te'uri i ma Júdas xu jopij i sak pwak pa rachoch i Dios y xel bic. Are 'uri xa 'e u jitz'aj rib.

<sup>6</sup>I caj'atzil i sacerdoté xqui mol i mer y xqui bij:

—I mer-i, n-'us taj caka ya ru' i re i Dios; i 'atbal tzij re i mam Moises n-cu ya taj, man i mer-i are i rajil i quiqu'uel jun winak —xqui bij.

<sup>7</sup>Te'uri xjunamtaj qui no'oj quiqui lo' jun ulew re i qui camposant ni'pa i je aj naj que cam pa Jerusalen. I ulew chi xqui lo'o, xa are pa ca 'an wi boj ujer; “Ulew re 'Anbal Boj” u bi. <sup>8</sup>Xui-ri, xqui

jalwachij u bi i ulew; “Ulew Quic” xqui bij che, y c'a are 'o wi wo'or. <sup>9</sup>Queje ile xe'elok pacha u bim can i mam Jeremías, chi ajbil u tzij i Dios ujer. Ire u bim canok: “Xqui c'am bi i tréinta sak pwak chi are i rajil bital che cumal i aj Israel; <sup>10</sup>y ru' i mer-le xqui lo' i ulew pa ca 'an wi boj ujer. Xe'elok pacha u bim can i Kajwal chwe.” Queje ile tz'ibtal canok.

**I u tz'onbal i ma Piláto che i Jesus**

<sup>11</sup>I Jesus xc'am bi chuwach i gobernador. Ire xu tz'onoj che i Jesus: —¿Yet at 'atol tzij que i aj Israel winak? —co'ono.

I Jesus xu bij:

—Are ile, pacha i xa bij yet —co'ono.

<sup>12</sup>Xui-ri, are xocsax u mac cumal i ajwab sacerdoté, xak i nimak tak mam'ib, i Jesus n-ta xu bij. <sup>13</sup>Are 'uri i ma Piláto xu bij che i Jesus:

—¿N-ca ta ta-bari wach tak quiqui bij chawij? —co'ono.

<sup>14</sup>Xui-ri, i Jesus xak n-ta xu bij. Are 'uri, i gobernador lic xu bisoj.

**I winak lic xqui tz'onoj  
u camsaxic i Jesus**

<sup>15</sup>Junab chi junab, are 'o i nima'ij páscua, i gobernador 'o pu'ab cro'taj jun prex, pachique quiqui cha i winak.

<sup>16</sup>O jun prex, ma Barabas u bi, ire lic 'etamam u mac cumal conojel i winak.

<sup>17</sup>Are je moltajnak chic i winak, i ma Piláto xu tz'onoj chique:

—¿Pachique quiwaj yix cwo'taj bi chiwe? ¿Quiwaj i ma Barabas? ¿O quiwaj i ma Jesus chi “Cristo” ca bix che? —xu bij chique.

<sup>18</sup>Ire reta'am chic chi xa tzel quiquil i Jesus; xa rumal ne ile qui c'amom lo ru'.

<sup>19</sup>I ma Piláto, are cul pu q'uijbal, i rixokil xu tak li u bixquil ru'; xu bij che: “Ma min awib che u camsaxic i achi-le, man ire n-tu mac. Yin cha'ab xin 'an jun achic' lic xibin'ib rumal ni ire-le y quin c'achir rumal.” (Queje ile xbx che.)

<sup>20</sup>Xui-ri i caj'atzil i sacerdoté, xak i nimak tak mam'ib, xe qui tun i winak chi quiqui tz'onoj i ro'taxic i ma

Barabas, xak quiqui tz'onoj u cam saxic i Jesus. Queje i qui tunic ile xqui 'ano.

<sup>21</sup>I gobernador xu tz'onoj chic chique i winak:

—¿Pachique chique i je queb quiwaj yix quin tak nubi ro'taxic? —xu bij.

—A-Barabas —xe cha.

<sup>22</sup>I ma Piláto xu tz'onoj chique:

—¿Wach quin 'an 'uri che i Jesus-i chi “Cristo” ca bix che? —co'ono.

Conojel xqui bij:

—iCha cam sax chuwach cruz! —xe cha.

<sup>23</sup>—¿Wach u mac 'uri u 'anom?

—co'ono.

Ique xa xe siq'uin tan chic; xqui bij:

—iCha cam sax chuwach cruz! —xe cha.

<sup>24</sup>Xril i ma Piláto 'uri chi n-tu chac cu tz'onoj mas tzij chique. Ique to' ch'okowic quiqui 'ano. Rumal-i ire xresaj rib chupam; xu tak u c'amic jun palangan ya, y xu ch'aj u 'ab chiquiwach. Xu bij chique:

—N-in mac ti yin we qui cam sax i achi-ri chi n-tu mac. Chiwach yix 'o wi wach qui 'an che —xu bij chique.

<sup>25</sup>Conojel i winak xqui la' u wach che:

—iPakawi yoj ca pe wi i tojpen che u camic i achi-ri! iXak piquiwi i kac'al! —xqui bij.

<sup>26</sup>Are 'uri i ma Piláto xro'taj bi a-Barabas; te'uri xu tak u ya'ic i lo'xic i Jesus y xu jach bi piqui'ab i que cam sax chuwach cruz.

#### Wach u yo'yaxic i Jesus xqui 'an i soldádo

<sup>27</sup>Te'uri i u soldádo i gobernador xqui c'am bi i Jesus pa palácio. Chila conojel i cachi'il xqui mol quib chirij chuwach.

<sup>28</sup>Xquesaj u 'u' y xqui coj jun chom laj u 'u' cak. <sup>29</sup>Te'uri xqui coj jun sotosic q'uix che u jolom, y xqui ya jun che' pu'ab wikabim. Te'uri xe xuqui chuwach, y xe oc chu yo'yaxic; xqui bij:

—iNaj u 'ij i 'atol tzij que i aj Israel! —xqui bij.

<sup>30</sup>Xqui chubaj qui c'axaj chirij, xak xqui maj i che' che, chi qui yom pu'ab, y xqui ch'ay u jolom ru'. <sup>31</sup>Are xe utzin chu yo'yaxic, xquesaj i c'ul cak chi qui

cojom che, y xqui coj chic i u 'u' ire. Te'uri xqui c'am bic, xe 'e chu cam saxic chuwach cruz.

#### Wach u ripic i Jesus chuwach cruz

<sup>32</sup>Are que tijin chi be, xqui c'ulaj jun achi aj Ciréne, chi ma Simon u bi. Xqui 'an pen che, xu c'am bi u cruz i Jesus. <sup>33</sup>Queje ile xe upon che jun jyub, Gólgota u bi; i usuc' i tzij-le que'elok: “jyub pacha u jolom anma.” <sup>34</sup>Are xe upon chila, xqui sujuj jubí' v'ino che i Jesus, chi 'o cunbal c'a che, tobal na re u c'axc'ol. I Jesus, are xu na'o, n-xraj taj.

<sup>35</sup>Are qui ripom chic chuwach i cruz, i soldádo xe oc chi saquinic chirij u 'u' i Jesus, 'ilbal-re pachin ca ch'acaw bi chique. Xe'el 'uri pacha u bim can i ajbil u tzij i Dios ujer. Xu bij ire: “Xqui jach na in 'u' chiquiwach; xe saquin chirij in 'u', pachin ca ch'acaw nubic.” Queje ile u tz'ibam canok. <sup>36</sup>Te'uri xe cubi chila chu chajixic, tz'akat ca camic. <sup>37</sup>Puwi 'an i cruz xqui tz'ibaj juban tzij, 'alijinsabal-re wach u mac. Cu bij i tz'ib: “Are iri, are i Jesus, chi 'atol tzij que i aj Israel winak,” co'ono.

<sup>38</sup>Xak je 'o queb ili'omab xe qui rip chuwach qui cruz, junam ru' i Jesus. Jun xq'uiji pu wikabim, y jun pu moxim. <sup>39</sup>Ni'pa i que ic'aw chila, xqui yo'ya. Quiqui sutsa qui jolom <sup>40</sup>y quiqui bij: —Yet a bim na chi ca wulijsaj ni rachoch i Dios, y ca yac chic churox 'ij. iBay, cha to 'uri awib! We yet at u C'ojol i Dios, cha kajsaj li awib chuwach i cruz —xe cha.

<sup>41</sup>Xak queje xqui 'an i ajwab sacerdoté, xak i tjonel re i 'atbal tzij, xak queje i aj Fariséo, xak i nimak tak mam'ib, lic xqui yo'ya na. Ique xqui bij chiquiwach:

<sup>42</sup>—Ire-le je q'ui xe u to na, xui-ri n-ca tiqui ta chu to'ic rib. Ire, we lic are i ka 'atol tzij yoj chi oj aj Israel, cha kaj lo 'uri chuwach i cruz, te'uri caka coj na. <sup>43</sup>Ire u cubam u c'ux che i Dios, xak u bim chi ire u C'ojol i Dios; bay, i Dios 'ut chu to na we c'ax cu na'o —xe cha.

<sup>44</sup>Xak i ili'omab chi je riptal ru' ire, xak ique quiqui yo'ya panok.

### Wach u camic i Jesus

<sup>45</sup>Are tiq'u'il 'ij, xo'on 'ekum ronojel u wach i jyub ta'aj; queje xo'on ile c'a a las tres re u kajbal 'ij. <sup>46</sup>Are 'uri, co xch'aw i Jesus, xu bij:

—Eli, Eli, ¿láma sabactáni? —xu bij.

I usuc' i tzij-i que'elok: Wajwal Dios, Wajwal Dios, ¿wuchac in awo'tam canok? Queje usuc' u tzij ile.

<sup>47</sup>Je 'o jujun chila xqui ta; ique xqui bij:

—I achi-le cu siq'u'ij i ujer ajbil u tzij i Dios, mam Elías —xe cha.

<sup>48</sup>Juntir, 'o jun chique xa 'e pa'anem, xu mu jun espónja chupam juban víno ch'am. Te'uri xu ch'ap tzam che' y xu ya 'an che, man cu tz'ub-bej re. <sup>49</sup>I juban xqui bij:

—Chawoy'ej na, we kas ca c'un i mam Elías chu to'ic —xe cha che.

<sup>50</sup>Te'uri i Jesus xsiq'u'in julaj chic y xel u c'ux.

<sup>51</sup>Are 'uri i nim laj cortin pim, pa rachoch i Dios, xel pa nic'aj, xmajan li puja', c'a pulew. I ulew lic xa sicsatic; i tak i abaj xpax u pam. <sup>52</sup>Ni'pa i qui mukbal i camnak xe jaktaj na; je q'ui i creyent je camnak xe walij na. <sup>53</sup>Xe 'el 'uri chi sak; y chirijil nu walijic i Jesus, xe oc pa tinimit Jerusalen. Chila xe 'iltaj wi cumal uq'ual winak.

<sup>54</sup>'O jun capitan que tijin chu chajixic i Jesus cu' u soldádo. Are xqui na i ucabrakan, xak xquil ni'pa i 'anic-le, lic xqui xij quib. Xqui bij:

—Katzij i achi-ri, lic are u C'ojol i Dios —xqui bij.

<sup>55</sup>Je 'o uq'ual ixokib que taken li c'a naj chi je terejnak chirij i Jesus. Je terejnak li chirij, quiqui tobej na re; c'a pa Galiléa je terejnak lok. <sup>56</sup>Chi quixol ique je 'o i ati Mariy Magdaléna, xak i ati Mariy chi qui chuch i ma Jacóbo y ma Jose, xak i qui chuch i u c'ojol i mam Zebedéo.

### Wach u mukic i Jesus

<sup>57</sup>Are xoc a'ab, xc'un jun achi beyom aj Arimatéa, ma Jose u bi. I achi-le xak

terejnak chirij u c'utunic i Jesus. <sup>58</sup>Xoc ire ru' i ma Piláto y xu tz'onoj i u ch'acul i Jesus. I ma Piláto xu tak u jachic che.

<sup>59</sup>Te'uri i ma Jose xu c'am bic y xu pasij bi chupam jun sawan lic ch'am. <sup>60</sup>Te'uri xe u mina chupam jun pantion re ire; are jun jul chi c'a te u takom u woric chupam jun péña. Xu tz'apij can u chi' i jul ru' jun nim laj abaj, y xa 'ec. <sup>61</sup>I ati Mariy Magdaléna, xak i ati Mariy jun, xe cubi can chila chuwach i jul.

### Lic xqui 'an pen n-ta quel'aw u ch'acul i Jesus

<sup>62</sup>Are xa 'ani ile, are i 'ij chi yijbal na re i uxlambal 'ij. Chucab 'ij 'uri, i ajwab sacerdoté, xak i aj Fariséo, xe 'e ru' i ma Piláto <sup>63</sup>y xqui bij che:

—Nim laj winak, xc'un chaka c'ux chi i achi aj t'oronel-le u bim na chi ca c'un sak chuwach churox 'ij. Queje ile u bim na are c'a c'aslic. <sup>64</sup>Rumal-i cha taka u chajixic i jul pa muktal wi, c'a churox 'ij. Mokxa que c'un i u tijoxelab cha'ab, caquel'aj bi u ch'acul, te'uri quiqui bij chique i winak chi walijnak chic. We queje quiqui 'an ni ique ile, i mentir-le mas nim na chuwach i-jun chi u bim can i achi. (Queje ile xqui bij che i ma Piláto.)

<sup>65</sup>Te'uri ire xu bij chique:

—Che i c'ama bi i soldádo; che i ya chila chu chajixic i jul. 'Utz u chajixic chi 'ana che —xu bij chique.

<sup>66</sup>Ique xe 'ec, que 'e qui yijba u chi' i jul man n-ta jun ca 'e yinawok. I abaj chi 'o che u chi' i jul, xqui coj c'am chuwach, xqui nac' ixcab che tak u tzam. Queje xqui 'an ile, 'ilbal-re we n-ta jun ca 'e yinawok. Xak xe qui canaj can i soldádo chi je chajinel re u chi' i jul.

### U walijic i Jesus che u camic

**28** <sup>1</sup>Are xic'aw i 'ij re i uxlambal 'ij, are ya ca pe i u sakiric re i domingo, are 'uri i ati Mariy Magdaléna, xak i ati Mariy jun, xe 'e chu rilic i jul. <sup>2</sup>Are maja que uponic, xpe jun ucabrakan, man 'o jun ángel re i Kajwal xkaj li chicaj, xresaj i abaj chu chi' i

jul, y xcubi puwi. <sup>3</sup>I u tzunbal ire ca walch'inic pacha u rep 'a'; i u 'u' lic sak, sak. <sup>4</sup>I soldádo, are xquil u wach, lic que sicsat rumal qui xibriquil, pacha laj xe cam rumal.

<sup>5</sup>Are xe upon i ixokib, i ángel xu bij chique:

—Mi xij iwib. Yin weta'am chi xix c'un chu tzucuxic i Jesus chi xcamsax chuwach cruz. <sup>6</sup>Ire n-ta waral; walijnak chubic pacha i u bim. Chix petok, chol iwila u q'uujibal pa yatal wi canok. <sup>7</sup>Chi bisoj u ya'ic rason chique i u tijoxelab. Chi bij chique: “Ire walijnak chic chiquixol i camnak; ya 'enak chic pa Galiléa, nabe na chiwach yix; chila quiwil ni u wach,” chix chok chique. Are iri col in bij chiwe —xu bij i ángel chique.

<sup>8</sup>Te'uri i ixokib juntir xe 'el ru' i jul. Lic xqui xij quib xe 'ec, xui-ri kak que quicotic. Pa'anem xe 'e chu ya'ic rason chique u tijoxelab. <sup>9</sup>Xak te'et i Jesus xu c'ut rib chique, y xu ya rutzil qui wach. Ique xe teheb ru' y xe xuqui chuwach, cojbal re u 'ij, y xqui chap i rakan.

<sup>10</sup>—Mi xij iwib —xu bij i Jesus chique—. Ji bij chique i wachalal che 'oj ique pa Galiléa; chila quiquil ni in wach —xu bij chique.

**Xya' mer chique i soldádo, 'anbal re chique chi quiqui 'an i mentir**

<sup>11</sup>I ixokib xqui maj bi qui be. Are que tijin chi be, xak 'o jujun chique i soldádo xe 'e pa tinimit chu bixquil chique i ajwab sacerdoté wach i xquilo. <sup>12</sup>Te'uri i ajwab sacerdoté xe 'e chu bixquil chique i nimak tak mam'ib. Xqui junamsaj i

qui no'oj chiquiwach, wach i quiqui 'ano. Te'uri xqui ya uq'ual mer chique i soldádo, <sup>13</sup>y xqui bij chique:

—Chi bij yix chi xix war cha'ab, y are 'uri xe c'un i u tijoxelab i Jesus y xquel'aj bi u ch'acul ire. Queje ile chi bij na. <sup>14</sup>We xu ta rason i gobernador, mi xij iwib; yoj caka kajsaj ni u c'ux ire; ire n-ta cu 'an chiwe. (Queje xqui bij i ajwab sacerdoté ile chique i soldádo.)

<sup>15</sup>Are 'uri i soldádo xqui chap i mer, y xqui bij na pacha bital chique. Y queje quiqui bij ni aj Israel winak ile, c'a are 'o wi wo'or.

**Wach u c'utic rib xo'on i Jesus chique u tijoxelab**

<sup>16</sup>I julajuj u tijoxelab xe 'e pa Galiléa; xe 'e che jun jyub pacha bital chique rumal i Jesus. <sup>17</sup>Chila xqui rik wi i Jesus, y are xquilo, xe oc chu cojic u 'ij, tupu 'o jujun chique n-kas ta quiqui cojo we are i Jesus. <sup>18</sup>I Jesus xteheb pan cu' y xu bij:

—Yatal chic pin'ab u 'atic tzij puwi ronojel ni'pa i 'olic. 'O chic pin'ab ronojel i aj chicaj, xak ronojel i aj chuwach i jyub ta'aj. <sup>19</sup>Jix yix cu' i winak ronojel u wach i jyub ta'aj. Chi bij in tzij chique man xak ique que u 'on ni in tijoxelab yin. Chi kajsaj ni ya piquiwi, c'utbal-re chi je re chic i Ta chicaj, xak je re i u C'ojol, xak je re i u Tawal i Dios<sup>r</sup>. <sup>20</sup>Chi c'utu chique chi 'o u chac que cojon na che ronojel ni'pa in c'utum yin chiwe yix. Mi sach pi c'ux chi yin in 'o na iwu' ronojel 'ij sak, c'a pa q'uisbal re u wach i jyub ta'aj.

Amen (katzij).

<sup>r</sup> 28.19 I mer tzij xu bij are iri: publi i Ta, xak i u C'ojol, xak i u Tawal i Dios.